

Jesu buhedore ïgu apinirã erã iirare wereripũ ãhraa

—*Espíritu Santo arigucumi, arĩnumi Jesu-cristo ïgu buherãre*

¹⁻² Teófilo, ero core yu gojamũhtarapũ mera Jesu ïgu iirare, ïgu buherare mũre weretuhabũ. Te ãmarogue ïgu mũriarare weretubũ. Jesu ïgu mũriaboro core ïgu Espíritu Santo turari mera dorepũ ïgu apinirãre. Erã ïgu beyenirã árĩnorã. ³ Eropi Jesu ïgu crusague ïgu sĩrira pũhrũ yujuyerisuburi dũpũcũgu dehyoapũ ïgu apinirãre. Cuarenta nũri pũhrũ dehyoatupũ. Eropigũ ïgu ïgu basi ojocarigũ árĩrire ïhmupũ erãre. Eropa dehyoagũ Goãmũ mari Pagũ ïgu opũ árĩrire õari buherire werepũ erãre.

⁴ Gajisubu Jesu ïgu apinirã mera árĩgu õpa arĩ erãre werepũ:

—Jerusalén ta árĩnique dohpa. “Espíritu Santore mũare obeogũra,” yu Pagũ ïgu arĩdigũre corenique. Irire ïgu eropa arĩrare mũare wereabũ yũhũ. ⁵ Ñu mũare waĩyegũ deco mera mũare waĩyemi. Yũpũ ïgu iira tauro iigũra mũare. Espíritu Santo mũa mera ïgu árĩnigũicãcũ iigũra mũare, arĩpũ Jesu.

Jesu ãmarogue mũriara

⁶ Eropi gajisubu utãgũgue Olivo waĩcũdigũgue Jesu erãre dehyoacũ erã serẽpiñorã ïgũre:

—OpɁ, ¿i Israe yebare mari ya yebare dohpárcũ guare dipaturi doreburire apibocuri mɁhɁ guare? ¿Dohpárcũ mari acawererã gohrare opɁ acugɁcuri mɁhɁ? arĩñorã igure.
⁷ Erã eroparĩcũ peegɁ Jesu õpa arĩpɁ:

—Mari PagɁ dihta irinurire mɁa ya yebare mɁa õaro árĩborore apimasimi. Irinurire mɁare masiya mara. ⁸ Eropirã mɁare Espiritu Santo igɁ eracũ GoãmɁ ya turarire oparãca mɁa. Iri turarire mɁa oparã Jerusalén majarãre, árĩpehrerã Judea majarãre, Samaria majarãre, árĩpehreri yeba majarãre õari buherire buherãca mɁa yaha árĩburire. YɁ sĩrirare, yɁ masa mɁriarare erãre buherãca mɁa, arĩ werepɁ Jesu erãre.

⁹ Eropa arĩ weretuhaja, Jesu Ɂmarogue mɁria warɁ. Erã igure erã ïhanurusia mujucũ imica cururi pohecague ñaja dedere mɁria warɁ.
¹⁰ Eropirã erã Jesu igɁ mɁriagure erã ïhanurusia mujurisubu perã anyua boreri suhricurã Jesu igɁ apinirã pohro dehyoanugajañorã. ¹¹ Eropirã erãre õpa arĩñorã:

—MɁa Galilea majarã, ¿duhpirã ïhamuju niguirã iiri mɁa? Ihĩ Jesu Ɂmarogue mɁriagɁ, igɁ mɁriadiro dopa ta dipaturi arigucumi daja, arĩ wereñorã anyua.

Jesu igɁ apinirã Judare gohrotobure beyeñorã

¹² Eropiira pɁhrɁ Jesu yarã Ɂtãgugue Olivo waĩcudigugue árĩnirã dijari, Jerusalengue dujajañorã. IrigɁ ɁtãgɁ yuju kilómetro wecañari Jerusalén ejaboro pohro árĩyoro. ¹³ Dujaja erã Ɂmarogue erã árĩri taribugue mɁria wañorã. Oã

árñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda árñorã. Santiagopũ Alfeo magũ árĩpũ. Simopũ celote waĩcũri curu majagũ árĩpũ. Judapũ Santiago acaweregũ árĩpũ. ¹⁴ Eropirã bajasuburi oã árĩpehrerã, nome mera, María Jesu pago mera, Jesu pagũ porã mera õaro gamenere, turaro mera Goãmũre mari Pagũre serẽmũriñorã.

¹⁵ Eropi irinũrire masa bajarã ciento veinte ejaboro gohra gamenereñorã. Eropigũ Pedropũ ĩgũ mera majarã Cristo yarã watope nũgaja, werepũ erãre.

¹⁶ —Yũ acawererã, Goãmũ iribojegue ĩgũ arĩdiro dopa ta eropa wahaa. Irire Espĩritu Santo Davire weredoreñumi Juda mũrũ eropa warare. Juda Jesure ñeha wejẽmorãre ĩhmudi árĩmi. ¹⁷ Juda mũrũ mari mera Jesu yare ii, gũa mera majagũ ta árĩrimi. ¹⁸ Judapũ ĩgũ Jesure ĩhmura wajare iri niyerure ĩgũ wiara pũhrũ ĩgũ basi wejẽ sĩripũ. Eropigũ yuhridija wa, ĩgũ gũramisida yehguea sĩria wapũ. ĩgũ wiara niyeru mũra mera gajirã merogã yebare asũñorã. ¹⁹ Eropirã árĩpehrerã ohõ Jerusalén majarã masipehrecãma Juda mũrũ ĩgũ ñero warare. Eropa masirã ĩgũ niyeru mera erã asũra yebare Acéldama di cóãri yebe waĩcũa, arĩma iri yebare. ²⁰ Iribojegue erã arĩ gojadiro dopa ta eropa wahãmi Juda mũrũ. Salmo waĩcũripũgue õpa arĩ gojañuma:

Ĩgũ arĩdirore cóãdiro árĩporo. Eropirã gajirã ĩgũ arĩdirore árĩbircãporo, arĩ gojañuma.

Ohõ sãre õpa arĩ gojañuma:

Gajigũ ãgũ mohmerare gohrotogũ áringucumi, arĩ gojañuma Salmogue, arĩpũ Pedro.

²¹⁻²² “Eropirã mari yujugũ beyerã Juda mårure gohrotobure. Ñu waĩyegũ ãgũ masare buhera-subu áringugure, Jesu mera mari mera áringugure beyero gahmea mari mera majagũ árĩbure. Jesu masa måriacũ sãre ãadigure beyero gahmea. Eropa beyera pũhrũ Jesu ãgũ masa måriarare mari mera buhegucumi, arĩ werepũ Pedro ãgũ acawererãre Cristo yarãre. ²³ ãgũ eroparĩcũ peerã perãre beyedoboñorã erã. Yujugũ José Justo waĩcugure beyeñorã. ãgũ Barsabá erã arĩ piyugũ arĩpũ. Eropirã gajigure Matia waĩcugure beyeñorã. ²⁴⁻²⁵ Erã perãre beyedobotuhaja, erãre Goãmure õpa arĩ serẽñorã:

—Mũhũ gũa Opũ árĩpehrerã masa erã pepirire masia. Oã åhrima gũa perã beyerã. Juda mårure gohrotobure nihi mũ gamegure beyequẽ. Juda mårũ Jesure cóadigũ peamegue wadigũ árĩmi. Eropigũ ãgure gohrotogũ Jesu ãgũ apidigũ áringucumi. Eropigũ gũa mera õari buherire buhegucumi, arĩñorã erã Goãmure.

²⁶ Eropa arĩrã ta utã mera deamuriñorã beyemorã. Matia yañe õaro wiricũ, Matiapũ Jesu ãgũ apinirã once apinirã mera majagũ dujapũ.

2

Espíritu Santo ãgũ yarã mera árĩnugapũ

¹ Eropii Pentecoste waĩcurinũ árĩũ erã yujuro mera árĩpehrerã yuju wihi gamenereñorã.

² Irisubure ta miruñe buriḡã ariro dopa ta umarogue busuro cariyoro. Ero eropa busuro caricũ peeñorã árĩpehrerã iri wihigue gamenere árĩrã. ³ Eropiro peame porãrigã dopa bejari erã árĩpehrerã dipu wecare dehyoayoro. Iri peame porãrigã nediru dopa bejari dehyoayoro. ⁴ Eropigũ Espíritu Santo erapũ erãre ïḡũ turarire ogũ arigũ. Eropirã Espíritu Santo erãre ïḡũ itamuropẽ erãpũ gajirã yare õaro wereniguinũgañorã.

⁵ Irinũrire Jerusalén bajarã judio masa eranirã árĩñorã. Goãmũre umupeorã erarã árĩñorã. Erã macari nũcũ majarã árĩñorã. ⁶ Eropirã umarogue busucũ peerã masa bajarã Jesu buherã pohrogue gamenere wahgãñorã. Masa nũcũ yare Jesu buherã erã wereniguicũ peeñorã. Erã eropa wereniguicũ peerã, erã pee uca wañorã.

⁷⁻⁸ —Yaho, ¿Duhpirã oã Galilea majarã árĩquererã õaro mari yare wereniguiri? Erã mari masa dehyoadirogue árĩnirã iro dopa ta wereniguirã iima, arĩñorã erãpũ. ⁹⁻¹⁰ Árĩpehrerã mari yare dohpaguere wereniguirã iima. Partia majarã, Media majarã, Elam majarã, Mesopotamia majarã, Judea majarã, Capadocia majarã, Ponto majarã, Asia majarã, Frigia majarã, Panfilia majarã, Egipto majarã, Africa majarã, Cirene majarã, Romague arirã ãhraa mari. Yujurãyeri judio masa ãhraa mari. Gajirã judio masa árĩbirã judio masa ya buheripũre buherãgue ãhraa mari. ¹¹ Creta majarã Arabia majarã sã mari mera ãhrima. Eropirã oã mari yare erã wereniguicũ peea mari. Erã mari ya

mera Goãmũ turari mera ãgũ ðaro iirare wererã iima, arĩ wereniguiñorã masa erã basi.

¹² Erã eropa arĩrã uca wañorã. Erã ãarare erã peerare ðaro masibiriñorã.

—¿Dohpárirono oã gajirã ya mera Goãmũ yare eropa ðaro wereniguiñorã mũa pepicũ? arĩ game serẽpiñorã erã erã basi.

¹³ Eropirã gajirã wereyañorã.

—¿Dohpa oã siburi ihrinijarã mererã iiri? arĩ wereyañorã gajirã erã basi.

Pedro masare werepũ

¹⁴ Eropigũ Pedro once Jesu ãgũ apinirã mera wahgãngaja, masare werepũ:

—Mũa Judea majarã, árĩpehrerã Jerusaléngue árĩrã, ire yũ werecũ ðaro peeque mũa. ¹⁵ Mũa pepiri diaye árĩbeaa. Dohpaguere nueve ãhraa. Ñmũgue ãhraa. Eropirã oã merebeama. ¹⁶ Oã Goãmũ iribojegue ãgũ werediro dopa ta iirã iima. Irire Joere Goãmũ ya weremũhtadigũre ire weredoreñumi Goãmũpũ.

¹⁷ Ojogorocũrinũ árĩcũ ðpa árĩroca: Yũhũ Espíriture masare árĩpehrerãre obeogũra.

Eropirã mũa porã Goãmũ yare wererãcoma. Eropirã mũa mera majarã mamarã Goãmũ deyoro moarire ãarãcoma. Eropirã mũa mera majarã mũrãpũ quẽrire quẽrãcoma.

¹⁸ Eropigũ yũ pohro majarãre yũ Espíriture obeogũra. Eropirã erã yahare wererãcoma.

¹⁹ Eropigũ yũ turari mera iigũca ãmũsigue. Yebague sãre yũ turari mera irire ãhmũgũca. Eropigũ di mera, peame mera, imica mera ãhmũgũca yũ turarire. ²⁰ Yũ eropiicũ abe

umũ majagu naitĩa wagucumi. Nami majagu abe diagu gũhyaro wagucumi. Ōpa waroca Cristo mũa opa ĩgu dujariburinũ, yũ arĩranũ core. Irinũ ĩha Ʃca warãca mũa. Eropiro irinũ gũhyarinũ árĩroca. ²¹ Eropiro ōpa árĩroca: Árĩpehrerã masa Cristore erã ñerire cóãdore serēnirãre ĩgu erãre peamegue wabonirãre taugucumi Goãmũ, arĩ gojañumi Joe, arĩpũ Pedro masare.

²² “Mũa Israe masa yũhũ werecũ peeque, arĩpũ daja. Jesu Nazare majagupũ Goãmũ ĩgu obeodigu árĩmi. Jesure “Goãmũ obeodigu ãhrimi,” masa erã arĩ masiboro dopa Jesu Goãmũ turari mera deyoro moarire masare ii ĩhmucũ iidi árĩmi Goãmũ Jesure. Mũa irire masia. ²³ Mũa Jesure wejēdorecũ Goãmũ iribojegue ĩgu “Eropa waroca,” ĩgu arĩdiro dopa ta eropa wahabũ. Eropirã mũa Jesure crusague wejēdorerã wiabũ ĩgure masa ñerãre. ²⁴ Goãmupũ Jesu sĩridigũre masuami. Eropigu dipaturi ne sĩrisome ĩgu. ĩgu sĩri wajabeami. Eropa ojocarinigũicãbu ãhrimi. ²⁵ Ōpa arĩñumi Davi iribojegue majagu Cristo ĩgu arĩbodiropo dopa ta:

Yũ Opũ, yũ mera ãhraa mũhũ. Umuri nucũ Goãmũ yũ Opũ yũ pohro mũhũ árĩcũ ĩamurabũ yũhũ gũibiriboro dopa. ²⁶⁻²⁷ Mũhũ Goãmũ yũ sĩporãre sĩrinirã erã árĩroguere ne cóãsome. Yũre mũ mahigure ñerogue yũ sĩporãre cóãsome mũhũ. Yũhũ mũ pohro majagu mũre umupeogu ãhraa. Yũ dupũre boadoresome mũhũ. Eropigu bũrigã mucu-

biria. Mucubiriri mera wereniguia. Eropigu mære Goãmure buringã umupeogu árĩgu güiro mariro õaro árĩcãa. ²⁸ Yure dipaturi ojocaricũ iiguca muhũ. Yũ mera muhũ árĩcũ buringã mucubiria, arĩ gojañumi Davi Cristo ĩgu arĩbodiro dopa ta, arĩpũ Pedro.

²⁹ “Acawererã, õpa õaro weregũra mære Davire mari acaweregũ mære, iribojegue majagũre, arĩnemopũ daja Pedro. ĩgu Davi sĩa wañumi. Eropigu ĩgure erã yaara gobe dohpaguere árĩnia. Eropigu “Yũ dũpũre boadoresome muhũ,” arĩ gojagũ ĩgu basi waĩpeo weregũ iibiriñumi. ³⁰⁻³¹ Iribojegue Goãmũ Davire õpa arĩñumi: “Diaye ta arĩgu iiaa. Mũ pãramerã árĩturiarã mera majagũ mũ iiro dopa ta i maca majarã weca opũ árĩgũcumi,” arĩñumi Goãmũ Davire. Davi Goãmũ yare wereyugũ árĩñumi. Eropigu Cristore Goãmũ ta opũ acuborore masigũ, Cristo ĩgu masa mũriaborore weremũhtatuhañumi Davipũ. Õpa arĩ wereñumi ĩgu: “Ĩgu sĩrinirã erã árĩroguere árĩwajosome. ĩgu dũpũ ero boasome,” arĩñumi Davi. ³² ĩre Jesucristore Goãmũ masuami. ĩgu masudigũre gũa árĩpehrerã ĩabũ. ³³ Eropigu Cristo mũarogue mari Pagũ diayepũ árĩcumi doregũ árĩgu. Eropigu ĩgu Pagũ “Espĩritu Santore yebague obeogũra,” arĩpũ ĩgure. Eropigu Cristopũ Espĩritu Santore dohpaguere obeomi gũare. Eropirã Espĩritu Santore ĩgu gũare obeorare ĩarã iiaa mũa. Eropirã mũa peeã. ³⁴ Davipũ Jesu ĩgu mũriadiro dopa ta mũaroguere mũriabiriñumi. Eropigu ĩgu ĩgu

basi õpa arĩñumi:

Goãmũ arĩmi yũ Opũre: “Ohõ yũ diayerũ doaque mãhũ. ³⁵ Eropigũ mãre ìhaturirãre mãre tarinũgabasagũra yũhũ mã pohro majarã dopa árĩmorãre,” arĩmi Goãmũ yũ Opũre, arĩ gojañumi Davi.

³⁶ “Eropirã árĩpehrerã Israe masa ire õaro masique mãa. Ihĩ Jesure mãa crusague wejẽdigũre mãa opu acuami Goãmũrũ. Ìgũre mãare taubure Cristore apiami Goãmũ, arĩ werepũ Pedro masare.

³⁷ Ìgũ eroparĩcũ peerã bũrigã bũjawere, gũirã masapũ Pedro sãre serẽpi ãañorã:

—Gũa acawererã, ¿dohpa iirãcuri gũa? arĩ serẽpi ãañorã erã.

³⁸ Erã eropa arĩ serẽpi ãacũ yũhripũ Pedro sã.

—Mãa ñero iirire bũjawererã árĩque. Õarire gohrotoque. Eropirã Jesu waĩ mera waĩyenirã árĩque mãa árĩpehrerã. Mãa eropa iicũ mãa ñerire cãdijigũcumĩ Goãmũ. Mãa eropa iicũ Espĩritu Santo mãa mera árĩgũcumĩ. Goãmũ Ìgũ Espĩritu Santore eropa ocãgũcumĩ mãare. ³⁹ Mãare, mãa porãre, mãa pãramerã árĩturiarãre yoarogue majarãre, árĩpehrerã Goãmũ mari Opũ Ìgũ beyenirãre “Diaye ta itamugũra mãare,” arĩ apiñumi Goãmũ, arĩpũ Pedro masare.

⁴⁰ Eropa arĩtuhaja baja werenemopũ Pedro. Eropigũ turaro mera werepũ erãre.

—I yeba majarãre erã ñero iira dipuwaja dipuwaja moagũcumĩ Goãmũ. Eropirã mãapũ

Goãmũ yarã árĩque. Mũa eropa árĩcũ ãũ mũare dipuwaja moasome, arĩpũ Pedro masare.

⁴¹ ãũ eroparĩcũ peerã bajarã ãũ wereniguirire õaro peeñorã. Eropigũ ãũ sã erãre waĩyepũ. Eropirã Goãmũ yarã mera majarã tres mil masa wanemoñorã. ⁴² Eropirã erã masa Cristo ãũ apinirã mera mũmuri nũcũ árĩmuriñorã. Eropirã erã buherire mũmuri nũcũ peemuriñorã. Erã barire game guere, Goãmũre serẽ, Cristo ãũ apinirã mera õaro árĩcãñorã erã.

*Jesu yarã ne árĩnũgarã erã árĩricurire werepũ
Luca*

⁴³ Eropii Goãmũ ãũ turari mera deyoro moarire ii ãhmuñorã ãũ apinirã. Erã eropa iicũ ãarã masa árĩpehrerã ãha mũca wañorã. ⁴⁴ Eropirã árĩpehrerã Jesure umupeorã gamenere, õaro árĩcãñorã. Eropirã erã yare game gueremuriñorã. ⁴⁵ Erã yare dua, árĩpehrerãre gajinore moorãre erã nũcũ omuriñorã erã. ⁴⁶ Eropirã mũmuri nũcũ erã Goãmũ wihigue gameneremuriñorã. Árĩpehrerã yujurãyeri erã wirigue yujuyeri cururi mucubiriri mera gamenere bamuriñorã. ⁴⁷ Erã eropa gamenererisubu "Goãmũ õagũ ãhrimi," arĩ umupeomuriñorã. Eropirã gajirã masa erãre gametarimuriñorã. Eropigũ mũmuri nũcũ Goãmũ gajirãre ãũ yarã wacũ iimuripũ.

3

Curimasibigũ õagũ warũ

1 Ñamicague tres árĩcũ Goãmure serērisubu árĩcũ Pedro, Ñu mera Goãmũ wihigue warã iĩnorã. Iri wihi disiporo yujungũ umũ doapũ. 2 Ëmuri nũcũ iri wihi disiporo õari disiporo waĩcũri disiporo gajirã ĩgure aĩgãri duhuboñorã. ĩgũ umũpũ ne masa dehyoagũgue ta curimasibigũ árĩpũ. Eropigũ ĩgũ iri disiporo pohro doagũ niyerure serēmũripũ iri wihire ñajarãre. 3 Eropii Pedro, Ñu iri wihigue erã ejanũgajacũ curimasibigũpũ erãre ĩha, niyerure serẽpũ. 4 Eropirã erã Pedro, Ñu mera ĩgure ĩha, Pedropũ õpa arĩpũ:

—Gũare ĩaque mũhũ, arĩpũ Pedro ĩgure.

5 ĩgũ eroparĩcũ peegũ erãre ĩha “Niyerure orãcoma yũre,” arĩ pepiripũ. 6 ĩgũ eropa arĩ pepiquerẽcũ ta Pedro ĩgure õpa arĩ werẽpũ:

—Niyerure opabeaa yũhũ. Opabiriqueregũ ta ire iigũra yũhũ mũre. Jesucristo Nazare majagũ ĩgũ turari mera curique mũhũ, arĩpũ Pedro curimasibigũre.

7 Eropa arĩgũ ta ĩgũ mojtore diayepũ maja mojtore ñeha, ĩgure tarawahgũ nugupũ. Irisubu ta curimasibigũ ĩgũ guburire, ĩgũ ñigarire turari ñajayoro. 8 Iri eropa ñajara pũhrũ ĩgũ wahgãnũgajapũ. Eropigũ ĩgũ waha buhrima mũria “Goãmũ turagũ õagũ ãhrimi,” ĩgũ arĩ mucubiridiro mera erã mera Goãmũ wihigue ñajaapũ pare. 9 ĩgũ eropa curicũ, “Goãmũ õagũ ãhrimi,” arĩ gaguiniguicũ masa árĩpehrerã ĩgure ĩañorã. 10 Eropirã masa ĩgure ĩha masiñorã. “Ihĩ iri wihi maja disiporo õari disiporo pohro ĩgũ niyerure serẽ doagũ ãhrimi,”

arĩnorã erã. Eropirã ĩgu eropa curicũ ĩarã ĩhamaria wañorã.

Pedro Goãmũ wihigue masare buhepũ

¹¹ Eropii curimasibiridigu Pedro sãre ĩgu duhubirisubu, masa árĩpehrerã ĩhamaria warã Pedro sã pohro omagã, gamenereñorã. Erã Goãmũ wihigue árĩrã Salomo waĩcũripũgue arĩnorã. ¹² Erã eropa gamenerera pũhrũ Pedropũ werepũ erãre.

—Mũa Israe masa, ¿duhpirã ĩre ĩha ucari? ¿Duhpirã guare mũa ĩhanũrũri? Gũapũ gũa ya turari mera, Goãmũre gũa umupeori mera, gũa ejatuharo ĩre curicũ iibirabũ gũa. Jesu ĩrire iiami. ¹³ Mari ñecũ sũmarã mũra Abrahã, Isaa, Jacobo mũra Goãmũre umupeomũriñorã. Erã umupeodigũpũ Goãmũpũ ĩgu magũre Jesure turagu, ðagu ĩgu árĩcũ ĩhmumũrimi. Mũa Jesure ĩhaturĩrãre ohabũ. Eropigu Pilato ĩgũre ĩgu peresugue wiudiacũ mũapũ ĩgũre ĩgu wiucũ gamebirabũ. Pilatore Jesure ohabũ mũa. ¹⁴ Pilato ĩgũre wiudiamami. Mũapũ Jesure ðagũre, ðaro iigũre gamebirã gajigũre masa wejẽdigũpũre wiudoreabũ mũa. ¹⁵ Eropirã Jesure mari ojocaricũ iigũre wejẽabũ mũa. ĩgu sĩricũ Goãmũ ĩgũre masuami. ĩgũre masudigũre gũa ĩabũ. ¹⁶ Eropirã gũa ĩgũre umupeorã aħraa. Gũa eropa umupeocũ ĩagu ĩre mũa dohpague ĩagũre mũa ĩha masigũre Jesupũ ĩgu turari mera ĩgu curicũ iiami.

¹⁷ “Yũ acawererã, mari oparã mera Jesure ðaro masibiriqererã ĩgũre wejẽabũ mũa. ĩrire masia yũhũ. ¹⁸ Iribojegue majarã Goãmũ

yare weremũhtanirã Goãmũ erãre ãgu were-doreldro dopa ta wereñuma erã sã. “Cristo ñero tarigũcuml,” arĩ wereyuñuma erã. Erã eropa arĩ wereldro dopa ta eropa wabũ dohpaguerel. ¹⁹ Eropirã dohpaguerel mũa ñero iirare bujawererã árĩque. Őaripũre gohrotoque. Cristore umupeoque. Mũa eropa iicũ mũa ñerire cãdijigũcuml Goãmũ. Eropigũ mũare mucubiririnũre apigũcuml ãgu. Eropirã õaro sñajarãca. ²⁰ Eropigũ Goãmũ Cristore ãgu beyedigũre mũare obeogũcuml daja. Cristo Jesu ta ãhrimi. ²¹ ãgu Jesu Goãmũ pohroguel árĩcuml dohpa. Iribojeguel Goãmũ ãgu yare weremũhtanirãre wereyu-doreñumil ãgu iiburire. ãgu wereldro dopa ta árĩpehrerel amugũ iicumil. ãgu amutuhajal Cristore obeogũcuml daja. ²² Moise irire weregũ õpa arĩñumil: “Mari mera majagũre mari acaw-eregũre Goãmũ yare weremũhtagũre Goãmũ mari Opũ obeogũcuml mũare. Yũre ãgu obeodro dopa ta obeogũcuml ãgu sãre. Eropirã mũare ãgu werelcũ peephecrecãrãca mũa. ²³ Őpa árĩroca. Árĩpehrerã ãgũre peebirã, ãgu dorerire iibirã ãgu cóãnirã árĩrãcoma. Goãmũ yarã mera majarã árĩsome erã,” arĩmũriñumil Moise iribojeque.

²⁴ “Árĩpehrerã Goãmũ yare weremũhtanirã nucũ, Samue ãgu pũhrũ árĩrã sã i dohpaguel warire wereyuñuma. ²⁵ Mari ñecũ sũmarãre iribojeguel majarãre “Masare õaro iigũra,” arĩ weremũriñumil. ãgu erãre wereldro dopa iimil marire dohpaguerel. Eropigũ Abrahãre ãgu arĩdro dopa ta mari sãre arĩ weregũ

iiñumi. Ōpa arĩ wereñumi Goãmũ Abrahãre: “Árĩpehleri yeba majarãre òaro iigura. Ōpa irire iigura: Mũ acaweregũ pũhrũ árĩgũpũ masare òaro iibasagũcumĩ yũre,” arĩñumi Goãmũ Abrahãre. ²⁶ Maripũre Goãmũ Jesure ïgũ magũre ïgũ masudigũre mari pohrogue obeomũhtami mari ñero iirare cóãbure. Eropa iigu ïgũ mũare òaro iiami, arĩpũ Pedro erãre.

4

Pedro, Ñu mera oparãre weretamuñorã

¹⁻³ ïgũ eropa wereniguibusu pahia, Goãmũ wihire corerã surara opũ, saduceo masa sã erãre peeñorã. Ōpa buhepũ Pedro Ñu mera masare:

—Jesu ïgũ sĩrira pũhrũ masa mũria wami. ïgũ eropa masa mũriacũ ïarã, pũhrũ mari sã ïgũ yarã mari masa mũriaborore masia mari, arĩ werepũ Pedro sã. Erã eroparĩcũ peerã, oparãpũ erã mera guañorã. Eropa guarã naimerecũ ïarã erã Pedrorẽ, gajirã Jesu apinirã sãre ñeha, peresu iiñorã. ⁴ Oparã eropa gamebiriqũrecũ ta masa bajarã Goãmũ yare Pedro sã buherire peerã “Diaye ta ãhraa,” arĩ pepiñorã erã. Eropirã Jesu yarã bajarã wañorã. Erã uma dihtare queocũ Jesure umupeorã cinco mil masa árĩñorã.

⁵ Eropii gajinũ iri maca majarã mũrã, oparã, judio masa buherã mera Jerusalengue gamenereñorã. ⁶ Eropigu pahia opũ Ana waĩcũgũ ero arĩpũ. ïgũ acawererã sã árĩñorã. Caifa, Ñu, Alejandro, gajirã mera Ana acawererã árĩñorã.

⁷ Eropirã erã Pedro sãre erãre gamebeocũ, surarapũ peresugue erãre aĩwiu oparã watopegue erãre aĩ ejañorã. Erã eropa iira pũhrũ oparã serẽpi ãañorã Pedro sãre.

—¿Noa ya turari mera mũa curimasibigure õagũ iiri? ¿Noa ãhriri mũare irire iidoregũ? arĩ serẽpi ãañorã erã.

⁸ Erã eroparĩcũ peegũ Espĩritu Santo ĩgũ ita-murire õaro opagũ werepũ Pedro erãre.

⁹ —Mũa oparã, mũa mũrã, ¿gũa curimasibigure gũa õagũ iirare serẽpi ĩarã iiri mũa gũare? ¹⁰ Ire masique mũa árĩpehrerã, Israe masa. Ire Jesucristo eropa iiami. Jesu Nazare majagũ, mũa crusague wejẽdigũ, Goãmũ masudigũ, ĩgũpũ ihĩ curimasibigure õagũ wacũ iiami. Eropirã ĩre dohpaguere mũa ĩhuro ĩgũ curicũ ĩhaa mũa. Õpa ãhraa Goãmũ yare erã gojarapũgue Cristore wereyuro: ¹¹ “Ihĩ Cristo utãye iro dopa ta Goãmũ beyedigũ ãhrimi. ĩgũ Goãmũ beyedigũ árĩquerecũ masa ĩgũre gamesome. ĩgũre erã gamebiriquerecũ Goãmũ ĩgũre opũ acuami árĩpehrerãre dorebure,” arĩ gojañumi iribojegue. ¹² Ne gajigũ masare peamegue wabonirãre taugũ ne marimi. I yebaguere Jesu dihta masare taugũ ãhrimi. Ne gajirã ĩgũ iro dopa árĩrã ne marima, arĩ werepũ Pedro erãre.

¹³ ĩgũ eropa arĩ werera pũhrũ, Pedro Ñu mera buheya marirã erã arĩcũ ĩarã, gũiro mariro erã buhecũ ĩarã, mũrã, oparã, judio masa buherã mera pee uca wañorã. Eropirã Jesu iro dopa erã buhecũ ĩarã, õpa pepiñorã erã. “Pedro, Ñu

sã diaye ta Jesu mera majarã ta ãhrima oã,” arĩ pepiñorã erã. ¹⁴ Eropigũ curimasibiridigũ Pedro sã mera árĩpũ. Ígũ, ígũ õagũ árĩcũ ãañorã mũrã, oparã, judio masa buherã mera. Eropirã erã Pedro sãre “Ñero iirã iiaa,” arĩ weresãmasibiriñorã. ¹⁵ Eropa weresãmasibirã oparã erã gamenereri taribugue árĩrãre Pedro sãre wiriadoreñorã. ¹⁶ Erã wiriara pũhrũ erã basi weretamuñorã.

—¿Oãre dohpa iirãcuri mari? arĩ wereniguñorã erã.

Õpa arĩ wereniguñemoñorã:

—Pedro, Ñũ mera Goãmũ turari mera curimasibigũre curicũ iinirã ãhrama. Eropirã Jerusalén majarã árĩpehrerã erã eropa õaro iirare masiama. Eropirã maripũ “Eropa iibirama erã,” arĩmasibea mari. ¹⁷ Eropirã Jesu ígũ buherare gajirãre buhedorebircãrã erãre gajirã erã buherire gameri arĩrã, arĩ wereniguñorã erã erã basi.

¹⁸ Eropa arĩ wereniguituha Pedro sãre sihubeo õpa arĩñorã:

—Jesu ígũ buherare ne buhebircãque gajirãre. Irire ne wereniguibircãque, arĩriñorã erãre.

¹⁹ Erã eroparĩcũ peerã Pedro Ñũ mera õpa arĩñorã erãre:

—Mũa õpa arĩcũ mũare yũhrirã Goãmũpũre tarinũgãrã iiboca gũa. ¿Nihi yapũre gũa werecũ gahmeri mũa? ¿Mũa yapũre gũa iicũ gahmeri mũa? ¿Goãmũ yapũre gũa iicũ gahmeri mũa? ²⁰ Gũapũre gũa ãarare, gũa peerare gũare

yayasāma masiya mara masare, arī yuħripu Pedro Ñu mera.

²¹ Erā eroparīcū peerā oparāpu dipaturi doreriñorā daja erāre.

—Jesu ĩgu buherare mua buherā ñero tarirāca mua, arīriñorā oparā erāre.

Erāre “Ñu, Pedro mera ñero iirā iima,” arīmasibiriñorā erā. Eropirā masapu curimasibiridigu ĩgu oagū wacū ĩarā, “Goāmū diaye ta oagū āħrimi,” arīñorā masa. Erā eroparīcū peerā oparāpu Pedro sāre dipuwaja moamasibiri, erāre wiuñorā. ²² Curimasibigu oagū erā iidigu cuarenta bojori opagu árīpu.

Jesu yarā erā güibiriburire serēñorā Goāmure

²³ Eropii, Pedro Ñu mera erā mera majarā pohrogue eja, pahia oparā, mūrā erāre erā arīrare wereñorā. ²⁴ Erā eroparīcū peerā erā árīpehrerā yujuro mera mari Pagure Goāmure serēñorā.

—Gua Opū, mūhu umarore, yebare, diarire iigu, árīpehrerāre ojocaricū iigu āħraa mūhu.

²⁵ Mū Espíritu Santo gua ñecure Davi mūrure mū pohro majagure opa weredoreyoro mū arīdiro dopa ta:

¿Duhpirā judio masa árībirā guari? Pee masibirā āħrima masa. ²⁶ Baja macari majarā oparā gamenere, mari Opū Goāmure, ĩgu opu acudigu Cristo sāre ĩhaturi, ñero iidiana erā, arī weredoreyoro mūhu Davire iribojegure.

²⁷ Eropa ta āħraa, arī serēnemoñorā Goāmure. I macare Herode, Poncio Pilato, judio masa árībirā, judio masa mera mū beyedigure

Jesure ðagũ mũ pohro majagũre wejẽdia gamenereama. ²⁸ Irisubu mũ gamediro dopa ta “Eropa waroca,” mũ arĩdiro dopa ta iiama erã. Mũ masiri mera eropa wereyoro mũhũ. ²⁹ Eropigũ, gũa Opũ, erã gũare “Mũa buheri waja ñero tarirãca,” erã arĩrare guñaque mũhũ. Gũare itamuque. Eropigũ gũare mũ pohro majarãre gũiro mariro mũ buherire weredoreque gũare. ³⁰ Mũhũ mũ turari mera dorecũrãre ðarã iique. Eropigũ mũ buherire gũiro mariro werecũ iique gũare. Eropigũ mũ deyoro moarare Jesu mũ pohro majagũ ãgũ turari mera ii ãhmudoreque gũare. Eropigũ dorecũrãre ðarã gũa wadorecũ mũ turari mera itamuque gũare, arĩ serẽñorã erã mari Pagũre.

³¹ Erã eropa arĩ serẽra pũhrũ, erã gamenereri wihi ñohmemaa wayoro. Ero eropa ñohmecũ ta Espĩritu Santo ãgũ turari mera guñaturarã wacũ iipũ erãre. Eropa warã, Espĩritu Santo ãgũ dorediro dopa ta iĩñorã. Gũiro mariro Goãmũ yare wereñorã erã.

Jesu yarã erã yare dũca wañorã

³²⁻³³ Eropirã Goãmũ ãgũ turari mera erã Jesu ãgũ apinirã ðpa arĩ wereñorã masare: Jesure Goãmũ masudigũre gũa ãabũ, arĩ wereñorã erã masare. Eropigũ Goãmũ erã árĩpehrerãre ðaro itamumũripũ. Eropirã Jesure umupeorã bajarã árĩñorã. Erã yujuropa ta pepirã árĩmũriñorã. Eropirã erã erã yare erã doberire “Yaha dihta ãhraa,” ne arĩbiriñorã. Erã árĩpehrerã erã yare gajinore moorãre erã mera majarãre dũca

wamuriñorã. ³⁴ Eropirã erã mera majarã mo-jomorocarã marimuriñorã. Erã mera majarã yeba oparã, wiri oparã erã yare duamuriñorã. ³⁵ Eropa duarã erã wajasearare erã aigãri, Jesu igu apinirãre omuriñorã. Eropirã erãpu irire erã mera majarãre dũca wamuriñorã. Áripehrerã opabirãre dũca wañorã. ³⁶ Irisubure yujugu erã mera majagu José waicugu arĩpu. Jesu igu apinirã Josere Bernabé waieñorã. Igu waĩ Bernabé “Masare mucubiricũ iigu ahrimi,” arĩma Griego ya mera. Igu Leví ya curu majagu Chipre nuguro majagu arĩpu. ³⁷ Eropigu igu poeri opagu arĩgu irire duapu. Eropigu igu wajasearare Jesu igu apinirãre opu igu gajirãre gueredoregu.

5

Ananía igu marapo Safira mera guyarũ

¹ Gajirã sã Bernabé iro dopa iimuririñorã. Erã Ananía waicugu, igu marapo Safira waicugo arĩñorã. Eropigu Ananía erã ya poerire duapu igu. ² Eropa duaqueregu ta igu wajasearare igu basi aĩpu. Igu marapo sã igu eropa iirare masipo. Eropigu erã wajasea dũharare aigãri, Jesu igu apinirãre opu Ananíapu. Eropa ogu, “Opehogu iiaa,” arĩripu igu. ³ Igu eropa iicũ iagu Pedro igure werepu.

—Ananía, watĩ mure guyadorecũ muhu guyabu Espiritu Santore. Eropigu mua ya poerire dua, mu wajasearare mu basi aĩbu ahrabu muhu. ⁴ Mu duaboro core mua ya poeri arĩribu. Eropiro mu duara puhru mu ya wajatari

ta ãhrabu. ¿Eropigu dohpa árironore eropa guyari mũhu? Mũhu gũa dihtare guyabeaa. Goãmũ sãre guyabu mũhu, arĩpu Pedro ïgure.

⁵ Ìgu eroparĩcũ peegu ta, Ananíapu mehmereja, sĩria wapu. Eropirã árĩpehrerã ïgu eropa warare masirã, buriã gũĩñorã. ⁶ Ìgu sĩrira pũru mamarã ahri, ïgu dũpũre suhri mera oma, disiporogue aĩgã, yaañorã ïgure.

⁷ Eropii uhre hora pũru Ananía mũru marapo ïgu sĩrirare masibigo Pedro pohrogue ñajapo.

⁸ Eropigu Pedro igore õpa arĩpu:

—¿Mũa ya poerire duanijarã dipẽ wajatari mũa? arĩpu ïgu. Eropigo igo igo marapu mũru ïgu arĩrañepẽ ta, “Iripẽta wajatabu gũa,” arĩ wereripo igo sã. ⁹ Eropigu Pedro igore wereru:

—¿Duhpirã mũa yujuro mera Goãmũ Espĩrigure gũa ïhadiari mũa? Peeque dohpaguere. Mũ marapu mũrũre yaanirã ta ahrima daja. Mũ sãre mũ dũpũre aĩrã ahrima, arĩpu Pedro.

¹⁰ Ìgu eropa arĩ wereru ta igo mehmereja, sĩria wapo. Eropirã mamarã iri wihire ñajarã, igo ya dũpu mũrarore aĩ wiria wañorã. Aĩgã, igo marapu mũru dipaba yaañorã. ¹¹ Eropirã Jesu yarã árĩpehrerã gajirã irire peerã sã, gũitariacãñorã.

Jesu ïgu apinirã Goãmũ turari mera ii ïhmuñorã

¹² Eropirã masa watope Jesu ïgu apinirã bajasuburi Goãmũ turari mera deyoro moarire ii ïhmumũriñorã. Eropirã erã Salomo waĩcũri taribugue õari taribugue gameneremũriñorã.

13 Eropirã gajirã erãre güirã, erã pohrogue wabiriñorã. Eropa güiquererã erãre Jesu ïgu apinirãre, “Ōarã ährima oã,” arĩñorã masa. 14 Eropirã ıma, nome bajarã Jesure umupeonugañorã. 15 Eropirã erã dorecũrãre aĩgãri, omasiariñe mera pũtãpi apigãñorã Pedro waburi mague erãre. Eropirã dorecũrãre ōarã wacũ gamerã Pedro erãre ïgu ñapeocũ gameñorã erã aĩgãñirãpũ. Erãre ïgu ñapeobiricũ Pedro erã weca ïgu watĩ merejariñe dihtare gameñorã erã. Iri dihtare gameñorã erã erã ōarã waboro dopa. 16 Eropirã Jerusalén pohro árĩri macari majarã sã, dorecũrãre, watẽa ñajasũnirã sãre aĩgãriñorã. Eropirã erã árĩpehrerã erã dupũ ōaro wañorã.

Oparãpũ Jesu ïgu apinirãre ñero iidoreñorã

17 ïgu eropa iicũ ïarã pahia opũ, ïgu mera majarã mera Pedro sãre peyocũpũ. Pahia opũ mera majarã saduceo masa árĩñorã. 18 Pedro sã iirare peerã erã guatarirã Jesu ïgu apinirãre ñehadore, peresu iĩñorã. 19 Eropiira pũhrũ iri ñami ta Goãmũ ïgu anyu pãgũpũ erãre peresugue árĩrãre. Tuhajanugu erãre wiriridore ōpa arĩ werepũ anyu:

20 —Goãmũ wihigue waque. Iri wihigue árĩrã Goãmũ masare ïgu taiburire, iri ōari buherire wereque masare, arĩpũ anyu erãre.

21 ïgu eroparĩcũ peerã ñamigã ñari Goãmũ ya wihigue ñaja, masare buheñorã erã.

Irinũ ta pahia opũ, ïgu mera majarã, Is-rae masa oparã mera gamenere, Jesu ïgu apinirãre peresugue árĩrãre aĩgãridoreripũ surara

oparãre. ²² Eropirã surara oparã pere-sugue doarãpære aĩgãrirã wariñorã. Erãre bocabiriñorã. Bocabiri dujaa wañorã daja. ²³ Dujaja wereñorã erã oparãre.

—Peresugue áriri disiporori bihara disiporori ãhrabũ. Eropirã erã iri disiporori pohro peresu iinirãre corerã niguiama. Eropa íabũ gũa. Eropirã gũa disiporore pãgũcũ, masa marabũ, arĩ wereñorã erã.

²⁴ Erã eroparĩcũ peerã, surara Goãmũ wihire corenirã opũ, pahia oparã mera irire pee uca wa, “¿Dohpa waha ojogorocurãcuri erã eropa iirã?” arĩ pepiñorã erã. ²⁵ Eropigũ erã pohroque gajigũ ahri, erãre werepũ.

—Mũa peresu iinirã Goãmũ wihigue ãhrama. Íarã waque bu. Iri wihigue masare buherã iinama erã, arĩ werepũ.

²⁶ Ígũ eroparĩcũ pee, surara opũ, ígũ surara mera waha, Jesu ígũ apinirãre dipaturi ñeagãriñorã daja. Eropa ñearã erãre surara turibiriñorã. Eropirã erãre pabonirã árĩquererã, masare güirã pabiriñorã erãre. “Oãre mari pacũ gajirã masapũ utã mera dearãcoma marire,” arĩ pepiñorã erã surarapũ. ²⁷ Eropirã erãre aĩgãri, oparã core duhudoboñorã erãre. Erã eropa aĩ eraa dobocũ pahia opũ erãre turipũ.

²⁸ —Mũare gũa weretuhabũ. Jesu yare buhe-biricãque, arĩrabũ gũa mũare. Gũa eropa arĩquerecũ ta mũapũ árĩpehrerã Jerusalén majarãre buhea mũa. Jesu ígũ sĩrira waja, gũare dipuwajacũcũ iidiarã iica mũa, arĩpũ pahia opũ.

²⁹ Īḡu eroparīcũ peegu Pedropu gajirã Jesu ĩḡu apinirã mera yuħripu.

—Goãmu ĩḡu dorerapure iimũhtarãra. Eropirã puħru Goãmu gamecũ masa erã dorerire iirãra. ³⁰ Goãmu mari acawererã iribojegue majarã opu Jesure masudi árĩmi. Īḡu ta aħrimi mua crusague pabia wejẽdigu. ³¹ Jesure masura puħru Goãmu ĩḡure “Ōagu aħrimi,” arĩ, ĩḡu diayepu doadoremi Jesure ĩḡu Pagupu. Eropigu Jesu masa opu, masare masugu árĩḡu, Israe masare erã ñeri iirare bujawererã árĩdoregu, erã ñerire cóãdiami Jesu. ³² Eropirã guapu Jesu ĩḡu iirare ïanirã árĩrã irire werea gua. Espĩritu Santo irire ĩħmugu árĩḡu weremi ĩḡu sã. Īḡure Espĩritu Santore Goãmu oboami. Árĩpehrerã Goãmu dorerire iirãre ĩḡu Espĩritu Santore ohomi, arĩ werepu erãre.

³³ Īḡu eroparīcũ peerã oparãpu guatari-acãñorã. Eropirã erã Jesu ĩḡu apinirãre wejẽdiariñorã. ³⁴ Irisubure erore Gamalie fariseo masu ero árĩḡu erãre wejẽdoregu iibiripu. Īḡu oparã mera majagu, dorerire buhegu ĩḡu árĩcũ, masa erã umupeogu árĩpu. Eropigu Īḡu Jesu ĩḡu apinirãre merogã core-doregu gajipugue erãre aĩḡãdorepu surarare. ³⁵ Erã eropa aĩḡãra puħru ĩḡupu werepu masare.

—Mua Israe masa, oãre mua iiburire õaro pepique muague wejẽri arĩrã. ³⁶ Guñaque Teuda murure. Īḡu, ĩḡu basi “Masare tarinugagu aħraa yuħu,” arĩmi masare. Eropirã masa bajarã cuatrocientos masa ĩḡu mera majarã dujama.

Eropirã gajirãpũ ãgũre wejẽnirã árĩma. Ìgũ sĩricũ ãha ãgũ buherire buhenirãpũ wasiria wanirã árĩma. Eropirã erã dohpaguere marima. ³⁷ Pũhrũ masare erã queorisubu árĩcũ Galilea majagũ Juda waĩcũgũ masare ãgũ buhecũ ãgũ mera masa bajarã dujama. Ìgũ sã sĩria wadi árĩmi. Eropii ãgũ yarã árĩpehrerã wasiria wanirã árĩma erã sã. ³⁸ Eroparĩgũ dohpaguere mũare ire arĩgũ iiaa. Eropa ãacãque oãre Jesu yare wererãre. Eropii i buheri oã erã ya buheri Goãmũ ya buheri árĩbiro, pehrea waroca. ³⁹ Goãmũ ya buheripũ árĩro, ne pehresome. I buheri Goãmũ ya árĩcũ ne ire ne dederecũ iima-sibea mũa. Mũa ire dederecũ iidiarã Goãmũ mera gamequeãrã iiboca mũa, arĩpũ Gamalie erãre.

Ìgũ eropa arĩ werecũ peerã, “Diaye ta ãhraa,” arĩ, peeñorã oparã. ⁴⁰ Eropirã erã Jesu apinirãre sihubeo, erã eracũ ãarã erãre tãrañorã. “Jesu yare buhebircãque mũa,” arĩtuhaja, erãre wadoreñorã.

⁴¹ Eropa wadorecũ peerã erã oparã pohrogue árĩnirã waha wañorã. Jesu ya árĩburire ñero tarirã bũrigã mucubiriñorã Jesu ãgũ apinirã.

⁴² Eropirã umũri nũcũ erã ya wirigue, Goãmũ wi-higue sãre Jesucristo yare buhe weremariñorã erã.

6

Siete itamumorãre beyeñorã Jesu yarã

¹ Irinũrire Jesure umupeorã bajarã wañorã. Eropirã griego masa judio masa mera game-turiñorã erã Jesu yarã dihta árĩquererã. Griego

masa wapeweyarã nomere umuri nucu erã barire ãaro erã guerebircũ ãarã judio masare turiñorã. ² Eropirã Jesu ãgu apinirã, docepu Jesure umupeorãre árĩpehrerãre erã pohroge sihubeo, õpa arĩ wereñorã:

—Gua Goãmũ yare buherã ãhraa gua. Barire gueremorãno árĩbeaa gua. ³ Eropirã maa gua acawererã, siete umare, gajirã “Õarã,” erã arĩrãre, Espĩritu Santo oparãre amaque. Erãpũre barire gueredoreque maa. ⁴ Eropirã guapũ umuri nucu Goãmũre serẽ Goãmũ yare buherãca, arĩñorã Jesu apinirã erã Jesure umupeorãre.

⁵ Erã eroparĩcũ peerã, “Áũ, eropa ta iirã,” arĩñorã erã árĩpehrerã Jesure umupeorã. Eropirã Estebanre Cristore umupeogũre, Espĩritu Santo turarire wũaro opagũre beyeñorã erã. Gajirã sãre beyeñorã. Felipe, Prócorore, Nicanore, Timore, Parmenare, Nicolare bari gueremorãre beyeñorã erã. Nicolapũ judio masũ árĩbigũ Antioquía majagũ judio masa buherire gamegũ erã mera ñajadigũ árĩpũ. ⁶ Erã beyenirãre Jesu ãgu apinirã pohro aĩ erañorã gajirã Jesu yarãpũ. Erã eropa aĩ eracũ ãarã erã Goãmũre serẽbasañorã. Eropirã erã beyenirã weca erã mojotorire duhpeoñorã Goãmũ turarire orã.

⁷ Eropirã iri yeba majarã Goãmũ yare masipehrenijarã iĩñorã. Eropirã Jerusalengue árĩrã Jesure umupeorã bajarã wanemoñorã daja. Eropirã pahia sã bajarã Jesu yarã wañorã.

Gajirã Estebanre ñeañorã

8 Eropigu Esteban Goãmũ turarire opagu árĩpu. Īgu Goãmũ ðaro iigu árĩpu. Eropigu ĩgu Goãmũ turari mera deyoro moarire ii ĩhmupũ masa erã ĩaro. 9 Judio masa erã buheri wihi majarã ĩgure ĩhaturiñorã. Eropirã ĩgu mera game dũyasonũgañorã. Erã Liberto waĩcũrã árĩñorã. Eropirã erã Cirene majarã, Alejandría majarã, Cilicia majarã, Asia majarã mera bajarã árĩñorã erã Esteban mera dũyatorã. 10 Esteban masigu dopa ta, Espĩritu Santore wũaro opagu ta ĩgu wereniguicũ peerã erã yujuro bojebiriñorã ĩgure. 11 Eropa yujuro bojebirã erã gajirãre ahma gũyadore, wajayeñorã erãre. Erã eropa gũyadorecũ òpa arĩ weresãñorã erã Estebanre:

—Īhĩ Goãmũre ĩgu ñero wereniguicũ, Moiserẽ ĩgu ñero wereniguicũ sãre gũa peeabũ, arĩ weresãriñorã erã gũyarãpu gajirãre.

12 Erã eroparĩcũ peerã masa, judio masa buherã, mũrã sã ĩgu mera gũañorã. Eropirã erã Estebanre ñeha erã oparã pohro aĩgãñorã ĩgure. 13-14 Eropirã erã gajirãre gũyanemodoreñorã. Òpa arĩñorã erãpu:

—Īhĩ mũmũri nũcũ Goãmũ wihire, ĩgu doreri sãre ñero wereniguigu ãhrimi. Peeabũ gũa ĩgure ĩgu òpa arĩcũ. “Jesu Nazare majagu Goãmũ wihire cóãgũcumi. Eropigu ĩgu Moise dorerare marire ĩgu wererare gohrotogũcumi Jesu,” arãmi Esteban gũa peecũ, arĩ gũya weresãriñorã erã. 15 Eropirã árĩpehrerã ero doarã Estebanre ðaro ĩhamehtu, ĩgu diapore ĩañorã erã. Anyu iro dopa deyoyoro ĩgu diapo.

7

Esteban Jesu yare werepũ

¹ Eropii pahia opũ serẽpipũ Estebanre.

—¿Oã erã arĩri diaye ta áhriri? arĩ serẽpipũ ïgũ Estebanre. ² ïgũ eroparĩcũ peegũ, Estebanpũ erãre õpa arĩ werepũ:

—Acawererã, murã, gũa pagũ sumarã, peeque. Abrahã mari ñecũ murũ iribojegue majagũ Mesopotamiague ïgũ árĩcũ, Harángue ïgũ árĩboro core, Goãmũ turagũ gosesiriro dopa ïgũre Abrahãre dehyoañumi. ³ Eropa dehyoagũ Goãmũ wereñumi ïgũre. “Mũ ya yebare mũ acawererã mera árĩbiricãque. Eropigũ gajĩ yebague waque. Mũ eropa wacũ mũre ïri yebare ïhmugũra yũhũ,” arĩpũ Goãmũ Abrahãre. ⁴ ïgũ eroparĩcũ peegũ Abrahã sã Caldea majarã ya yeba árĩrã wañuma. Pũ Harángue ejañuma. Eroque eja árĩñuma. Eropigũ ïgũ pagũ ïgũ sĩrira pũhrũ i yeba dohpague mũa árĩri yeba Goãmũ ta árĩdoreñumi Abrahãre. ⁵ ïgũre eropa árĩdorequeregũ Goãmũ Abrahã ïgũ árĩri yebare õaro gohra apibirimuriniñumi ïgũre. Ne merogã apibiriniñumi. Eropigũ Abrahã ïgũ porã marigũ árĩquerecũ ta Goãmupũ ïgũre õpa arĩ wereñumi. “Mũre mũ pãramerã gajĩ turi majarãguere i yebare ogũra,” arĩñumi Goãmũ Abrahãre. ⁶ Eropa arĩgũ ta õpa arĩ werenemoñumi Goãmũ Abrahãre. “Mũ pãramerã gajĩ turi majarãgue gajĩ yebague waha, erogue gajirã pohro árĩrã erã pohro majarã árĩrãcoma erã. Eropirã cuatrocientos bojori gohra ero majarã ñero iirãcoma mũ

pāramerã árĩturiarãguere. ⁷ Eropigu ero majarãre erã eropa iira waja dipuwaja moagura yuhũ. Yuhũ eropiira pũhrũ mã pāramerã i yeba erarãcoma daja. Eropirã i yeba yũ dorerire iirãcoma erã,” arĩñumi Goãmũ Abrahãre. ⁸ Eropa arĩgu Goãmũ “Yũ arĩdiro dopa ta iigura,” arĩgu Abrahã ïgu guñaburire õpa apiñumi ïgure. Merogã gasirogãre ïgu dũpũre wiri aĩdoreñumi ïgure, ïgu eropa arĩ wereraguere guñadoregũ. Eropiira pũhrũ Abrahã Isaare porãcũñumi. Ocho nũri pũhrũ merogã gasirogãre wiri aĩñumi Isaa dũpũ sãre. Pũhrũ Isaa Jacobore ïgu porãcura pũhrũ wiri aĩñumi ïgu dũpũ sãre. Eropigu Jacobo doce gohra porãcũñumi. Erã docepũ mari cururi nũcũ oparãgue árĩmũriñuma.

⁹ “Eropirã erã Jacobo porã mari ñecũ sumarã mũra Josere erã pagũ magure peyocũmũriñuma. ïgure cohã, duacãñuma Egiptogue warãre. Eropigu Josere Goãmũ itamumũriñumi. ¹⁰ ïgu ñero taricũ ïagu Goãmũ ïgure itamumũriñumi. ïgu eropa itamucũ Josepũ õaro pee masigu wañumi. Eropigu faraõ Egipto majagu opũpũ Josere ïgu gamecũ iĩñumi Goãmũpũ. ïgu eropiicũ faraõpũ Josere Egipto majagu opũ, ïgu ya wihi majagu opũ apiñumi.

¹¹ “Eropii irisubure ta Egiptogue, Canaa waĩcũri yeba sã ne deco aribiriyoro. Eropirã ero majarã ñero tariñuma. Eropirã Canaague árĩrã Jacobo porã mari ñecũ sumarã mũra bari bocabirimũriñuma. ¹² Eropigu Egiptogue trigo árĩcũ peegu, Jacobo ïgu porãre erogue

bari asũdoregũ ne obeogũ iĩñumi. ¹³ Pũhrũ Egiptogue erã ejacũ José ĩgũ tĩrãre wereñumi. “Mũa pagũ magũ ta ãhraa yũhũ,” arĩñumi erãre. Eropigũ José acawererãre ne ĩagũ iĩñumi opũ faraõ waĩcũgũ. ¹⁴ Pũhrũ José ĩgũ tĩrãre erã pagũ Jacobore sihudoregũ obeoñumi. ĩgũ acawererã setenta y cinco masa árĩñuma irisubu. ¹⁵ ĩgũ magũ ĩgũ sihubeocũ peegũ Jacobo Egiptogue wañumi ĩgũ magũ pohroque. ĩgũ magũ pohro ãhri, pũhrũ sĩria wañumi pare. Eropirã ĩgũ porã mari ñecũ sũmarã mũra erogue sĩripehrea wañuma erã sã. ¹⁶ Eropirã Siquẽ waĩcũri yebague erã dũpũre aĩ, masa goberĩgue seatuha yaañuma erã dũpũre. Abrahã ĩgũ asũra yebague árĩyoro iri yeba erãre yaara yeba. Ero core Abrahã iri yebare Hamor porãre asũyuñumi niyeru mera.

¹⁷ Eropigũ Goãmũ Abrahãre “I yebare ogũra mũre,” arĩmũriñumi. “Iri yebare ogũra,” ĩgũ arĩrasubu ejacũ Abrahã pãramerã Israe masa bajarã masa wañuma. Egiptogue árĩñuma. ¹⁸ Egipto yeba erã árĩnicũ, gajigũ opũ ñajañumi. Eropigũ ĩgũ opũpũ José mũrũre masibiriñumi. ¹⁹ Eropigũ ĩgũ mari acawererãre ñero iidia, erã porãre wejẽdia, erã porãre wejẽ cóãcãdoreñumi erãre. Eropigũ mari ñecũ sũmarãre ñero iĩñumi opũ faraõpũ. ²⁰ ĩgũ eropiirisubu Moise árĩburũ masa dehyoañumi. ĩgũ õagũ, Goãmũ õaro ĩhasũagũ arĩmũriñumi. Eropirã ĩgũ pagũ sũmarã mũrerã abe gohra õaro ĩhadibuñuma ĩgũgãre. ²¹ Moisere dibunemomasibiricũ ĩgũre erã cóãra pũhrũ opũ mago ĩgũre boca aĩ majaa,

igo magu iro dopa ta dibuñumo ñgure. ²² Eropirã Egipto majarã ðaro masirã yare buheñuma Moiserere. Eropigu güiro mariro wereniguigu opa iro dopa iigu áriñumi Moise.

²³ “Eropigu Moise cuarenta bojori ñgu opaboro core ñgu acawererãre Israe masare ñadiagu erã pohrogue curigu wañumi. ²⁴ Eropa curigu ejagu Egipto majagu Moise acaweregure ñgu ñero iicũ Moise ñañumi. Eropa ñagu ñgu acaweregure itamuñumi Moise. Ñgu acaweregure itamugu Egipto majagupure pa wejēcãñumi ñgu. ²⁵ Eropirgu Moise ðpa arĩ pepiriñumi. Yu acawererã erã acaweregure yu itamucũ ñarã, ‘Goãmũ marire ðaro taricũ iidoregu oboñumi ñre,’ yu acawererã yure arĩ pepirãcoma,” arĩ pepiriñumi Moise. Erãpu ne eropa pepibiriñuma. ²⁶ Gajinu Moise ñgu acawererãre perã erã basi gamequeãrãre ñapu. Eropigu ñgu erãre bosariñumi. “¿Mũa basi áriquererã gamequeãri mũa?” arĩñumi Moise erãre. ²⁷ Ñgu eroparicũ peegu yujugu ñgu acaweregure ñero iigu Moiserere tũbeoñumi. “Mũhu guã opa áribeaa. Guare doregu áribeaa mũhu. ²⁸ ¿Carũre Egipto majagure mũ wejēdiro dopa ta yu sãre wejēdiagu iiri mũhu?” arĩñumi ñgu Moiserere. ²⁹ Ñgu eroparicũ pee uca wa Moise oma duhrigã waha wapũ. Madián waicuri yebague waha wañumi. Erogue nomeore boca perã porãcũñumi.

³⁰ “Eropii Moise cuarenta bojori gohra ero ñgu áriira puhru Sinai waicudigu utãgu pohro masa marirogue ñgu áricũ anyu ñgure dehyoañumi.

³¹ Eropa irigugã ñjucũ ñagu Moise ñha uca

wañumi. Iri peamere pohrogã õaro ïgu ïagu wacũ gohra Goãmũ ïgure wereñumi. ³² “Goãmũ ãhraa yũhũ. Mũ ñecũ sũmarã, Abrahã, Isaa, Jacobo erã Goãmũ ãhraa yũhũ,” arĩñumi Goãmũ Moisere. ïgu eroparĩcũ peegu Moisepu naragãñumi. Ne ïha wahgũbiriñumi. ³³ Eropigu Goãmũ wereñumi ïgure. “Dohparagã yũ pohro nigũgu iiaa mũhũ. Eropigu gũhyadiaro mera mũ zapature tuweaque. ³⁴ Yaharã masa Egiptogue erã ñero taricũ ïabũ. Erã sĩwererire peeabũ. Eropigu erãre itamugũ ahrabũ. Erã eropa wacũ ïagu waque mũ sã. Egiptogue mũre obeogura erãre itamudoregũ,” arĩñumi Goãmũ Moisere.

³⁵ “Erãpu mari acawererã Israe masa Moisere gamebirituhajañuma. “Mũhũ gũa opu árĩbeaa. Mũhũ gũare doregũ árĩbeaa,” Moisere eropa arĩrã gamebirã iituhajañuma. Eropa erã Moisere gamebiriqerrecũ Goãmũ ïgure Egiptogue obeoñumi mari acawererãre, Israe masare itamubure, erãre dorebure. ïgu eropa obeogu anyupũre ïgure yucũgũgue dehyoadigũre itamudoreñumi ïgure. ³⁶ Moise ta mari acawererãre Israe masare Egiptogue árĩrãre wiudigu arĩñumi. Eropigu Egiptogue eja, ihĩ Moise Goãmũ turari mera ii ïhmunũgañumi. Eropigu wũariya diariyague eropa ta iĩñumi daja. Pũhrũguere masa marirogue sãre cuarenta bojori gohra Goãmũ turari mera deyoro moarire ii ïhmunũriñumi ïgu erãre. ³⁷ Ihĩ Moisepu mari acawererãre Israe masare weremũriñumi. “Yũ iro dopa ta Goãmũ yare weremũhtabure Goãmũ obeogũcumĩ. Eropigu ïgu mũa mera majagu

m̄a acawereḡu árĩḡucumi. Īḡu eropa eracũ ĩḡure ðaro peeque m̄a,” arĩm̄uriñumi Moise erãre. ³⁸ Moise masa mariogue mari acawererã Israe masa mera árĩm̄uriñumi. Eropiḡu mari ñecu s̄umarã iribojegue majarã mera árĩñumi ĩḡu. Eropu árĩḡu Sinaí waĩc̄diḡu utãḡugue ĩḡure werediḡu anyu mera árĩñumi. Eroque Goãm̄u ĩḡu dorerire aĩdiḡu árĩñumi Moise.

³⁹⁻⁴⁰ “Iri dorerire utãḡugue Moise waha aĩrisubu mari ñecu s̄umarã m̄ura Egiptogue dujadarã Moisere tarin̄ugañuma. Erã ĩḡure gamebiriñuma. Eropu gamebirã Aarõre Moise tĩḡure õpa arĩñuma: “¿Īḡu Moise marire Egiptogue aĩḡaridi dohpa wayuri ĩḡu? Masibirica mari. Eropiḡu goãmarã wéanirãre iique mari yarã árĩmorã. Eropirã m̄u wéanirã marire doreri mari wadiari maha marire aĩḡarãcoma,” arĩñuma erã. ⁴¹ Eropu arĩra p̄hr̄u erã wec̄ure oro mera wéañuma. Eropu iituhaja, erã waim̄urãre wejẽ, erã wéadiḡu pohro aĩḡari umupeoñuma ĩḡure. Eropirã erã erã iidiḡure wec̄ure ĩarã, mucubiri, bosenu iĩñuma. ⁴² Eropiḡu Goãm̄u erã wéadiḡure erã umupeocũ ĩaḡu, erãre cóac̄ariñumi. “Erã yure cóarã gajirã umaro majarãp̄re umupeo curaporo,” arĩḡu cohãḡa wariñumi. Goãm̄u yare werem̄htanirã õpa arĩ gojañuma Goãm̄u wereniḡuire:

M̄a Israe masa, yure ñe ñero iiab̄u. Masa mariogue cuarenta bojori gohra arĩrã waim̄urãre m̄a wejẽnirãre m̄a soenirãre yure m̄a obodiro dopa ta umupeorab̄u m̄a. Eropirã yur̄re umupeobirab̄u m̄a.

⁴³ Eropirã mua Molo waĩcũgure umupeorã árĩrã, ĩgure umupeori wihire iiabũ mua. Eropirã “Refa gua goãmũ áhrimi,” arĩrã ĩgu necãmũ mua wéadĩgure mua umupeoabũ daja. Erã wéanirãre mua iinirãre mua umupeoabũ. Mua eropa iira waja mũare Babilonia sipũgue cóãbeogũra yũhũ, arĩñumi Goãmũ ĩgu ya weremũhtanirã mera.

⁴⁴ “Eropirã masa marirogue Goãmũ masa mera ĩgu árĩri wihire waimurã gasiri wihire opamuriñuma mari ñecũ sũmarã iribojegue majarã. Iri wihi Goãmũ masa mera ĩgu wereniguirĩ wihi árĩyoro. Iri wihigue Goãmũ dorerire ĩgu gojara mijiri utã mijiri árĩyoro. Iri wihire Goãmũ ĩgu werediro dopa ta Moisere ĩgu ĩhmudiro dopa ta ii ĩhacũdoreñumi Goãmũ Moisere.

⁴⁵ Pũhrũgue majarã mari ñecũ sũmarã Josué mera iri wihire aĩgãriñuma mari árĩri yebague erarã. Erã iri yebaguere Goãmũ ĩgu apira yebaguere erã eraboro core iri yeba majarã mũrare Goãmũ cóãcãñumi. Irisubure Goãmũre umupeori wihire waimurã gasiri wihire opamuriñuma mari ñecũ sũmarã. Ne Davi mũrũ ĩgu árĩcũgue opatuñuma iri wihire. ⁴⁶ Eropigũ Davi mũrũ Goãmũre mucubiricũ iĩñumi. Eropigũ Goãmũ ya wihi árĩburire iidiagũ Davipũ serẽriñumi Goãmũre.

⁴⁷ ĩgu eropa serẽquerecũ ta Salomopũ Davi magupũ Goãmũ ya wihire iĩñumi. ⁴⁸ ĩgu eropa iiquerecũ ta Goãmũrũ masa erã iira wihiguere árĩbeami. Őpa arĩñumi Goãmũ wereniguirire weremũhtadigũ:

⁴⁹ Ūmarogue yũ doaro áhraa. Ero doagũ

dorea yuhũ. Eropiro yebapũ yũ guburire duhpeoro iro dopa ta ãhraa. Yuhũ turatariagu ãhraa. Yaha wihi árĩborore iimasibea mũa. Goãmũ yũ árĩcũ yũ árĩburi wihire mũa iimasibea. ⁵⁰ Yũ basi i yebare árĩpehrero iiabũ yuhũ, arĩmi Goãmũ, arĩ gojañumi Goãmũ yare weremũhtadigũ, arĩpũ Esteban.

⁵¹ Eropigũ òpa werenemopũ Esteban erãre:

—Mũa ne yuhridiabirã ãhraa. Goãmũ yare peequererã, ãgũre yuhridiabeaa. Espĩritu Santore tarinũgataria mũa. Mũa ñecũ sũmarã erã iidiro dopa ta iiaa mũa. ⁵² Mũa ñecũ sũmarã árĩpehrerã Goãmũ ya weremũhtanirãre ñero iĩũma. Erã Goãmũ yare weremũhtanirãpũ “Pũhrũ òagu Goãmũ yare weremũhtagu arigũcumĩ,” arĩ erã wererã árĩcũ peeũuma mũa ñecũ sũmarã mũra. Eropa arĩ werenirã mũrare wejẽmuriũma. Eropirã “Òagu,” erã arĩgũre mũa sã dohpaguere ãgũ ya curu majarã árĩquererã ta ãgũre wejẽabũ. ⁵³ Goãmũ dorerire anyuapũ wererĩũma mũare. Eropirã mũa iri dorerire opariyoro. Eropirã iri dorerire tarinũgabũ mũa, arĩ wereniguitupũ pare Esteban.

Erã Estebanre utãyeri mera dea wejẽñorã

⁵⁴ ãgũ eroparĩcũ peerã erãpũ burigã guañorã. Eropa turaro guarã, gũhyarã wañorã. ⁵⁵ Erã eropa guaquerecũ ta ãgũ Espĩritu Santo ãgũ dorero dopa ta iipehogũ árĩgũ, ãgũ turarire òaro opagũ árĩgũ, umarogue ãhamemuju Goãmũ gosesiririre ãapũ Esteban. Jesu Goãmũ diayepũ ãgũ niguiçũ ãapũ ãgũ. ⁵⁶ Eropa ãagu òpa arĩpũ

—Ūmarogue merogã ero tuweamaacũ Jesu Goãmũ obeodigu Goãmũ diayerũ ïgu niguicũ ïhaa yũhũ, arĩpũ Esteban.

⁵⁷ Ìgu eroparĩcũ peerã ta erã buriã gaguinigui, erã gamirire bihacã, yujuro mera ïgu pohrogue omagã, ïgure ñeañorã.

⁵⁸ Ñehatuhaja, ïgure aĩgã, iri maca tũro pohrogue cóañorã ïgure. Eropirã utãyeri mera dea wejẽcañorã erã ïgure. Erã eropa wejẽboro core ïgure utãyeri mera deamorã erã weca maja suhrire tuwea, mamũre Saulo waĩcũgure iri suhrire opabasadoreñorã erã.

⁵⁹ Eropigu Esteban erã ïgure utãyeri mera dea wejẽrisubu õpa arĩpũ.

—Jesu yũ Opũ, yũ sĩporãre aĩque, arĩpu.

⁶⁰ Eropigu ïgu mereja õpa arĩpũ:

—Opũ Jesu, oã dohpague ñero erã yũre iirire erãre dipuwaja moabita mũhũ, arĩpũ Esteban.

Eropa arĩtuhajagu ta sĩria warũ ïgu.

8

¹ Eropigu Esteban ïgu sĩricũ ïagu, “Õhaa,” arĩpũ Saulo.

Saulopũ Jesu yarãre ñero iipũ

Eropirã irinũre ta Jesu yarãre Jerusalẽgue arĩrãre ñero iinũgañorã Jesure gamebirãpũ. Erã eropa ñero iicũ Jesu yarã Judea yebague, Samaria yebague yoarogue duhrisirigã wañorã. Jesu ïgu apinirã dihta wabiriñorã. ² Eropirã gajirã Goãmũre umupeorã Esteban dũpũ mũrarore yaa, buriã oreñorã erã. ³ Saulopũ Jesu yarãre ñetariaro iimũriripũ. Ìgu erã ya

wirigue ñaja, umare, nomere ñeha, peresugue bihadobomaripe.

Samariague Jesu yare buhepe Felipe

⁴ Eropirã yoarogue wasirininã Jesu yarãpe Jesu yare buheñorã. ⁵ Eropigũ Felipe Samaria waĩcari macague eja, Jesu yare buhepe iri maca majarãre. ⁶ Īgũ eropa buhecũ ero majarã õaro peeñorã. Eropirã Goãmũ turari mera deyoro moarire ĩgũ ii ĩhmucũ ĩañoñã erã. Eropa ĩarã ĩgũre õaro peeñorã erã. ⁷ Bajarã watẽa ñajasũnirãre ĩgũ pohro erã eracũ ĩagũ watẽapũre wadorepe ĩgũ. Watẽape burigã gaguinigui, duhugã waha wañoñã erãre. Eropigũ bajarã dũpe buhanirãre, curimasi-birãre dũpe õarã iimuripe. ⁸ Īgũ eropa iicũ ĩarã iri maca majarã bajarã masa mucubiriñoñã.

⁹ Irisubure Simo waĩcũgũ iri maca majagũ yee arĩpe, Eropigũ yeea erã iirare ii ĩhmumuripe Samaria majarãre. Īgũ eropa ii ĩhmucũ ero majarã ĩha uca wa ĩgũre guhyadiaro mera ĩarã arĩñoñã.

—Yũhũ masipehogũ ãhraa, arĩpe Simope erãre.

¹⁰ Īgũ eropa iicũ ĩarã masape õpa arĩmuriñoñã:

—Ihĩ Goãmũ ya turari opagũ ãhrimi. Goãmũ iro dopa turagũ ãhrimi, arĩmuriñoñã masa erã oparã mera. Erã arĩpehrerã õaro peeñorã ĩgũre.

¹¹ Īgũ yeea erã iiri ĩgũ purisiriri mera yoari boje ii ĩhmumuripe erãre. Īgũ eropa ii ĩhmucũ ĩarã erã uca wamuriñoñã. Eropirã erã ĩgũre umupeomuriñoñã. ¹² Felipepe erã ĩgũre eropa

umupeoquerecũ Goãmũ ĩgu opu árĩrire, Jesucristo yare õari buherire werepũ. ĩgu eropa werecũ erã ĩgure õaro peeñorã. Erã eropa õaro peecũ ĩagu ũma, nome mera waĩyerũ Felipe. ¹³ Eropigu Simo ĩgu yee sã Felipere õaro peerpũ. Eropigu ĩgu sãre waĩyerũ. ĩgu eropa iira pũhrũ Felipe mera dujarũ ĩgu. Felipepũ Goãmũ turari mera ii ĩhmucũ ĩagu, dorecurã õarã ĩgu iicũ ĩagu Simo ĩha uca wamũripũ.

¹⁴ Eropirã Samaria majarã Goãmũ yare erã burigã gamecũ peebeomũriñorã Jerusalengue árĩrã Jesu ĩgu apinirãpũ. Erã eropa peebeorã Pedrore, Ñu sãre obeoñorã Samariague. ¹⁵ Eroque erã ejara pũhrũ Pedro sã Goãmũre serẽbasañorã. “Oã Samaria majarã mure umupearã mũ Espĩritu Santore opaporo,” arĩ, serẽbasañorã erã Goãmũre. ¹⁶ Erã Samaria majarã Jesucristo waĩ mera waĩyesũnirã árĩñorã. Iri dihtare masiñorã erã. Eropirã Espĩritu Santore opabiriniñorã dohpa. ¹⁷ Eropigu Pedro Ñu mera Samaria majarãre erã mojotorire erã weca duhpeora pũhrũ Espĩritu Santore opanũgañorã erã.

¹⁸ Eropigu Pedro sã erã ya mojotori mera erã duhpeora pũhrũ Espĩritu Santo eracũ ĩapũ Simo yeerpũ. Eropa ĩagu árĩgu, erã turarire gamegu niyeru mera wajayediariũ. ¹⁹ Õpa arĩripũ Simo: —Yu sãre oque i turarire. Yu sã yu mojotori mera masa weca duhpeodiaca Espĩritu Santore erã ñeaboro dopa. Eropigu i yu iĩburi wajare wajayediaa, arĩripũ Simo erãre.

²⁰ ĩgu eroparĩcũ peegu Pedro õpa arĩpũ.

—Mũ niyeru mera Goãmũ ya turarire mũ asũdiara waja mũ niyeru mera ta peamegue waque mũhũ. ²¹ Goãmũ mũ pepirire masimi. Mũhũ ñegu árĩnia. Eropirgũ ire gũa iirire iima-sibea mũhũ. I mũ iirino árĩbeaa. ²²⁻²³ Bũrigã peyocua mũhũ. Eropigũ mũ ñeri iirire ne duhumasibea mũhũ. Eropigũ ire mũhũ ñero iirare bũjawereque mũhũ. Goãmũre mũ ñero pepirire ero diaye ta serẽque mũhũ. Mũhũ eropa iicũ ãagũ ãgũ mũ ñerire cãdijibocumi, arĩ werepũ Pedro ãgũre.

²⁴ ãgũ eroparĩcũ peegũ Simo yũhripũ ãgũre.

—Yũre serẽbasaque mũa Goãmũre mũ arĩdiro dopa yũ wabiriboro dopa. Iri waja peamegue wadiabeaa yũhũ, arĩpũ Simo ãgũre.

²⁵ Ero pũhrũ Pedro Ñũ mera Goãmũ yare wereñorã. “Jesu ãgũ masa mũriacũ ãabu gũa,” arĩ, Samaria yeba árĩri macari majarãre õari buherire buheñorã. Erãre Goãmũ yare buhetuhaja Jerusaléngue dujaa wañorã.

Felipe Etiopía yeba majagũre buherũ

²⁶ Eropii Goãmũ ãgũ obeodigũ anyu Felipere werepũ:

—Dohpaguere õdoca surgue waque. Jerusalén pohro árĩri mague Gazague wari mague waque, arĩ werepũ anyu Felipere. Iri maha masa marirogue árĩyoro.

²⁷ ãgũ eroparĩcũ peegũ ãgũpũ iri mague waha wapũ. Pũhrũ iri mague yujugũ masũre bocatĩribu iipũ. ãgũ bocatĩribu árĩpũ Etiopía yeba majagũ opũ. Eropigũ Candace waĩcũgo Etiopía majago opo bũro yare niyerure árĩpehrerire

ĩhadibugũ árĩpũ. Eropigũ ĩgũ Jerusaléngue mari Pagure umupeogũ ejadi árĩpũ. ²⁸ ĩgũ ya macague tũrudiru mera dujaagũ irirugue waqueregũ ta buhegũ iipũ. Goãmũ yare weremũhtadigũ Isaia ĩgũ gojarapũre buhegũ iipũ.

²⁹ Eropigũ Espíritupũ Felipere õpa arĩ werepũ.

—Sihĩ tũrudirugue wagũ pohrogue waque, arĩpũ Espiritu Santo ĩgũre.

³⁰ ĩgũ eroparĩcũ peegũ, Felipepũ tũrudiru pohrogue omagã, Isaia ĩgũ gojarare Etiopía majagũ ĩgũ buhecũ peepũ. Eropa peegũ Felipe serẽpipũ ĩgũre.

—¿Mũ buherire masiri mũhũ? arĩpũ ĩgũ.

³¹ ĩgũ eroparĩcũ peegũ Etiopía majagũ õpa arĩ yũhripũ:

—Gajigũ yũre weretaugũ maricũ õaro masi-beaa yũhũ. Ohõ yũre weredoagũ arique yũhũ dipaba, arĩ yũhripũ ĩgũ Felipere.

—Áũ, arĩ, doajapũ ĩgũ pohro. ³² Eropii Goãmũ yare Etiopía majagũ ĩgũ buheripũ õpa árĩyoro:

Ovejare erã ñeha wejẽdiro dopa ta ĩgũ sãre ñeha wejẽrãcoma masa. Eropigũ ovejagãre ĩgũ poare erã seacũ ĩgũ gaguiniguibiro dopa ta ĩgũ masũ sã ejari mariro árĩgũcumĩ. ³³ ĩgũre erã wereyarãcoma. Eropirã ĩgũ ĩgũ ñero iibiriquerecũ ta erãpũ ñero iirãcoma ĩgũre. ĩgũ i yebague ĩgũ árĩcũ erã ĩgũre wejẽrãcoma. Eropigũ ĩgũ porã marigũ sĩria wagũcumĩ, arĩ gojara árĩyoro.

³⁴ Iripũ eroparĩcũ ĩagũ, Etiopía majagũ Felipere serẽpipũ:

—Wereque yure. ¿Ōpa Isaia ĩḡu arĩḡu nihino árĩcuri ihĩ? ¿Isaia ĩḡu basi wereḡu iicuri? ¿O gajigure wereḡu iicuri? arĩ serēpiru Etiopía majagu.

³⁵ ĩḡu eropa serēpi ĩacũ peegu Felipe iripũre ĩha, Jesu yare werepu Etiopía majagure. ³⁶ Eropirã erã iriru mera waha, maugãgue ejañorã.

—Īaque. Ohõ maugã āhraa. I maugãgue yure waĩyeque, arĩpu Etiopía majagu.

³⁷ —Jesure mũhu ðaro umupeocũ ĩagu mũre waĩyegura, arĩpu Felipe ĩgure.

—Jesure umupeoa yũhu. ĩḡu Cristo Goãmu magu āhrimi. Irire ðaro masia yũhu, arĩpu Etiopía majagu.

³⁸ Eropa arĩḡu ta ĩḡu tũrudiru autugure yaudorepu. Iriru yusumerejara pũhrũ wiriañorã erã. Wiria waha, iriyagãgue eja, ñumu wiri nũgajañorã. Ero ñumunũgaja, Felipepu ĩgure waĩyerũ. ³⁹ Waĩyetuhaja erã majajanũgajacũ Goãmu ĩḡu Espĩritu Felipe aĩgã warũ. ĩḡu eropa wara pũhrũ Etiopía majagu ðaro mucubirigu ĩḡu ya yebague dujaa warũ. ĩḡu eropa iira mũtũyacũ ne dipaturi Felipe ĩabiripu. ⁴⁰ Felipepu eropa iituhaja Azotogue ejarũ. Eropigu baja macarire ðari buherire buherũ masare. Pu Cesareague buhetumũripũ.

9

Saulo Jesucristore ĩagu ĩgure umupeonũgarũ

¹ Irisubure Saulo Jesu yarãre ĩhaturigu, “Erãre wejẽgura,” arĩḡu, ĩḡu opu pohroque warũ.

² Erogue ejagu ĩgu gojarapũrire serẽpu pahia opure. Őpa arĩpu:

—Damasco maca maja wirigue mari buheri wirigue Jesu yarãre, umare, nomere yuhu erãre bocaia, ñeha dihri, Jerusalengue aĩgãrigura. Iri wirigue arĩrãre yu erãre ñeaburipũre paperapũre yure goja oque, arĩ serẽpu pahia opure.

³ Iripũre aĩtuhaja, waha, ĩgu Damasco pohro ĩgu ejabu iicũ gohra umaro maja gosesiri medijuyoro ĩgure. ⁴ Eropa gosesiri medijucũ ta ĩgu yebague mehmerejagu, wereniguicũ peepu.

—Saulo, Saulo, ¿duhpigu mũhu yure ñero iiri? arĩro cariyoro.

⁵ —Opu, ¿nihino aħriri mũhu? arĩpu Saulo.

—Yuhu mu ñero iigu ta aħraa arĩpu Jesu. Mũhu yu mera guagu yure yuħribigu, mu basi ta ñero tariaa, arĩpu Jesu Saulore.

⁶ ĩgu eroparĩcũ Saulo gũiri mera naragãnijagu õpa serẽpipu:

—Opu, ¿dohpa yuhu iicũ gahmeri mũhu? arĩpu Saulo.

Ĩgu eroparĩcũ õpa arĩpu Jesu ĩgure:

—Wahgãnugajaque mũhu. Macague waque. Iri macague ejacũ ero majagu mu iiburire weregacumi mũre, arĩpu Jesu Saulore.

⁷ ĩgu eroparĩcũ Saulo mera majarãpu ĩgu werenigũiri dihtare peeñorã. Jesupure ĩabiriñorã. ĩgu eropa wacũ ĩarã gũirã erã wereniguimasibiriñorã.

⁸ Eropigu Saulo yebague oyadigu wahgãnugaja, ĩgu ĩacũ ĩgu cuiuri deyobiriyoro. Eropirã erã ĩgu mojtore ñeha, Damascogue tuã wahgã wañorã erã ĩgure.

⁹ Eropigü ïgu ùhrenü gohra ne ïabiri, babiri, ne ihribiripü.

¹⁰ Eropii Jesu ïgu buhegu Ananía waĩcugü Damasco árĩpü. Eropigü Jesu dehyoapü Ananíare. Eropa dehyoagü piyupü ïgure:

—Ananía, ¿ãhriri? arĩpü Jesu ïgure.

—Ãhraa yu, arĩ yuhripü Ananía ïgure.

¹¹ ïgu eroparĩcũ Jesu ïgure wererü.

—Diaye waĩcari mague waque. Eropa wagü Juda ya wihigue Tarso majagure Saulo waĩcugure amaque. ïgu Goãmure serëniugu iicumi. ¹² Eropigü quëro dopa ta ïgu ïarare ïagü iicumi eroguere. Õpa árĩrire ïagü iicumi. Mùhu mü mojtore ïgu weca duhpeo, ïgu cuiri òaro wacũ ïagü iicumi ïgure dehyoarare, arĩpü Jesu Ananíare.

¹³ ïgu eroparĩcũ peegu Ananíapü òpa arĩpü:

—Opü, ïgu mü yaräre òaräre Jerusalén majaräre ñero iiapü. Bajarã masa yure eropa arĩ wereama. ¹⁴ Eropigü òre ïgu árĩpehrerã müre umupeoräre peresu iigu arigu iiapü. Pahia oparã ïgure eropa iidoreañorã, arĩpü Ananía Jesure.

¹⁵ ïgu eropa arĩquerecũ Jesupü wererü ïgure.

—ïgu Saulopü yu beyedigu ãhrimi. ïgu yaha buherire baja macari majaräre, oparäre, Israe masa sãre buhegücumi. ¹⁶ Eropigü bajasuburi yahare ïgu buheri waja ïgu ñero tarigücumi. Irire ïgure masicũ iigüra. Eropigü waque mühu, arĩpü Jesu Ananíare.

¹⁷ ïgu eropa arĩra pührü Ananíapü, waha eja, Saulo ïgu árĩri wihigue ñaja warü. Ñajaja, ïgu mojtore Saulo weca duhpeo, wererü ïgure:

—Acaweregũ Saulo, mari Opũ Jesupũ mague mure dehyoedigũ yũre obeoami mũ cuiri mũ ĩaboro dopa. Espĩritu Santore mũ opaboro dopa, ĩgũ dorediro dopa mũ iiboro dopa yũre obeoami mũ pohrogue, arĩ werepũ Ananĩa Saulore.

¹⁸ ĩgũ eroparĩcũ ta ĩgũ cuirire wai nũtũri dopa bejarire ĩgũ cuirire cohrodijacũ ĩapũ pare Saulo. ĩgũ eropa ĩatuhara pũhrũ ĩgũ wahgãnũgajacũ gajigũpũ waĩyerũ ĩgũre. ¹⁹ Eropigũ ĩgũ, ĩgũ bara pũhrũ turagũ warũ.

Saulo Damascogue Jesu yare buhenũgapũ

Eropii bajamenũri Damascogue Jesu yarã mera árĩmũripũ Saulo. ²⁰ Eropigũ irisubure ta ĩgũ judio masa buheri wiri árĩgũ, Jesu yare buhepũ masare. “Jesu Goãmũ magũ ta ãhrimi,” arĩ werepũ Saulo. ²¹ ĩgũ eropa werecũ ĩarã árĩpehrerã ĩgũre peerã uca wañorã.

—Ihĩ Goãmũ yarãre Jesure umupeorãre ñero iidigũ ãhrimi. Eropigũ ĩgũ erãre ñeha, dihri, pahia oparãre odiadigũ árĩrimi. Eropiidiagũ õguere aridigũ árĩrimi, arĩñorã masa ĩgũre peerã.

²² Erã eroparĩquerecũ Saulo gũiro mariro turaro mera buhenũgapũ. Judio masare Damasco majarãre õaro werepũ. “Ihĩ Jesu diaye ta Cristo marire taubu ãhrimi,” ĩgũ arĩ werecũ erãpũ ĩgũre “Gũyagũ iimi ihĩ,” arĩmasibiriñorã ĩgũre.

Saulo duhri wahgãpũ judio masare

²³ Eropirã bajanũri pũhrũ judio masa ĩgũre wejẽdiañorã. Eropirã erã basi gamenere ĩgũre erã wejẽburire wereniguiñorã. ²⁴ Eropirã ĩgũre

wejēdiarã, iri maca maja disipororire umure ñami sãre coremuriñorã. Saulo wiricũ ñha wejēmorã coreñorã. Erã eropa wejēdiaquerecũ Saulo erã wejēdiarire masipũ ñgũ mera majarã mera. ²⁵ Eropirã ñamigue Saulo buherã ñgũre puibu wuari puibu mera aĩsã, iri maca maja sãriro purupugue duhudijucãñorã ñgũre.

Saulo Jerusalén árĩpũ

²⁶ Eropigũ Saulo Jerusaléngue ejagũ, erogue Jesu yarã mera ñgũ árĩdiaripũ. ñgũ eropa árĩdiacũ erã ñgũre “Jesure umupeogũ árĩbeami ihĩ,” arĩñorã. ñgũre güi arĩñorã. ²⁷ Erã eropa güiquerecũ ta Bernabépũ ñgũre aĩgãpũ Jesu ñgũ apinirã pohrogue. Eropigũ Saulo mague Jesure ñgũ ñarare, Jesu mera ñgũ wereniguirare, Damascogue güiro mariro Jesu yare ñgũ buhenugarare werepũ Bernabépũ. ²⁸ ñgũ eropa werera puhũ Saulo erã mera ñajagũ, Jerusaléngue erã mera árĩmuriipũ. ²⁹ Eropigũ ñgũ güiro mariro Jesu yare buhepũ. Eropigũ ñgũ judio masare Jesu yare weretarinugagũ iipũ. Erã judio masa griego masa ya wereniguirã árĩñorã. Eropirã Saulo ñgũ eropa weretarinugari waja ñgũre wejēdiañorã. ³⁰ Erã eropa wejēdiacũ ñarã, Saulo mera majarã Jesu yarãpũ ñgũre Cesareague aĩduhriğã waha wañorã. Erogue ñgũre sihu árĩniguiiri Tarsogue obeoñorã erã ñgũre.

³¹ Eropi árĩpehrerogue Judea yebague, Galilea yebague, Samaria yebague Goãmũ yarã õaro árĩmuriñorã. Irisubure ne masa ñero iibirimuriñorã erãre. Eropirã õaro buheñorã erã. Eropirã erã Goãmũre gũhyadiaro ñañorã.

Espíritu Santo eräre ïgu itamucũ eräpũ Jesure umupeorã bajarã wañorã.

Pedro Eneare ðagũ wasũ iipũ

³² Eropii Pedro árïpehreri macarigue wagũ, Jesu yarã Lida majarã pohrogue säre ejarũ ïgu.

³³ Erogue ejagũ Enea waĩcũgũre bocajarũ. Enea dũpũ bũhadigũ árïgu, ocho bojori gohra erã pũtãpidi oyamũripũ.

³⁴ Eropigũ Pedropũ ïgũre ðpa arïpũ:

—Enea, Jesucristo ðagũ árïcũ iimi mũre. Wahgãnũgajaque. Mũre pũtãpira gasirore amuque, arïpũ Pedro ïgũre.

Ïgu eroparïcũ ta ïgu wahgãnũgaja waha warũ.

³⁵ Eropirã árïpehrerã Lida majarã, Sarón majarã ïgũre ïarã, erã erã ñeri iirare duhu, Jesure umupeonũgañorã.

Dorca waĩcũgore masupũ Pedro Jesu turari mera

³⁶ Eropii Jope waĩcũri macague Jesure umupeogo Tabita waĩcũgo árïpo. Igo waĩ Tabita griego ya wereniguiiri mera Dorca ãhraa. Igo ðarire iigo baja omũriipo masare.

³⁷ Eropigo irisubure igo dorecũ wahgũ, sïria wamũriipo. Igo sïricũ ïarã, erã igo dũpũ mũrarore ðaro coe, umaro maja taribugue apiñorã igore.

³⁸ Lida waĩcũri maca Jope pohrogue árïyoro. Ero eropa árïcũ Jesure umupeorã Jope maca majarã Pedro Lidague ïgu árïcũ peebeoñorã. Eropa peebeorã perã umare obeoñorã Pedro pohrogue. Ïgu pohrogue ejarã wereñorã Pedrorre erã.

—Yojaro mera waque gua árïroque, arï wereñorã erã.

³⁹ Erã eroparĩcũ peegu erã mera waha wapũ ãgu. Erogue ãgure erã aĩ ejara pũhrũ umaro maja taribugue sĩridigo pohro aĩmũria wañorã ãgure. Pedro árĩcũ ãha árĩpehrerã wapeweyarã nome orerã ãgu pohro ejanugamũriñorã. Tabita erã mera árĩnigogue baja suhrire iibasamũripo. Eropirã erã igo eabasara suhri mũrare ãhmuñorã Pedrorẽ. ⁴⁰ Pedro erãre iri taribugue árĩrãre wiriadorepũ. Erã wiriara pũhrũ ãgu mereja, Goãmũre igore serẽbasapũ. Eropigũ igo dũpũ mũrarore maji ãha,

—Tabita, wahgãque, arĩpũ ãgu.

Ãgu eroparĩcũ ta igopũ ãha wahgũ, Pedrorẽ ãha, wahgã doajapo. ⁴¹ Igo eropa wahgã doajacũ ãha, ãgu igo mojtore ñeha tarawahgũ nugupũ igore. Eropigũ ãgu ero majarãre Jesu yarãre, wapeweyarãre sihubeo, igore ojocarigore wiapũ erãre. ⁴² ãgu eropa iira pũhrũ árĩpehrerã Jope majarã irire masirã bajarã masa Jesure umupeonũgañorã. ⁴³ Pũhrũ Jopegue Simo waimũrã gasirire amugũ mera bajanũri Pedro ãgu mera árĩpũ.

10

Pedro Corneliore Jesu yare werenũgapũ

¹ Irisubure Cesareague Cornelio waĩcũgu árĩgu. ãgu cien surara opũ árĩpũ. Erã surarapũ erã ya curu Italiano waĩcũyo ro. ² Cornelio ãgu ya wihi majarã mera mari Pagũre umupeorã, guhyadiaro ãarã árĩñorã. Eropigũ ãgu judio masa mojomorocũrãre itamugũ baja gajĩnore omũripũ. Eropigũ ãgu umũri nũcũ mari Pagũre

serēmūripū. ³ Eropii ñamicague tres árīcūgue Goāmū yagū anyu ĩgūre dehyoapū. Eropa dehyoagū Cornelio pohrogue ñajajarū.

—Cornelio, arī piyupū anyu ĩgūre. ⁴ Eropigū Cornelio ĩgūre ĩha güigū ðpa arīpū:

—Opū, ¿ñehenore gahmeri? arīpū ĩgū.

—Masare mū orare, mari Pagūre mū serēniguirare Goāmū peeami. ⁵ Eropigū Jopegue mū ũmare obeoque. Erogue Simo Pedro waīcūgū āhrimi. ĩgūre aīgāridoreque mū ũmare. ⁶ ĩgū gajigū Simo waimūrā gasiri amugū pohro, wūariya turo árīri wihi ta āhrimi, arīpū anyu Corneliore.

⁷ Anyu eropa arītuhaja, wiria waha warū. ĩgū wiriara pūhrū Cornelio perāre ĩgūre itamurāre yujugū ĩgū surara mera majagūre sihurū. Surarapū Goāmūre umupeogū árīgū, ũmūri nūcū Corneliore itamudigū árīpū. ⁸ Eropigū Cornelio erāre werepeho, Jopegue obeopū erāre.

⁹ Eropi gajinū Jopegue erā warisubu goeri boje gohra árīcū Pedropū wihi wecague Goāmūre serēgū warū. ¹⁰ Eropigū ĩgūre oa pūricū badiapū. Eropigū gajirā barire erā moarisubu ĩgūpū dehyoacū ĩapū. ¹¹ ũmarore pārimaacū, wūari gasiro wapicūrisubu pepūri ojogorori dirira gasiro dijaricū ĩapū. ¹² Iri gasiro pohecague bajarā waimūrā nūgū majarā, yebague paha curirā, mirimagū porā majarā árīñorā. ¹³ Irire ĩgū ĩara pūhrū, Pedrore wereniguiro caricū peepū.

—Pedro, wahgānūgajaque. Oāre wejē baque, arīro cariyoro ĩgūre.

14 Īḡu eroparīcū peequereḡu ta Pedro ōpa arīpū:

—Opū, ne erāre babeaa yūhū. Ņerāre, Goāmū ĩḡu badorebirinirāre ne babirimurabū yūhū, arīpū Pedro.

15 Eropigū Pedro dipaturi wereniguiro caricū peepū.

—Goāmū, “Ōarā āhrima,” ĩḡu arīnirāre “Ņerā āhrima,” arībiricāque mūhū erāre, arīro cariyoro Pedro.

16 Eropii ūhresubu eropa arī wereniguira pūhrū iri gasiro ūmarogue mūria wayoro daja.

17 Eropigū Pedro burigā guña “¿Dohpa arīdiari iiri yare eropa dehyoaro?” arī pepipū ĩḡu ĩḡu basi. Īḡu eropa pepirisubu Cornelio ūma ĩḡu obeonirāpū Pedro ya wihigue ejañorā. “¿Simo ya wihi nohogue āhriri?” arī, erā serēpira pūhrū ĩḡu ya wihigue ejañorā erā. 18 Eropirā erā serē ĩha purumujuñorā. “¿Simo Pedro waīcūḡu i wihire āhriri?” arī serēpi ĩañorā erā.

19 Eropigū Pedro ĩḡu pepirisubu Espiritu Santo ĩḡure werepū:

—Īaque. Ūrerā ūma mure amarā iima. 20 Wahgānūgajaque. Dijaque. Erā mera waque. “¿Dohparīri?” arī pepibigū ta waque ōaro mera. Yūpū erāre ōguere obeoabū, arīpū Espiritu Santo Pedro.

21 Īḡu eroparīcū peegū Pedro erā pohroḡe dija wa,

—Īaque. Ohō āhraa yūhū mūa amagārigū. ¿Duhpirā arirā iiri mūa yū pohro arirā? arīpū Pedro erāre.

22 Īḡu eroparīcū ta erāpū ōpa arīñorā.

—Cornelio cien surara opu, ðarire iigu, mari Pagure guhyadiaro mera umupeogu, árĩpehlerã judio masa “Õagu” erã arĩgu mure sihgãridoregu obeoami guare. Goãmu ðagu anyu Corneliore mure sihudoreapu. Õpa arãpu: “Pedrore mua ya wihigue aĩgãridoreque mu umare. Eropii igu mure weregucumi,” arĩ, sihudoreapu anyu Corneliore, arĩ wereñorã Cornelio Pedrore igu sihudorenirãpu.

²³ Erã eroparĩcũ Pedropu erãre ñajaridore, bari oho, igu ya wihigue carĩdorepu erãre. Eropigu gajinu Pedro wahgã, erã mera waha wapu. Eropirã gajirã Cristo yarã Jope majarã Pedrore wapicugãñorã.

²⁴ Gajinu erã Cesareague ejañorã. Eropigu Corneliopu igu acawererãre, igu mera majarã sãre sihu gameneo, Pedrore corepu. ²⁵ Eropigu Pedro Cornelio ya wihi pohrogue igu aricũ iagu Corneliopu igure bocatĩri wiria, igu guburi pohro merejapu. ²⁶ Igu eropa iicũ Pedropu igure aĩ wahgũnugupu.

—Niguique muhu. Yu sã mu iro dopa ta arĩgu ãhraa. Goãmu árĩbeaa, arĩpu Pedro igure.

²⁷ Igu eropa arĩtuhajara puhru Cornelio igure aĩñaja wapu igu ya wihigue. Eroque ñajajagu masa bajarã iri wihigue gamenere igure corerãre iapu Pedro. ²⁸ Eropigu Pedro erãre werepu:

—Judio masu arĩqueregu ta gaji curu majarã mera arĩgu gua dorerire tarinugagu iiaa yuhu. Irire ðaro masia mua. Eropigu gaji curu majarãre “Ñerã ãhrima,” arĩdorebirami

Goãmũ. Őpa arĩ wereami ĩgu yũre. ²⁹ ĩgu eroparĩcũ peegu õguere mũa pohroguere ahrabũ. Mũa yũre sihubeocũ “Ne wasome,” arĩbirabũ. ¿Dohpa árĩronore yũhũ õgue aricũ gahmeari mũa? arĩpũ Pedro erãre.

³⁰ ĩgu eroparĩcũ peegu Corneliopũ õpa arĩpũ:

—Tres árĩcũ i horano gohra ta mari Pagũ yagu anyu yũre dehyoami. Wapicurinũ wahaa ĩgu yũre dehyoara pũhrũ. Irinũ ta mari Pagũre yũ serẽniguirisubu cuimijuri suhricũgu yũ pohro dehyonũgajami. ³¹ Eropigu ĩgu yũre õpa arãmi: “Cornelio, mũhũ mari Pagũ mera mũ serẽcũ ĩgu peeami. Eropigumojomorocũrãre erã gamerire mũ ocũ ĩagu mari Pagũ mũ mera mucubirigu itamugũcumi. ³² Eropigu Jopegue mũ umare obeoque Simo Pedro waĩcũgure mũ pohroguere erã aĩgãricũ. ĩgu gajigu Simo waimũrã gasiri amugũ ya wihi, wũariya tũro pohro árĩri wihi aħrimi ĩgu. ĩgu mũ pohro eragu mũre weregũcumi,” arĩ wereami ĩgu yũre. ³³ ĩgu eroparĩcũ peegu yũ umare mũre aĩgãridoregu obeoabũ yũhũ. Eropigu õaro iigu ahraya mũhũ gũa pohroguere. Eropirã gũa arĩpehrerã õre mari Pagũ ĩgu ĩhabeoro árĩrã iiaa gũa. Arĩpehrerire mari Pagũ Goãmũ mũre ĩgu were-dorera peediarã, cohreabũ gũa, arĩpũ Cornelio Pedore.

Pedro Jesu yare werepũ Cornelio ya wihi ma-jarãre

³⁴ ĩgu eroparĩcũ peegu, Pedro õpa arĩ werepũ:

—Dohpague masia pare. Diaye ta ãhraa. Goãmũ yujuropa ta õaro iimi marire. ³⁵ Eropigu áripehreri macari majarã Goãmũre guhyadiaro erã ãacũ, õarire erã iicũ, Goãmũpũ erãre mucubirimi. ³⁶ Goãmũ gua judio masa pohro Jesucristore obeomi. Masa Goãmũ mera õaro erã áriõoro dopa Jesupũ õari buherire weremi. Iri buherire mũa masia. Jesucristopũ áripehrerã masa opũ ãhrimi. ³⁷ Ñu waĩyegũ “Mũa ñerire bujawereque. Eropirã waĩyenirã árique,” masare ãgu eropa arĩ werera pũhrũ Galileague õari buherire Jesupũ werenũgami. Pũhrũ Judea yebague iri buherire werepehomi. ³⁸ Ihĩ Jesu Nazare majagũre Goãmũpũ ãgu turarire, Espĩritu Santo mera ãgu iimasi-burire odi áriĩmi Jesure. Eropigu Jesu õaro ãgu wami. Eropa wagũ watẽa ñajasũnirãre, ñero tarirãre, áripehrerãre õarã wacũ iimi. Mari Pagũ Jesu mera áriĩdi áriĩmi. ³⁹ Judea yeba, Jerusalén sãre áripehreri ãgu iirare gua ãabu. Pũhrũ erã crusague pabia wejẽma ãgũre. ⁴⁰ Eropigu uhrenũ waboro Goãmũ ãgũre masudi áriĩmi. Eropigu Jesure ãgu masura pũhrũ gajirãre dehyoacũ iidigu áriĩmi mari Pagũ. ⁴¹ Irisubu Jesure áripehrerã ãabirima. Guare bajamerãgãre dehyoami. Mari Pagũ ãgu gamerãre, Jesure ãamorãre iribojegue Goãmũ guare beyepũ. Guapũ Jesu ãgu sĩridi masara pũhrũ ãgu mera baha, ihribũ. ⁴² Eropigu ãgu guare doremi õpa arĩgu: “Masare wereque. Yũhũ Jesu áripehrerã ojocarirãre, sĩrinirãre erãre dipuwaja moabu yũ áriĩcũ iiami yũre

Goãmũ. Eropirã irire wereque,” arĩ doremi Jesu guare. ⁴³ Árĩpehrerã Jesure erã umupeocũ ïagũ Goãmũ erã ñerire cãdijigũcumĩ. Irire árĩpehrerã Goãmũ ya weremũhtanirã iribojegue majarã wereyuñuma, arĩ werepũ Pedro.

Judio masa árĩbirã Espĩritu Santore opañagañorã

⁴⁴ Iri árĩpehrerire ïgũ eropa arĩ wererisubu, árĩpehrerã irire peerã mera Espĩritu Santo árĩnũgamũripũ. ⁴⁵⁻⁴⁶ Eropirã erã judio masa árĩbirã peeyamariri wereniguiiri mera mucubiriri mera wereniguinũgañorã. Erã ya wereniguiiri mera “Goãmũ turagũ, õagũ ãhrimi”, arĩrã iĩñorã. Erã eroparĩcũ peepũ Pedro ïgũ acawererã judio masa mera. Eropirã Espĩritu Santo judio masa árĩbirã mera ïgũ árĩnũgacũ ïarã judio masapũ uca wañorã. Eropigũ Pedro õpa arĩ werepũ judio masare:

⁴⁷ —Mari iro dopa ta Espĩritu Santore opama oã sã. Erã eropa opacũ ïarã oãre waĩyedoremasia mari, arĩpũ Pedro erãre.

⁴⁸ Eropa arĩtuhaja Jesu waĩ mera judio masa árĩbirãre waĩyedorepũ Pedro. Erã eropiira pũhrũ “Gua mera bajamenũrigã dujanique,” arĩñorã erã Pedro sãre.

11

Pedro Jerusalén majarãre Jesu yarãre werepũ

¹ Eropii judio masa árĩbirã sã Goãmũ yare erã õaro gamecũ Jesu ïgũ apinirãpũ erã acawererã Judeague árĩrã mera peebeoñorã. ² Eropirã Pedro Jerusaléngue ïgũ dujajacũ ïarã judio masa

Jesu yarã bajamerãgã ãgure õpa arĩñorã: ³ — ¿Judio masa árĩbirã pohro duhpigu ejari mũhũ? ¿Dohpa árĩronore erã mera bahari mũhũ? arĩ turiñorã erã Pedrore.

⁴ Erã eroparĩcũ peegu Pedro ãgu iirare werepehopũ erãre. ⁵ Õpa arĩ werepũ:

—Yũhũ Jopegue árĩgu Goãmure serẽgu iibũ. Eropigu yũre õpa dehyoabũ. Yũhũ ãacũ wũari gasiro wapicũrisubu pepũri dirira gasiro umarogue yũ pohrogue دچارicũ ãabũ. ⁶ Eropigu iri gasirore õaro ãabũ “¿Ñeheno iri gasiroguere ãhriri?” arĩbũ. Eropigu ãabũ iri gasiroguere ãrĩrãre. Waimurã nũgu majarãre, yebague paha curirãre, mirimagũ porã majarãre ãabũ. ⁷ Eropigu Goãmu ãgu yũre wereniguirire peebũ. “Pedro, wahgãnũgaque. Wejẽ baque oãre,” arĩgu carimi yũre. ⁸ ãgu eroparĩcũ peegu õpa arĩbũ yũhũ. “Opũ, ne erãre babeaa yũhũ. Ñerãre Goãmu badorebirinirãre ne babirimũrabũ yũhũ,” arĩbũ yũpũ. ⁹ Eropigu umarogue yũre dipaturi wereniguigu carimi daja. “Goãmu ãgu ‘Õarã ãhrima,’ ãgu arĩrãre ‘Ñerã ãhrima,’ arĩbircãque mũhũ,” arĩgu carimi yũre. ¹⁰ Eropigu uhresubu ãgu eropa arĩ wereniguira pũhrũ iri gasiro dipaturi mũria wabũ daja. ¹¹ Yũ eropa ãarisubu ta urerã uma gũa árĩri wihigue ejanirã árĩma. Erã Cesarea majagu ãgu obeonirã árĩnirã árĩma. ¹² Eropigu Espĩritu Santopũ yũre erã mera wadoregu “‘Erã ñerã ãhrima,’ arĩbircãque erãre,” arĩ weremi ãgu yũre. Eropirã oã seis mera yũ acawererã mera Cesarea majagu ya wi-

higue ñajajabu gua. ¹³ Eropigu ïgu guare òpa arĩ weremi. “Anyu yaha wihi dehyoacũ ïabu yũhũ. Òpa weremi yũre. ‘Jopegue Simo waĩcũgure aĩgãridoreque. ¹⁴ Ìgu mũre mũ acawererã mera mũare árĩpehrerãre peamegue wabonirãre mũa tariborore weregũcumi,’ arĩmi anyu yũre,” arĩ weremi yũre Cesarea majagu. ¹⁵ Eropii yũhũ erãre wereniguirisubu Espĩritu Santopũ erã mera árĩnũgami marire ïgu iimũhtadiro dopa ta. ¹⁶ Eropigu Jesu ïgu wererare guñabu yũhũ. Òpa arĩ weremi ïgu: “Ñu mũare waĩyegũ deco mera waĩyemi. Yũpũ iri tauro iigũra mũare. Pũhrũ Espĩritu Santore mũa mera árĩniguicũ iigũra,” arĩ weremi. ¹⁷ Eropigu Jesucristo mari Opũre mari umupeocũ ïagu Goãmũ ïgu Espĩritu Santore ohãmi marire. Eropigu Goãmũ marire ïgu Espĩritu Santore ïgu odiro dopa ta judio masa árĩbirã sãre ïgu ohãmi. Goãmũ ïgu eropa iicũ ïagu ïgũre tarinũgamasibea yũhũ, arĩpũ Pedro erãre judio masare Jesu yarãre.

¹⁸ Ìgu eroparĩcũ peerã, erã ïgũre ne arĩnemobiriñorã. Ìgũre erã turimasibiriñorã. Eropirã erã Goãmũre mucubirirã,

—Goãmũ òagu, turagu ãhrimi, arĩñorã.

Òpa arĩnemoñorã erã:

—Judio masa árĩbirã sã erã ñerire bũjawererã árĩrã Goãmũ ïgu taunirã árĩrãcoma. Eropa ïgu taunirã árĩrã erã sã mũuri nũcu ïgu mera árĩniguirãcoma, arĩnemoñorã erã.

Antioquía gajirã Jesu yarã árĩñorã

19 Eropii Estebanre erã wejëra pũhrũ masa Jesu yarãre ñero iĩnorã. Erã eropa iicũ ïarã Jesu yarã duhrisirigã wañorã. Eropirã erã Feniciague, Chipregue, Antioquíague waha, judio masa dihtare Goãmũ yare wereriñorã erã. 20 Gajirãpũ Jesu yarã mera majarã Chipre majarã, Cirene majarã Antioquíague eja, judio masa árĩbirãre Jesu yare buheñorã Goãmũ erãre ïgũ tauboro dopa. 21 Eropigũ mari Opũ erãre itamupũ. Eropirã masa bajarã Jesure umupeo, õaripũre gohrotoñorã.

22 Eropii “Antioquía majarãgue Jesure gamecoma,” arĩ peebeoñorã Jerusalén majarã Jesu yarã. Erã eropa peebeora pũhrũ Jerusalén majarã Bernabé waĩcũgũre Antioguíague oboeñorã. 23 Eropigũ ïgũ Antioguíague ejagũ, Goãmũ itamuri mera judio masa árĩbirã ïgũ yarã erã wacũ ïagũ, bũrigã mucubiripũ. Eropigũ ïgũ ero majarãre õpa arĩ werepũ:

—Jesure eropa umupeoniguicãque. ïgũ yare ne duhubiricãque, arĩ werepũ ïgũ árĩpehrerãre erãre.

24 Bernabé õagũ árĩgũ, Espíritu Santore wũaro opagũ árĩgũ, Jesu dorediro dopa iigũ árĩgũ Jesure õaro umupeodigũ árĩpũ. Eropirã ïgũ buhera pũhrũ bajarã masa Jesure umupeoñorã.

25 Pũhrũ ïgũ Tarso waĩcũri macague Saulore amagũ warũ. 26 Eroque ïgũre bocajapũ. ïgũ bocajara pũhrũ Antioquíague aĩgãpũ Saulore. Eroque erã ejara pũhrũ yuju bojori gohra erã Goãmũ yarã mera gamenere, bajarã masare

buhemuriñorã erã. Eropirã Antioquíague Cristo yarã Cristiano waïcunũgañorã.

²⁷ Irisubure Goãmũ ya weremuhtarã Jerusalén árĩnirã waha, Antioquíague ejañorã. ²⁸ Eropigũ erã mera majagũ Agabo waïcũgũ Jesu yarã watope niguigũ, Espíritu Santo ïgũ turari mera werepũ erãre. “Árĩpehreri yebaguere burigã oanũ waroca,” arĩ wereyupũ ïgũ. Irisubure bari maririsubu árĩcũ árĩpehrerã weca opũ Claudio árĩpũ. ²⁹ Eropirã Jesu yarã árĩpehrerã erã oparopẽ erã acawererãre odiañã erã basi game wereniguiñorã. “Judea yeba majarãre Jesu yarãre niyerure obeorã,” arĩñorã erã basi. ³⁰ Erã eropa arĩra pũhrũ Bernabé Saulo mera erã iri niyerure aĩgãbasañorã. Erogue ejarã Judea majarãre Jesu yarãre wiañorã iri niyerure.

12

Pedrore peresu iñorã

¹ Irisubu opũ Herode yujurãyerire Jesu yarãre ñero iinũgapũ. ² Eropigũ ïgũ Ñũ tĩgũre Santiagopũre matamiji mera ïgũ wejẽdorecũ gajigũpũ ïgũre wejẽpũ. Santiagore ïgũ wejẽcũ judio masa mucubiriñorã. ³ Erã mucubiririre Herode masigũ, “Eropa dihta iicũ gah-mema erã,” arĩgũ Pedro sãre peresu iipũ. Irinũrĩre bũgabiriri pan erã bari bosenu Pas-cua árĩyoro. ⁴ Eropigũ Herode Pedrore ñeha, peresu iipũ. Eropigũ diez y seis surarare ïhadibudorepũ ïgũre. Wapicũrã surara ïgũre ïhadibuñorã. Pũhrũ wapicũrã erã gohrotonirã ïgũre ïhadibumuriñorã. Eropa ta iñorã erã diez

y seis surara. Herodepɔ Pascua pɔhrɔ Pedroro peresugue árĩgure masa core duhudobodiaripɔ ãgure wejẽdorebu. ⁵ Eropigɔ Pedro peresugue árĩpɔ. Ĩgɔ erogue árĩcũ ta Jesu yarãpɔ Goãmure burigã serẽbasañorã ãgure.

Goãmɔ peresugue árĩgure Pedroro wiupɔ

⁶ Iri ñamire ta Pedro comedari peda mera erã diridigɔ perã surara watope carĩgɔ iipɔ. Eropirã perã surara disiporo coreniguiñorã ãgure. Eropigɔ iri ñami boyoro Herode Pedroro judio masa core duhudobodiaripɔ ãgure wejẽdorebu. ⁷ Eropigɔ Goãmɔ anyupɔ Pedro carĩgɔ pohro ĩgɔ niguicũ ĩgɔ peresu árĩri taribu boyopehrea wayoro. Eropigɔ anyu Pedro pohro niguigɔ ĩgɔ patorere puucarepɔ ãgure.

—Duru wahgãque, arĩpɔ ĩgɔ Pedroro. ĩgɔ eroparĩcũ ta ĩgɔ mojotorire erã dirira comedari pãrisiri dija wayoro. ⁸ Eropigɔ anyu ãgure wererɔ:

—Mɔ ya suhrire sañaque. Mɔ zapatu sãre sañaque, arĩpɔ ĩgɔ.

Ĩgɔ eroparĩcũ Pedropɔ ĩgɔ arĩro dopa ta iipɔ.

—Mɔ weca majañe suhrirore saña, yɔ mera arique, arĩpɔ anyu.

⁹ ĩgɔ eroparĩcũ iri taribugue árĩdigɔ wiria anyu pɔhrɔ waha warɔ ĩgɔ. Eropa waqueregɔ ta õpa arĩ pepiripɔ ĩgɔ. “¿I diaye árĩbiricuri? ¿O quẽgɔ iicuri yɔhɔ?” arĩ pepiripɔ ĩgɔ. ¹⁰ Eropirã erã ĩgɔ árĩri taribu pohro niguirã surarare tarigã, gajirã yoañariro niguirã sãre tarigã, wɔari disiporogue ejañorã. Iri disiporo macague wari mare cãhmotayoro. Iri biharise

irise basi pãricũ erã wiriañorã. Wiria wa erã mague waha wañorã. Anyupũ waha warũ. Eropigũ Pedro yujugũ ta dujarũ. ¹¹ Eropa ïgũ anyu ïgũ wara pũhrũ ïgũ iirare Pedro masipũ pare. Ōpa arĩ pepipũ ïgũ. “Anyu Goãmũ ïgũ obeodigũ peresugue árĩgũre yũre wiugũ erami. Dohpague irire masia ïgũ eropa iirare. Judio masapũ yũre erã ñero iidiarare Goãmupũ erãre iidorebirami. Eropigũ yũre Herode ïgũ peresu iidigũre wiuami,” arĩ pepipũ Pedro.

¹² ïgũ eropa arĩ pepira pũhrũ María Ñu pago ya wihigue ejapũ Pedro. Ñupũ Marco waĩcũgũ árĩpũ. Iri wihigue masa bajarã gamenere, Goãmũre serẽrã iĩñorã. ¹³ Eropigũ Pedro disiporore eraa dotepũ. Rode waĩcũgo pohro majago ïgũ dotecũ peego, ïago ejapo igo. ¹⁴ Eropigo Pedro igore piyucũ peego ïgũ wereniguirire pee masi, bũrigã mucubiri disiporore pãgũbiripo. Eropa mucubirigo ïgũre pãgũbodio cãdija wapo. Pedro ero niguicũ ta igo majinũgaja oma ñaja wapo.

—Pedro disiporogue erami, arĩ werego ñajapo.

¹⁵ Eropirã iri wihi árĩrã igo eroparĩcũ peerã,

—Eropa arĩmaacãgo iiaa mũhũ, arĩñorã erã igore.

—Diaye ta ãhraa. Diaye ta arĩgo iiaa, arĩpo igo. Igo eroparĩcũ peerã,

—Ïgũ árĩbircumi. Ïgũ sĩporã mũraro eraro iica, arĩñorã erãpũ.

¹⁶ Erã eropa arĩrisubu Pedro disiporore eropa ta doteniguicãpũ. Ïgũ eropiicũ peerã, erã disiporore pãgũ, ïgũre ïha, uca wañorã. ¹⁷ Eropigũ

Pedro ïgu mojoto mera “Ejarimaricãque,” arïgu, Goãmũ peresugue ïgure ïgu wiurare werepũ erãre.

—Ire wereque Santiagore gajirã Jesu yarã sãre, arïpũ Pedro.

Eropa arï weretuhaja, ïgu gajipugue tarigã waha wapũ.

¹⁸ Eropii boyodijiricũ surara Pedrore ïhadibunirã ïgu dohpa ii wiriarare ne masibiriñorã. Eropa masibirã uca wañorã.

¹⁹ Eropigu Herode Pedrore amadoreripũ. Eropigu ïgu surarare peresu corerãre ïgu serẽpira pũhrũ erãre wejẽdorepũ Herodepũ. Eropii Herode Judeague árĩdigũ waha Cesareague árĩgu waha wapũ.

Herode s̃ria wapũ

²⁰ Ero pũhrũ Tiro waĩcũri maca majarã mera Sidón waĩcũri maca majarã mera sãre Herode guapũ. ïgu eropa guacũ ïarã iri macari majarãpũ Herode mera amurã wañorã. ïgu erã mera ïgu guarare wereniguirã wañorã. Ejaa Herodere ïaboro core Herode itamugũ Blasto waĩcũgu mera weretamuñorã. Eropirã erã ïgu Blasto ïgu itamuri mera Herode pohro ejañorã. ïgu pohro ejarã õpa arĩñorã:

—Mari õaro árĩrã. Mari basi ïhaturibiricãrã, arï serẽñorã erã Herodere.

Erã ya yeba majarã Herode ya yeba barire bocamũriñorã. Eropirã Herode erãre ïhaturicũ gamebiriñorã erã. ²¹ Eropigu Herode erã ïgure ïarinũ ïgu queoranũ árĩcũ, opũ ïgu sañari suhri õari suhrire sañamũripũ ïgu. Eropigu

ĩḡu ĩḡu doaro doanijagu, masare werenigui ĩhmum̃ripu. ²² ĩḡu eropa werenigui ĩhmucũ peerã masapu gaguiniguĩñorã:

—Ihĩ wereniguigu masu árĩbeami. Goãmu ãhrimi, arĩ gaguiniguim̃ririñorã erã Herodere.

²³ Erã eropa arĩra puhru Goãmu ĩḡu anyu Herodere dore ópu. “Goãmu árĩbeaa yuhũ,” ne arĩbiripu Herode. ĩḡu eropa arĩbirira dipuwaja anyu ĩḡu dorecũcũ iipu. ĩḡu eropa dorecũcũ ĩḡure beca ba wejẽcãñorã.

²⁴ Eropii Jesu yarã masa bajarãre Jesu ya buherire buheñorã.

²⁵ Eropirã Bernabé, Saulo mera Jesu yarãre itamupehotuhaja Jerusaléngue árĩnirã Antioquíague dujaa wañorã. Eropirã Ñure Marco waĩcugũre erã aĩgãñorã erã mera.

13

Jesu yarã Bernabére Saulo mera Goãmu yare buhedore obeoñorã

¹ Irisubure Antioquíague Jesu yarã gamenererã mera majarã, Goãmu yare weremuhtarã árĩñorã. Masare buherã ta árĩñorã erã sã. Bernabé, Simo Negro waĩcugũ, Lucio Cirene majagu, Manaén, Saulo mera erã árĩñorã. Manaénpu opu Herode muru mera erã perã yujuro mera ta masanirã árĩñorã. ² Eropirã erã Goãmu yare erã buherisubu, erã ba duhurisubu, Espiritu Santopu werepu erãre:

—Bernabére, Saulo mera apique yu gamero dopa iimorãre. Irire iimorãre beye apigu iiaa erãre, arĩpu Espiritu Santo.

³ Īḡu eroparĩcũ erãpũ ba duhu Goãmure serẽ, Bernabé weca Saulo weca erã mojotorire duhpeoñorã. Eropa duhpeorã erãre buhedorerã obeoñorã.

Chipregue Jesu ĩḡu apinirã buheñorã

⁴ Eropirã erã Espĩritu Santo ĩḡu obeonirã árĩrã, Seleuciague eja, iri macare tarigã, Chipre waĩcũri nuḡurogue ejañorã erã. ⁵ Eropirã Salamina waĩcũri peramague ejañorã. Iri maca judio masa buheri wirigue Goãmũ yare werenuḡañoñorã erã. Eropigũ Ñu Marco sã erã mera waha, erãre itamupũ.

⁶ Eropirã erã iri nuḡuro ojogoro maja. Pafu waĩcũri macague ejarã, yeere bocañañoñorã erã. Īḡu judio masũ Barjesu waĩcũḡu árĩpũ. Barjesu griego ya mera Elima erã arĩ piyugũ árĩpũ. “Goãmũ yare weremuhtagũ ãhraa yuhũ,” arĩ masare ḡyaniguicãḡu árĩpũ ĩḡu. ⁷ Eropigũ ĩḡu Sergio Paulo waĩcũḡu mera majagũ árĩpũ. Sergio Paulopũ iri nuḡuro majarã opũ masipehogũ árĩpũ. Eropigũ Goãmũ yare peediagũ erãre Bernabé, Pablo mera bocatĩripũ ĩḡu. ⁸ Eropigũ Elima yeepũ erãre buhedorebiriripũ. Īḡu Sergio Paulo Jesu yare ĩḡu umupeocũ gamesãbiripũ yeepũ. Sergio Paulore Goãmũ yare ĩḡu peecũ cãhmotadiaripũ. ⁹⁻¹⁰ Īḡu eropa buhedorebiri-querecũ ta Saulo, Pablo waĩcũḡu Espĩritu Santore õaro opagũ árĩḡu yeere õaro ãadihupi ĩḡure wererũ:

—Mũhũ ḡyariicũḡu, ñegũ, watĩ ĩḡu dorerire iigũ, õarire ĩhaturigũ ãhraa mũhũ. ¿Duhpigũ mari Opũ yare “Ñeri ãhraa. ḡyari ãhraa,”

eropa arĩniguicãri mũhũ? ¹¹ Mũhũ eroparĩra waja Jesu mari Opu mũre ĩgu pẽhrecũ cuiri ĩhajabigu arĩgũca mũhũ. Eropigu bajamenurigã mũhũ inurire ĩarisome, arĩpu Pablo.

Īgu eroparĩcũ ta ĩgu yeepũ imica iro dopa arĩrĩre ĩamũhtagũ, naitĩaro dihtare ĩapu ĩgu. Eropigu ĩgure tuã curibure amapu ĩgu. ¹² ĩgu eropa wacũ ĩagũ, Sergio Paulopũ Jesu yare “Diaye ta ãhraa,” arĩ masipũ. Mari Opu yare ĩgu pee, uca wa, Jesure umupeonũgarũ.

Pablo Bernabé mera Antioquía Pisidia yebague arĩri macague arĩñorã

¹³ Eropi Pablo sã Pafogue arĩnirã dohodiru mera waha, Pergegue ejañorã. Perge Panfilia yebague ãhraa. Eroque eja, Ñu Marcopũ erãre cohã wahgã, Jerusalengue waha wapũ. ¹⁴ Erãpu Pergegue arĩnirã waha, Antioquíague ejañorã. Antioquía Pisidia yebague ãhraa. Eroque ejarã, Sabadonũ arĩcũ erã judio masa buheri wihigue ñajaja, erogue doañorã. ¹⁵ Eropirã iri wihi majarã oparã Goãmũ dorerire, Moisegue marire ĩgu apirare, Goãmũ yare weremũhtanirã erã gojarare erã buhera pũhrũ erã sihubeoñorã Pablo sãre.

—Acawererã, ¿masare mũa werediarã iiri? Irire werediarã wereque dohparagã, arĩñorã iri wihi majarã oparã.

¹⁶ Erã eroparĩcũ peegũ, Pablo wahgãnũgaja, “Wereniguibĩricãque,” arĩgu ĩgu mojoto mera paaturũ. Erã ejarimaricũ ĩha, ĩgu õpa arĩpu:

—Israe masa, mũa mari Pagure umupe-orã, peeque. ¹⁷ Mari ñecũ sumarã mũra

Goãmure umupeomuriñuma. Erã murare Goãm beyemuriñumi. Eropirã erã mari ñecũ sumarã yoari boje Egiptogue árĩmuriñuma gajirã árĩquererã. Erogue erã árĩcũ Goãm õaro iimuriñumi erãre. Eropirã bajarã masa pore árĩñuma erã. Õpa iĩñumi erãre. Erãre Egiptogue árĩrãre ïgu turari mera aĩ wiuñumi Goãm. ¹⁸ Ìgu eropa wiura pũhrũ erã cuarenta bojori gohra masa marirogue curimuriñuma. Erogue ïgure erã tarinũgacũ Goãm eropa ta pepicãñumi. ¹⁹ Eropigu Canaa waĩcũri yebagure siete cururi majarãre cóãtuhaja, Goãm iri yebare oñumi Israe masapure. ²⁰ Iri yebare otuhaja cuatrocientos cincuenta bojori gohra masare doremorãre apimuriñumi Goãm Israe masare.

—“Goãm ïgu apinirã Samue ïgu árĩcũgue árĩtumuriñuma. Samuepũ Goãm yare weremũhtagũ árĩmuriñumi. ²¹ Samue árĩrisubu Israe masapũ erã opũ árĩbure amamuriñuma. Eropirã Goãmure serẽmuriñuma. Erã eropa serẽcũ ïagũ Goãm Saulore apimuriñumi. Saulo Cis magũ árĩñumi. Benjami ya curu majagũ árĩñumi. Eropigu cuarenta bojori gohra erã opũ árĩbure apiñumi Goãm ïgure. ²² Eropigu Goãm Saulore ïgu cóãra pũhrũ Davire apimuriñumi ïgu. Õpa arĩñumi Goãm Davire. “Davi Isaí magure bocabũ yũhũ. Ìgure mucubiria yũhũ. Ìgu yũ gamerire iipehogucumi,” arĩñumi Goãm. ²³ Ihĩ Davi ïgu pãrami árĩturiagũ ãhrimi Jesu. Goãm Jesure apidigu árĩmi Israe masare itamubure. “Masare

õaro iigũca,” arĩñumi Goãmũ. Īgu arĩdiro dopa ta iidi árĩmi ĩgu Jesu. ²⁴ Īgu eropa iiboro core Jesu ĩgu ariboro core Ñu waĩyegu õpa arĩ buhepũ: “Mua ñerire bujawereque. Ōaripũre gohrotoque. Eropirã waĩyesũnirã árĩque,” arĩ buhepũ Ñu árĩpehrerã Israe masare. ²⁵ Eropigu Ñu ĩgu buhetuboro core, ĩgu sĩriboro core õpa arĩ weremũripũ. “¿Nihino àhriri yũhu mua pepicũ? Iribojegue majagu Goãmũ yare weremũhtadigu árĩbeaa yũhu. Cristo árĩbeaa yũhu. Gajigu àhraa. Cristo yũhu árĩbiriquerecũ yu pũru yu tauro turagupũ arigũcumi. Īgupũ õatariagu àhrimi. Īgu iro dopa árĩbeaa yũhu,” arĩ werepũ Ñu masare, arĩpũ Pablo.

²⁶ “Acawererã, Abrahã pãramerã, árĩpehrerã mari Pagure gũhyadiaro ãarã, marire i ĩgu tauborore wereri buherire obeodi árĩmi mari Pagũ. ²⁷ Jerusalén majarã erã oparã mera Jesu erãre taugũ ĩgu árĩcũ masibirinirã árĩma. Sabadonũri árĩcũ Goãmũ yare weremũhtanirã erã gojarare buhequererã ta Jesure masibirinirã árĩma. Eropa masibirã Jesure wejẽdoreñorã. Eropa iirã Goãmũ yare weremũhtanirã erã gojadiro dopa ta iirã iĩnorã. ²⁸ Īgure erã wejẽboro core erã Jesure weresãriñorã. Īgu ñerire iibiri-querecũ ta erã Pilatore Jesure wejẽdoremorã serẽñorã. ²⁹ Eropirã iribojegue majarã erã gojadiro dopa ta Jesure iituhaja, ĩgure crusague árĩgure aĩdiju, masa gobegue utãyegue erã seara gobegue apiñorã erã ĩgure. ³⁰ Eropa erã ĩgure wejẽquerecũ ta Goãmũ masudi árĩmi

ĩgũre. ³¹ Eropirã Galileague arinirã Jerusaléngue ĩgũ mera ejanirã bajaranĩ ĩgũre sĩri masa deyodigũre ĩañorã. Eropirã dohpaguere ĩgũre erã ĩarare masare werema erã.

³²⁻³³ Eropa masare wereniguigũ òpa arĩ werenemopũ daja Pablo:

—Eropirã òari buherire werea gũa mũare. Goãmũ mari ñecũ sũmarãre “Masare òaro iigũca,” iribojegue ĩgũ arĩdiro dopa ta dohpaguere marire erã acawererãre iiami. Irire ĩgũ wererare òpa iiami ĩgũ. Goãmũ Jesure masudi árĩmi. Eropirã Jesure ĩgũ masurare werea gũa mũare. Salmopũgue iribojegue ĩgũ òpa arĩ gojadiro dopa eropa wayoro Jesure: “ ‘Mũhũ yũ magũ ãhraa. Dohpagãre mũre dehyoacũ iiabũ,’ arĩmi Goãmũ ĩgũ magũre,” arĩ gojañumi iribojegue. ³⁴ Eropigũ Goãmũ Jesure ĩgũ masuburire dipaturi ĩgũ sĩribiriborore weregũ òpa arĩ were gojadoreñumi Salmopũgue: “Davire yãhũ mójomoro ĩadiro dopa ta diaye ta òaro iigũra mũa sãre,” arĩ gojadoreñumi. ³⁵ Eropigũ gaji Salmo sãre òpa ta arĩ wereñumi: “Goãmũ mũ òagũ ĩgũ dũpũre boadorebirabũ mũhũ,” arĩ gojañumi. ³⁶ Eropigũ Davi Goãmũ ĩgũ gamediro dopa ta ĩgũ árĩrasubu majarãre itamumũriñumi. Pũhrũ ĩgũ sĩria wañumi. ĩgũ sĩrira pũhrũ ĩgũ pagũ sũmarãre erã iidiro dopa ta yaañuma ĩgũ sãre. Eropigũ ĩgũ boa wañumi. ³⁷ Eropigũ ihĩ Jesu Goãmũ ĩgũ masudigũpũ ne boabiridi árĩmi. ³⁸ Eropirã mũa, yũ acawererã, ire masique: Goãmũ mũa ñerire ĩgũ cóãborore mũare ire werea gũa. Jesupũ mũa ñerire cóãbu ãhrimi. ³⁹ Eropigũ ĩgũre umupeorãre erã ñero iirare

cãdijicãgucumi ïgu. Moiserere ïgu apira dorerire mua iira mera Goãmũ pohroque wasome mua. Eropigũ iri dorerire iiri mera taridiarãre erã ñerire cóasome Goãmũ. ⁴⁰ Eropirã õaro iique. Mua õaro iibiricũ Goãmũ ya weremũhtanirã erã gojadiro dopa ta mũare waroca. Õpa arĩ gojañuma:

⁴¹ Peeque mua queoricurã. Yũre ïhaturirã ãhraa mua. Yũ õpa iicũ güique mua. Eropirã peamegue waque. Mua árĩrinurire mũare ii ïhmugũra. Yũ eropa ii ïhmucũ ïaquererã “Diaye ta ãhraa,” arĩsome mua. Gajigũ irire mũare ïgu õaro werequerecũ ta “Diaye ta ãhraa,” arĩsome mua, arĩ gojañumi Goãmũ yare weremũhtadigũ, arĩ wererũ Pablo erãre.

⁴² ïgu eropa arĩ werera pũhrũ judio masa buheri wihigue erã wiriara pũhrũ judio masa árĩbirãpũ erãre serẽñorã.

—Gaji semanague Sabado árĩcũ ire buheba daja guare, arĩ serẽñorã erã Pablore.

⁴³ Eropirã iri wihigue árĩnirã wiria, judio masa bajarã, judio masa árĩbirã sã Pablo, Bernabé sã mera wañorã. Judio masa árĩbirã judio masa yare buherã árĩñorã. Erã erã mera wacũ Pablo Bernabé mera õaro wereñorã erãre. “Goãmũ mũare mahimi. Eropirã ïgũre umupeorã árĩniguicãque,” arĩ buheñorã erã.

⁴⁴ Eropirã gaji semanare Sabado árĩcũ árĩpehrerã Jesu yare peediarã gamenereñorã.

⁴⁵ Eropirã judio masapũ bajarã masa Jesu yare peediarã gamenerecũ ïarã guañorã. Eropa guarã, erã gajiropa arĩ werenigui, Pablore ñero

quere goroweoñorã. “Mũare ïgu buheri diaye árĩbeaa,” arĩñorã erã. ⁴⁶ Erã eroparĩcũ peerã, Pablo, Bernabé mera erãre quere goroweonirãre güiro mariro wereñorã.

—Goãmũ ïgu doreldiro dopa ta mũare judio masare buhemũhtarabũ gua. Mũapũ irire gamebirituhabũ. Ûmuri nũcu Goãmũ mera árĩniguicũ sãre gamebirituhabũ mũa. Eropirã guapũ judio masa árĩbirãpũre buhenũgarãca.

⁴⁷ Õpa ta doreñumi mari Opũ guare:

Mũa judio masa árĩbirãre buherã erãre Goãmũ yare õaro masicũ iirãca mũa. Eropigu mũa yoarogue árĩrãre mũa buhecũ peerãre erãpũre peamegue wabonirãre taugũca yũhũ, arĩ wereñumi Goãmũ guare ïgu yare gojarapũgue, arĩ werepũ Pablo, Bernabé mera.

⁴⁸ Erã eroparĩcũ peerã judio masa árĩbirãpũ mucubiriñorã. “Mari Opũ yapũ õari ãhraa,” arĩñorã erã. Eropirã Goãmũ ïgu gamenirã, ãmuri nũcu ïgu mera erã árĩniguiborore ïgu odianirã Jesure umupeonũgañorã. ⁴⁹ Eropirã mari Opũ Cristo yare iri yebague werepehoñorã. ⁵⁰ Erã eropa iicũ ïarã judio masa suãbiria wañorã. Erogue mari Pagure umupeorã nome, õarã nome árĩñorã. Eropirã judio masa Pablo sãre ñero wereniguñorã. Erã eropa wereniguicũ peerã erã nome Pablo mera Bernabé mera guañorã. Eropirã iri maca majarã oparã sã erã mera guañorã. Eropa quarã ero majarã ñero iñorã Pablo sãre. Erã eropiira, pũhrũ Pablo sãre erã ya yebague árĩrãre cohã wiucãñorã. ⁵¹ Erã eropa iicũ ïarã, Pablo Bernabé

mera erã guburi maja nicure pasiripiñorã iri maca majarã erã ñeri wajare ñhmurã. Eropa iituhaja erã Iconiogoue waha wañorã. ⁵² Eropirã erã Jesu yarã wuaro mucubiri, Espíritu Santo wuaro ñgu dorediro dopa iirã iñnorã.

14

Pablo Bernabé mera Iconiogoue árñnorã

¹ Eropirã Iconiogoue árñrã Pablo Bernabé mera judio masa buheri wihigue ñaja, Jesu yare wereñorã. Eropirã judio masa bajarã Jesure umupeonugañorã. Eropirã judio masa árñbirã sã Jesure umupeoñorã. ² Judio masa Jesu yare peediabirãpũ judio masa árñbirãre Jesu yarã mera erã guacũ iñnorã daja. Erã eropa iicũ judio masa árñbirã ñero pepiñorã Jesu yarãre. ³ Erã eropa pepicũ ñarã Jesu yarãpũ Pablo sã erogoue yoari boje árñrã, guiro mariro mari Opũ yare õari buherire buheñorã. Goãmũ masare ñgu mahirire buheñorã. Erã eropa buherisubu Goãmũ turari mera deyoro moarire ii ñhmuñorã, "I buheri diaye ta ñhraa," arĩ ñhmurã. ⁴ Eropirã iri maca majarã deco mera judio masa yare gamerã dujañorã. Deco mera ta Jesu yare gamerã sã dujañorã. Erã pe curu dũca wariñorã. ⁵ Eropirã Jesu yare gamebirãpũ judio masa sã árñbirã, judio masa sã erã oparã mera gamenere Jesu ñgu apinirãre ñero iidiariñorã. Utã mera dea wejediariñorã erãre. ⁶ Erã eropa iidiarire masirã, Pablo, Bernabé mera Licaonia yebague duhrigã waha wañorã. Iri yeba árñri macari tari wahgã Litra waĩcũri macare Derbe waĩcũri

maca sãre ejañorã. ⁷ Erogue ejarã, òari buherire buheñorã daja erã.

Listrague Pablore utã mera deañoã

⁸ Eropii Listrague curimasibigu doapu. Ìgu ne masa dehyoagugue ta curimasibiridigu árĩpu. ⁹⁻¹⁰ Eropigu Ìgu Pablo ìgu buhecũ peepu. Ìgu peerisubu Pabloru ìgu dihtare ìapu. Ìgure ìanuru òpa arĩ pepĩpu: “Ihĩ Jesure umupeomi. Eropigu ‘Jesu yare dũpu òacũ iimasimi,’ arĩ pepĩgu iicumi,” arĩ pepĩpu Pablo curimasibigure. Eropa pepĩgu turaro mera òpa arĩpu Pablo ìgure: —Wahgãnũgajaque, arĩpu Pablo ìgure.

Ìgu eroparĩcũ peegu ta curimasibigupu buhrimanũgaja, wapu. ¹¹ Pablo ìgu eropa iicũ ìarã masa gaguiniguñorã. Erã Licaonia ya mera òpa arĩ gaguiniguñorã:

—Goãmarã masa dopa bejarã umarogue árĩrã mari pohrogue dijarama, arĩ gaguiniñorã erã.

¹² Eropirã erã Bernabére “Mari goãmu Zeus àhrimi,” arĩ piyuñorã. Eropirã Pablo buhemũhtadigu opu iro dopa ìgu árĩcũ ìarã “Mari goãmu Hermes àhrimi,” arĩ piyuñorã erã ìgure. ¹³ Eropirã Zeure umupeorã ya wihi iri maca tũro pohro árĩyoro. Eropigu Zeus yarã erã pahipu iri wihigue árĩgu macague ñajariri disiporo pohrogue wecũare, gori amurare aĩgãripu. Iri mera Pablore Bernabére “Mari goãmarã àhrima,” arĩ umupeodiariñorã. Eropirã erã wecũare soemuju Pablore, Bernabére umupeodiariñorã. ¹⁴ Erã eropa iidiacũ ìarã Pablo, Bernabé mera erã basi erã ya suhrire yehguenũgañorã erã bujawererire

masare ìhmurã. Erã yehguenugara pũhrũ masa watope omagã, gaguiniguiñorã erã.

15 —Mũa õpa iibircãque. Gũa sã mũa iro dopa ta masa ãhraa. Mũa õpa iiri ne duhpiburi árĩbeaa. Eropirã mũare õarire buherã ahrabũ. Õpa iirire duhudorerã arirã iiabũ. Oã mũa goãmarãre mũa wéanirãre ñerãre cóãcãque. Eropirã Goãmure ojo-carigũpũre umupeoque. Goãmũpũ ɸmarore, yebare, wũariyare, árĩpehrerire, árĩpehrero majarãre iigũ ãhrimi. 16 Eropigũ ìgũ iribojegue árĩpehreri macari majarã erã gamero iirare eropa ìacãñumi. 17 Ìgũ eropa ìacãqueregũ ìgũ árĩricũrere ìhmumi marire. Ìgũ masare õarire ii, deco aricũ ii, dũcare oo, masare barire oniguimi. Ìgũ eropa ocũ masa mucubirima. Eropa ta ìgũ árĩricũrere ìhmumi masare, arĩpũ Pablo, Bernabé mera.

18 Eropirã erã eroparĩcũ peequererã ta masa wecũare wejẽ soemuju erãre umupeodiariñorã. Eropa erã umupeodiacũ ìarã erãre eropa iidore-biriñorã Pablo sã. Erã eropa iirire duhudiabiri-quererã duhuñorã.

19 Eropii gajirã judio masa Antioquía majarã, Iconio majarã sã Listrague ejañorã. Erogue ejarã, Pablöre ñero wereniguñorã ero majarãre. Erã eropa wereniguicũ peerã masa ìgũ mera guanũgañorã. Eropa guarã masapũ ɸtã mera deañorã Pablöre. ɸtã mera ìgũre deatuhaja, “Ìhĩ sĩria wahámi,” arĩrã, iri maca tũro pohrogue ìgũre taragã mehpicã, waha wañorã. 20 Erã eropiiquerecũ Jesu yarã Pablo

pohro erã gamenerenugajacũ gohra Pablo masa wahgãnugaja, erã mera macague waha waru. Eropirã gajinu iġu Bernabé mera Derbegue waru.

²¹ Eropirã erã erogue erã õari buherire bajarã masare erã werera pũru, erã Listrare eja daja iri macare tarigã, Iconiore eja daja iri macare tarigã, Antioquia Pisidia yebague áriri macare ejañorã daja. ²² Iri macarigue ejarã, ero majarã Jesu yarãre õari buherire wereñorã daja. Erãre õaro siporãcũcũ iĩñorã. Eropirã Jesure umupeodoreniguicãrã õpa arĩ wereñorã erãre.

—Goãmu árĩroguere mari wadiarã, burigã marire ñero tariro gahmea, arĩ wereñorã erã.

²³ Eropirã macari nũcu majarãre Jesu yarãre erã oparã árĩmorãre apiñorã Pablo Bernabé mera. Eropirã erã ba ðuhura pũru Goãmure serẽñorã.

—Opũ, oã mu yarãre ïhadibuque, arĩ serẽbasañorã erã Goãmure erã umupeogure.

Pablo Bernabé mera Antioquiague erã árĩmũhtara macague dujaa wañorã

²⁴ Erã eropa iira pũru erã Pisidia yebague tariara pũru waha wañorã Panfilia yebague.

²⁵ Eropirã Pergeguere erã buhetuhaja Atalia waĩcũri macague buha wañorã. ²⁶ Eropirã iri macague eja, Antioquiague dujaarã, dohodiru mera waha wañorã. Iri maca coregue erã árĩnicũ Jesu yarã Goãmu yare buhedorerã Pablo sãre obeoñorã. Eropa obeorã Goãmure õpa serẽñorã:

—Goãmu, mu mahiri mera oãre ïhadibuque, arĩ serẽ, obeoñorã erã.

Eropirã erã buhedorerare buhepehonirã árĩrã Pablo Bernabé mera dujaniñorã iri macare. ²⁷ Eropirã erã Antioquíague erã dujajara pũhrũ Goãmũ yarã mera gamenere, Goãmũ ĩgu turari mera erã iirare werepehoñorã erã. Judio masa árĩbirã sã Goãmũ yarã erã warare wereñorã erã. ²⁸ Eropirã Pablo sã eroguere Jesu yarã mera yoari boje árĩcãmuriñorã.

15

Jerusaléngue Jesu yarã gamenereñorã

¹ Eropi Judea yeba majarã bajamerãgã Antioquíague ejarã, Jesu yarãre õpa arĩ buhenũgañorã erã.

—Goãmũ ĩgu dorerire Moisere apigu õpa arĩ apimuriñumi. Árĩpehrerã erã dũpũre miri gasirogã erã wiri aĩborore were apimuriñumi Moisere. Mũa irire iibiricũ Goãmũ mũare tau-some, arĩ buheñorã erã ero majarãre.

² Erã eropa arĩ buhecũ peerã Pablo Bernabé mera gamebiriñorã. Iri buherire bũrigã game dũyasoñorã Judea yeba majarã mera. Erã eropa game dũyasora pũhrũ Jesu yarãpũ Pablöre, Bernabére, gajirã ero majarã sãre Jerusaléngue obeoñorã. Judea yeba majarã erã buherire Jesu ĩgu apinirãre Jesu yarã oparã sãre serẽpi ĩadorerã obeoñorã Pablo sãre.

³ Eropirã Jesu yarã erãre erã obeocũ waha, Fenicia yebare eja tarigã, Samaria yebague ejañorã. Iri macarigue ejarã, judio masa árĩbirã Goãmũ yare erã gemenũgarare wereñorã erã ero

majarãre. Erã eropa werecũ peerã ero majarã Jesu yarã buriã mucubiriñorã.

⁴ Eropirã erã Jerusaléngue ejacũ ñarã ero majarã Jesu yarã Jesu ñgu apinirã, ñgu yarã oparã mera mucubiriri mera ñaro bocatiriñorã erãre. Eropirã Pablo, Bernabé gajirã mera Goãmũ ñgu turari mera erã iirare wereñorã Jerusalén majarãre. Judio masa árĩbirã Jesu yarã erã wara sãre wereñorã erã. ⁵ Erã eropa werequerecũ erogue fariseo masa Jesu yarã bajamerãgã árĩñorã. Eropirã erã eroguererã wahgãñgaja, ñpa wereñorã.

—Erãre judio masa árĩbirãre erã ñupure miri gasirogãre wiriro gahmea. “Goãmũ Moiserẽ ñgu dorerare iique mũa sã,” arĩro gahmea erãre, arĩñorã erã fariseo masa.

⁶ Erã eroparĩcũ pee, Jesu ñgu apinirã, Jesu yarã oparã mera irire amudiarã, gamenereñorã.

⁷ Eropirã erã yoari boje erã wereniguira pũhrũ Pedro wahgãñgaja, werepũ erãre.

—Acawererã, iribojegue yũhũ mũa mera árĩgure Goãmũ ñpa iidoregũ yũre apimi. Ñgu yũre ñari buherire judio masa árĩbirãre were-doregũ apimi. Erãre Jesure umupeodoregũ yũre erãre buhedoremi. ⁸ Eropigũ Goãmũ masa erã pepirire masimi. Eropigũ ñgu judio masa árĩbirãre ñgu yarãre ñgu iirare ñhmubu ñgu Espĩritu Santore ohãmi erãre marire ñgu iidiro dopa ta. ⁹ Eropa ogũ ñgu marire erã sãre yujuropa ta ñaro iimi. Erã ñgure umupeocũ erã ñerire cadijimi ñgu. ¹⁰ Maripũ Moise dorerire yujuro bojebeaa. Mari ñecũ samarã mũa sã

irire yujuro bojebirimariñuma. ¿Eropa mari yujuro bojebiriquererã duhpirã Jesu yarãre judio masa árĩbirãre irire Moise dorerire iidorediari m̄aa? ¿Duhpirã Goãm̄u judio masa árĩbirãre ïḡu yarã wacũ ïḡu iirare “Ero wabeaa,” arĩri m̄aa? ¹¹ Eropa arĩbirã mari õpa pepia. Dohpaguere judio masa árĩbirã iro dopa ta mari sãre mari Op̄u Jesu mahiri mera Goãm̄u tauḡucumi, arĩp̄u Pedro erãre.

¹² ïḡu eroparĩcũ peerã arĩpehrerã ejarimaria wañorã. Eropirã Pablo Bernabé mera judio masa árĩbirã watope Goãm̄u turari mera erã ii ïhmurare wereñorã erãre. ¹³ Eropa erã weretuhajara p̄hr̄u Santiago sã werep̄u.

—Acawererã, peeque ȳre. ¹⁴ Goãm̄u judio masa árĩbirãre ïḡu yarã arĩmorãre ïḡu ne iirare weretuhajami Pedrop̄u. ¹⁵ Iribojegue Goãm̄u ya werem̄htanirã erã werediro dopa ta eropa wahab̄u judio masa árĩbirãre. Õpa arĩ Goãm̄u wereniguirire gojañuma erã iribojegue:

¹⁶ Iribojeque Davi m̄ur̄u ya curu majarã erã oparã arĩra pehrea wab̄u. P̄hr̄u dujariḡuca ȳh̄u. Eropiḡu dipaturi ïḡu ya curu majaḡure op̄u acuḡuca. ¹⁷ Ȳu eropa acura p̄hr̄u arĩpehrerã judio masa árĩbirã ȳre erã op̄ure gamerãcoma erã. “Yaharã arĩque,” ȳu arĩ sihubeorãp̄u ȳre gamerãcoma. ¹⁸ Eropa ta arĩmi mari Op̄u. Iribojegue ïḡu ïre masare werem̄rip̄u, arĩ gojañuma Goãm̄u ya werem̄htanirã.

¹⁹ “Eropiḡu õpa pepia ȳh̄u, arĩp̄u daja Santiago. Judio masa árĩbirãre Goãm̄u yare ne gamen̄garãre baja iidorebircãrã mari.

²⁰ Eropirã erãre goja, obeorã mari. Ôpa arĩ gojabeorã. “Goãmarã wéanirãre erã umupeora barire babiricãque. Eropirã nome mera ñero iibiricãque. Nome sã uma mera ñero iibiricãque. Eropirã wuunugu mohwejênirãre waimurãre babiricãque. Dire ihribiricãque,” iripêta arĩ were gojabeorã. Iri doreri Moise apira doreri sã ãhraa. ²¹ Yoari boje judio masa buheri wirigue Sabado árĩcũ Goãmũ Moiserẽ ãgu apira dorerire buhemurima masa. Eropii árĩpehreri macarigue Moise dorerire buhemurima masa. Eropirã yu arĩdiro dopa ta judio masa árĩbirãre Jesu yarãre were gojabeocũ, judio masapũ pee, “Gua iiguari ta ãhraa,” arĩrãcoma, arĩpũ Santiago.

Judio masa árĩbirãre erã gojarapũ obeoñorã

²² Eropirã Jesu ãgu apinirã, Jesu yarã oparã árĩpehrerã Jesu yarã mera Santiago arĩrãre peerã, “Eropa ta iirã,” arĩñorã. Tuhajanugu erã mera majarãre beyeñorã erã obeomorã. Antioquíague Pablo, Bernabé mera erã wamorãre erã beyeñorã. Eropirã erã Judare, Sila mera beyeñorã erã obeomorã. Judapũ Barsabá peñe waĩcũpũ. Erã beyerã acawererã Jesu yarã erã umupeonirã árĩñorã. ²³ Erãre erã beyera pũhrũ Jesu yarã gojabeorapũre obeoñorã erã mera. Ôpa arĩ gojañorã erã:

—Jesu ãgu apinirã, Jesu yarã oparã, mũa acawererã Jesu yarã mera gua ãadorea mũare. Árĩpehrerã judio masa árĩbirã Antioquíague, Siriague, Ciliciague árĩrãre mũare Jesu yarãre ãadorea gua. ²⁴ Gua mera majarã mũa pohrogue

ejarã, mware baja dorerire iidoreañorã. Eropirã mware gariboañorã. Erã Goãmũ dorerire Moiserẽ ãgu apiraguere, mwa dũpũ merogã gasirogãre wiriri sãre iidoreañorã. Guapũ erãre irire buhedorerã obeobirabũ. ²⁵⁻²⁶ Eropirã gwa árĩpehrerã mwa pohrogue obeomorãre gwa beyeabũ. Mari mera majarãre, mari mahirãre, Pablo, Bernabé mera Cristo Jesu mari Opũ yare güiro mariro erã buhecũ bajasuburi gajirã erãre wejëbocuriñorã. Erã eropa wejëbocuricũ merogã mera tarimuriñorã erã. Erã Pablo, Bernabé mera gwa beyenirãre dohpaguere obeoa. ²⁷ Eropirã Juda, Sila mera mwa pohrogue obeoa. Gwa gojabeorare erãpũ mware wererãcoma. ²⁸ Espíritu Santo ãgu guñaro dopa ta gwa sã pepia. Ōpa ãhraa iri: Gaji doreriguere apibeaa mware. I doreri dihtare apirãca mware. ²⁹ Goãmarã wéanirãre erã umupeora barire babiricãque. Dire ihribiricãque. Wũũũgu mo-hwejëñirãre waimurãre babiricãque. Eropirã nome mera ñero iibiricãque. Nome sã ũma mera ñero iibiricãque. I gwa eropa dorera iibirã õarire iirã iica mwa. Iripëta ãhraa mware gwa werediari, arĩ gojabeoñorã Jesu yarã Jerusaléngue árĩrã.

³⁰ Iripũre gojatuhaja, wiañorã Antioquíague warãre. Erã wiara pũhrũ waha, Antioquíague ejañorã. Erã erogue ejara pũhrũ bajarã masare gameneredore, erã gojarapũre wiañorã erãre. ³¹ Iripũre erã buhera pũhrũ, iri õarire erã werebeorare peerã, õaro mucubiriñorã. ³² Juda, Sila mera Goãmũ yare weremãhtarã árĩñorã.

Eropirã yoari boje Jesu yarãre Goãmũ erãre ïgu weredorerare wereñorã. Erã eropa werecũ peerã, Jesu yarãpũ mucubiri ðaro sïporãcũñorã. ³³ Eropirã Juda, Sila mera erogue bajamenurigã erã árïra pũhrũ erã dujaricũ, ero majarã erã goeriserecũ, “Õaro waque mũa,” arĩñorã Antioquía majarã. Eropirã Juda sãre obeonirãre ðadorebeoñorã. Erã eropa arïra pũhrũ Juda waha warũ. ³⁴ Silapũ dujarũ Antioquíague. ³⁵ Eropirã Pablo Bernabé sã bajamenuri dujañorã iri maca ta daja. Eropirã erã gajirã bajarã mera Jesu yare buhe wereñorã.

Dipaturi Pablo ðari buherire buhecurigũ warũ daja

³⁶ Eropii bajamenuri pũhrũ Pablo werepũ Bernabére.

—Ina, árïpehrerãre mari buhenuganirãre ïhacurirã warã daja, arĩpũ Pablo.

³⁷ Eropigũ Bernabépũ Ñure erã mera aïgãdiaripũ. Ñu Marco peñe waĩcũpũ.

³⁸ Pablopũ ïgũre aïgãdiabiripũ. Ero core ïgu erã mera Panfiliague ejagũ erãre cohã dujaa warũ. Eropigũ ïgu erã iirire yujuro bojebiri dujaa warũ. ïgu eropa yujuro bojebiricũ ïagũ Pablo dipaturi ïgũre aïgãdiabiripũ. ³⁹ ïgu aïgãdiabiricũ ïagũ Bernabé Pablo mera erã basi perã bũrigã arĩ game erã basi purumujucãñorã.

Erã eropa arïra pũhrũ Bernabépũ Chipre waĩcũri nũgũrogue Marcure aĩtaribuja warũ.

⁴⁰ Pablopũ Sila mera waha warũ. Eropirã erã buherã waboro core Jesu yarã erãre obeorã, “Goãmũ mũare ðaro ïhadibuporo,” arĩñorã.

Erã eropa arĩra pũhrũ, Pablo Sila mera waha warũ. ⁴¹ Eropã warã, Siria yeba, Cilicia yeba sãre eja, erogue Jesu yarãre õaro sĩporãcũ iri erã mucubiricũ iĩñorã erã.

16

Timoteo Pablo Sila mera wapicũgãpũ

¹ Erã eropa iira pũhrũ Pablo sã Derbegue, Listrague ejañorã. Erogue ejagũ Timoteore boca-japũ. Timoteo Jesu yagũ árĩgũ, judio maso magũ árĩpũ ĩgũ. ĩgũ pago sã Jesu yago ta árĩpo. ĩgũ pagupũ Griego masũ árĩpũ. ² Eropirã Lистра majarã, Iconio majarã, Jesu yarã Timoteore masa “Õagũ ãhrimi,” arĩ weremuriñorã. ³ Eropigũ Pablo Timoteore aĩgãdiapũ. Eropirã iri yeba majarã judio masapũ Timoteo pagũ griego masũ ĩgũ árĩcũ masiñorã. Eropigũ Pablo judio masare guari arĩgũ, Timoteo dũpũre miri gasirogã wiri aĩpũ. Judio masa doreri iri arĩro dopa ta iipũ ĩgũre. ⁴ ĩgũ eropa iira pũhrũ waha erã ejari macari majarãre erã gojabeorapũ majare wereñorã. Iripũ Jesu ĩgũ apinirã, Jesu yarã oparã mera Jerusaléngue arĩrã erã gojabeorapũ árĩyoro. Eropirã erã iri dorerire õaro wereñorã ero majarã Jesu yarãre. ⁵ Erã eropa werecũ peerã, Jesu yarãpũ Jesure umupeonemoñorã. Eropirã Jesu yarã mũmũri nũcũ bajarã wanigũicãñorã.

Pablo quẽroque Macedonia majagũre ĩapũ

⁶⁻⁷ Eropigũ Asia yebaguepũre õari buherire buherã wadorebiripũ Espĩritu Santo erãre. Eropirã erã Frigia yebare taria, Galacia yebare

taria, Misia yeba turo pohro ejañorã. Bitinia yebapũ wadiariñorã erã. Eropigũ Espiritu Santopũ erãre eroguerẽ wadorebiripũ. ⁸ Ìgũ eropa dorera pũhrũ erãpũ Misia yebare tarigã, Troague erañorã. ⁹ Erogue ìgũ erara pũhrũ iri ñamire õpa quẽpũ Pablo. Macedonia yeba majagũ ìgũ pohro niguicũ ñapũ ìgũ. “Gũare Macedonia yeba majarãre itamugũ arique,” arĩ, sihurũ ìgũ Pablõre. ¹⁰ Ìgũ eropa quẽra pũhrũ wahgã, gũa yare amutuhaja, Macedoniague waha wabũ gũa. “Goãmũ iri yebare õari buherire buhedoregũ iimi marire,” arĩ pepibũ gũa.

Pablo, Sila mera Filipogue árĩpũ

¹¹ Eropirã gũa Troague árĩrã dohodiru mera Samotracia waĩcũri nũgũrogue taribujabũ gũa. Eropirã gajinũ Neápoligue wabũ gũa. ¹² Iri macare taria, Filipogue Roma majarã ya macague ejabũ gũa. Iri maca Macedonia yeba árĩri maca árĩbũ. Gũhyadiari maca árĩro iibũ. Eroguere bajamenurigã gũa árĩbũ. ¹³ Eropirã Sabado árĩcũ gũa iri maca turo pohrogue, dia weca pohrogue ejabũ. Ero Goãmũ mera erã wereniguiro árĩbũ. Ero doarã ero gamenererã nome mera weretamubũ gũa. ¹⁴ Yujugo gũare peego Tiatira majago Lidia waĩcũgo árĩmo. Eropigo igo õari suhri wajacũri suhrire duago árĩmo. Mari Pagũ Goãmũ sãre umupeogo árĩmo. Eropigũ Pablo ìgũ wererire õaro peecũ iimi Goãmũ igore. ¹⁵ Eropii igore igo ya wihi majarã mera waĩyemi Pablo. Ìgũ eropa waĩyera pũhrũ õpa arĩmo igo:

—“Jesu yago āhraa,” arāa m̄ua s̄a ȳure. Eropirā yaha wihi ñajarinique m̄ua. Ȳu mera dujanique, arīmo igo ḡuare.

Igo eroparīcū peerā igo ya wihi dujanib̄u ḡua. ¹⁶ Gajin̄u Goām̄u mera erā wereniguirogue ḡua wacū watī ñajasūdigo bocatīrimo ḡuare. Igo gajirā pohro majago árīmo. Eropigo igo masare “Ōpa waroca m̄uare,” arī wereyugo árīmo. Irire masare werego w̄uaro wajatabasamo igo oparāre. ¹⁷ Eropigo Pablo mera ḡua wacū, ḡuare n̄ur̄sia, gaguiniguimo igo.

—Oā Goām̄u turatariḡu īḡu itumurā āhrima. Mari s̄irira p̄uhr̄u Goām̄u marire īḡu ōaro tauborore werema erā, arī gaguiniguimo igo.

¹⁸ Bajan̄ari eropa arī garibomo Pabl̄ore. Igo eropa arī gaguiniguicū daja Pablo gamebiḡu maji īha, ōpa arīmi watīre:

—Jesucristo turari mera dorea m̄ure. Iгоре duhuque. Wanisa m̄uh̄u, arīmi Pablo.

Īḡu eroparīcū ta watīp̄u waha wap̄u.

¹⁹ Watī igure eropa wara p̄uhr̄u igo ōago dujago masa erā waburire werego árībirimo pare. Eropirā igo oparāp̄u niyerure igo wajatabigo igo wacū ĩarā, erā Pablo Sila mera ñeama. Nehatuhaja, erāre taragāma iri maca decogue oparā pohroque. ²⁰ Eropa aīgārā, dipuwaja moadorerā pohroque erāre apima erā ōpa arīrā:

—Oā judio masa mari ya macare gariborā iima. ²¹ Erā mari dorerire cóadorerā, gaji buherire buherā iima. Mari ya dorerire tarinugacū iidiarā iima. Mari Roma majarā árīrā oā erā wererip̄ure iimasibea mari. Eropirā

erã buherire mari gamebeaa, arĩma igo oparã dipuwaja moadorerãre.

²² Erã eroparĩcũ peerã masa bajarã Pablo sã mera guatariacãma. Eropirã dipuwaja moadorerãpũ Pablo Sila sã ya suhrire erã yehgue cóãra pũhrũ mũta yucugã mera tãradorema erãre. ²³ Bũrigã erã tãrara pũhrũ peresu iima erãre. Erã eropa peresu iira pũhrũ peresure coregure õaro ãhadibudoreñorã erã. ²⁴ Erã eropa dorera pũhrũ erãre coregũpũ iri wihi poheca maja taribugue erãre apĩ, taboamiji goberigue sĩhacu erã guburire bihacãpũ. ²⁵ Nãmi deco Pablo, Sila mera Goãmũre serẽ ãgure bayapeoñorã. Erã eropa bayacũ peeñorã gajirã peresugue árĩrã. ²⁶ Erã eropa bayacũ ta iri wihi bũrigã ñohmeyoro. Ero eropa ñohmecũ yujuro mera árĩpehreri disiporori pãrimaapehrea wayoro. Peresugue árĩrãre erã diriradari sã pãrisiri dija wayoro. ²⁷ Eropa wacũ ãagũ, iri wihire coregũpũ wahgã, ãgũ ñoserimijire aĩbeo, ãgũ basi ñosediaripũ. ²⁸ ãgũ eropa iicũ ãagũ Pablo ãgure bũrigã gaguinigi õpa arĩpũ.

—Mũ basi ñero iibiricãque. Árĩpehrerã õre ãhraa gua, arĩpũ ãgũ erãre coregure.

²⁹ ãgũ eroparĩcũ peegũ erãre coregũpũ sihãgodore, erã pohrogue omagã Pablo, Sila guburi pohrogue naragã merejapũ ãgũ. ³⁰ Eropigũ ãgũ erãre iri taribugue árĩrãre aĩ wiria, serẽpipũ erãre.

—¿Dohpa iigũcuri yũhũ Goãmũ ãgũ yure taucũ gamegũ? arĩ serẽpipũ ãgũ.

31 —Jesucristore umupeoque mũhũ. Mũ acawererã sã ĩgũre umupeoporo. Mũa eropa iicũ Goãmũ mũare taugũcumi ĩgũ pohro mũa waboro dopa, arĩ wereñorã erã.

32-33 Erã eropa arĩrisubu ñami deco pũhrũgã árĩyoro. Erã eropa arĩra pũhrũ erãre coredigũ ĩgũ ya wihigue aĩgãpũ erãre. ĩgũ ya wihigue aĩja, erã camire coerpũ ĩgũ. ĩgũ eropa coetuhajara pũhrũ ĩgũ acawererã mera Goãmũ yare buhepũ Pablo sã. Erãre ĩgũ buhera pũhrũ waĩyepũ. 34 Erãre waĩyetuhajara pũhrũ erãre coredigũ Pablo sãre bari peopũ. Eropirã ĩgũ ĩgũ acawererã mera õari buherire erã peera pũhrũ burigã mucubiriñorã. Goãmũre masinũgañorã.

35 Boyodiji merēcũ ĩarã oparãpũ erã surarare peresugue obeoñorã Pablo sãre wiudorerã. 36 Erã eropa wiudorera pũhrũ iri wihire coregũpũ Pablo sãre werepũ.

—Oparã mũare wiudoreañorã. Eropirã gũiro mariro wirique, arĩpũ ĩgũ Pablo sãre.

37 Eropa erã wiudiaquerecũ ta Pablo werepũ surarare:

—Gũa ñero iibirabũ. Eropirã gũa ne dipuwaja mara. Bu gohra ta erã oparãpũ masa bajarã erã ĩhurore yucũ mera tãrama gũare. Gũa Roma majarã gũa árĩquerecũ ta gũare tãrama. Tãratuhaja peresu iiama gũare. Eropirã dohpagueere masa erã ĩabiro wiudiana gũare, gũare erã ñero iirare gũhyasiuro tariri, arĩrã. Oparã erã basi ta ahri aĩ wiurã ariporo gũare, arĩpũ Pablo surarare.

38 ĩgũ eropa arĩ werecũ peerã dujaa wereñorã oparãre surarapũ. Erã eropa arĩ werera pũhrũ

Pablo Sila mera Roma majarã erã árĩcũ masirã oparãpũ güi árĩñorã. ³⁹ Eropirã erã Pablo sã pohro ejarã, õpa arĩñorã:

—Ñero iiabũ gũa mũare. Ne eropa dipaturi iisome, arĩñorã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiridoreñorã. ⁴⁰ Eropirã Pablo Sila mera peresugue árĩnirã wiri, Lidia waĩcũgo ya wihigue eja, Jesu yarãre bocatĩriñorã. Eropirã erã Jesu yarãre õaro wereñorã. Õaro sĩporãcũcũ iĩñorã erãre. Erã eropa iira pũhrũ Pablo Sila mera waha wañorã.

17

Tesalónica majarã guañorã Jesu yarã mera

¹ Eropirã erã Anfípoligue eja taria, Apoloniague eja taria, Tesalónicague ejañorã erã. Ero judio masa buheri wihi árĩyoro. ² Eropigũ Pablo iri buheri wihigue wapũ ĩgũ iiguaro dopa ta gajĩ macarigue árĩgũ. Erogue eja, ũhre semana gohra erã soorinũrire Sabadonũrire Goãmũ yare iribojegue erã gojarare masare buhe, irire erã mera wereniguipũ Pablo. ³ Eropigũ ĩgũ Goãmũ yare werepũ õpa arĩgũ:

—Judio masa, mũa Opũ mũa coregũ Cristo árĩpũ masa ya árĩburire ñero taribu. Eropigũ ĩgũ sĩria waha masa mũriapũ. Eropigũ ihĩ Jesu yũhũ arĩ weregũ, ĩgũ Cristo gohra ta àhrimi marire taubu. ĩgũ ta àhrimi mũa coregũ. Eropa ta werea Goãmũ yare erã gojarapũ, arĩ werepũ Pablo.

⁴ Īḡu eroparīcū peerā bajamerāgā ero árīrā “Diaye ta āhraa,” arīñorā. Eropirā erā Pablo sã mera wañorā. Eropirā gajirā sã griego masa bajarā Goãmure umupeorāpu, Pablore peerā erā mera majarā nome sã, bajarā oparā nome sã, ĩḡure peerā Jesu yarā dujañorā. Eropirā Pablo sã mera wañorā. ⁵ Judio masapu erā eropa iicū ĩarā erāre ĩhaturiñorā. Eropirā erā ñerāre mohmebirāre bajarāre sihu gameneo, õpa arĩdoreñorā: “Pablo ĩḡu mera majarā mera ñero iirā iima,” arĩ gaguiniguidoreñorā erāre iri maca majarāre. Eropa gaguiniguirā árĩpehrerā iri maca majarāre guacū iñorā Pablo sã mera. Eropirā erā judio masa Jasõ ya wihigue ñaja Pablo sãre amariñorā erāre masaguere omorā. ⁶ Eropa amarā erāre bocabiriñorā. Eropirā Jasõre, gajirā Jesu yarā sãre ñeha tarawiriañorā erāre. Oparā pohroque aĩ eja, õpa arĩ weresãñorā erā.

—Pablo sã masare árĩpehreroguerere garibotariañorā. Eropirā dohpaguere mari ya macaguere eratumajama. ⁷ Eropigū ihĩ Jasõ erāre ĩḡu ya wihigue ñajaridoreami. Erā árĩpehrerā mari weca opu Roma majagū ĩḡu dorerire tarinugama. “Gajigū mua opu āhrimi. Jesu ĩḡu ta āhrimi,” erā erīcū mari opu César dorerire tarinugama erā, arĩ weresãñorā judio masa erā oparāre.

⁸ Erā eropa arĩ weresācū peerā, árĩpehrerā masa, oparā sã gua “¿Dohpa waharĩ?” arĩ pepiñorā. ⁹ Eropirā oparā Jasõre, ĩḡu mera majarā sãre niyerure wajayedore, wiucãñorā.

Pablo Sila mera Bereague ejañorā

¹⁰ Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Erogue eja judio masa buheri wihigue ñaja wañorã.

¹¹ Judio masa Berea majarãpũ Tesalónica majarã tauro Goãmũ yare õaro peerã árĩñorã. Eropirã erã Jesu yare erã peera pũhrũ “¿Diaye ta ãhriri?” arĩ masidiarã, umũri nũcũ Goãmũ yare erã gojarapũre eropa buheniguicãñorã erã.

¹² Eropirã erã bajarã Jesure umupeoñorã. Griego masa sã, uma, oparã nome mera Jesure umupeoñorã.

¹³ Eropirã Pablo Bereague Goãmũ yare ĩgũ buhecũ sãre peebeo Tesalónica majarã judio masa Bereague ejañorã. Erogue ejarã, Berea majarãre quere goroweoñorã. Pablo sã mera guacũ iĩñorã erã.

¹⁴ Erã eropa iicũ ĩarã Jesu yarã Pablöre yojaro mera wũariya tũrogue obeoñorã. Eropigũ Sila, Timoteo mera Bereague ta dujañorã.

¹⁵ Eropirã gajirã Pablöre Atenague aĩgã soñorã. ĩgũre sotuhaja maji dujaa wañorã. Erogue ejarã,

—Yojaro mera waha, wapicũrã waque Pablöre, arĩ wereñorã Silare, Timoteo sãre. Eropa arĩ weredorepũ Pablo erãre.

Pablo Atenague árĩpũ

¹⁶ Eropigũ Pablo Atenague coregũ iipũ Sila, Timoteo sãre. Eropigũ Atena majarã erã goãmarã wéanirãre bajarã erã opacũ ĩagũ Pablo bũrigã bũjawerepũ erã mera.

¹⁷ Eropa bũjaweregũ judio masa buheri wihigue judio masa mera dũyaso wereniguipũ ĩgũ. Eropigũ daja judio masa árĩbirã mera sãre wereniguipũ ĩgũ. Erã yujurãyeri Goãmũre umupeorã

árñorã. Eropigu Pablo iri maca deco umuri nucu igu pohrogue eropa curimaji ñajarã mera wereniguipu. ¹⁸ Gajirã epicúreo yare buherã, estoico yare buherã sã Pablo mera wereniguñorã.

—¿Ihĩ wereniguiri pehregu dohpa arĩ wereniguigu iiri igu? arñorã erã.

Pablo Jesu yare, igu masa muriarare igu werecu peerã òpa arĩ pepiriñorã erã masa. “Igu gajirã goãmarãre weregu iicumĩ,” arĩ pepiriñorã erã. ¹⁹ Erã peera puhru erã wereniguirogue Areópago waicurogue Pablöre aigãñorã.

—I buheri, mama buherire muhu dohpague wererare masidiaa gu. ²⁰ Mu buheri gajiropa ahraa. Eropirã gu irire masidiaa, arñorã erã Pablöre.

²¹ Árñpehrerã Atena majarã umuri nucu mama buherire wereniguidiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo igu wererire peediañorã erã.

²² Eropigu Pablo Areópago waicuro wahgãnugaja òpa arĩ werepu:

—Atena majarã, bajarã goãmarã wéanirãre mua burigã umupeocũ masia yuhu. ²³ I maca mua ya macare goãmarã wéanirãre mua umupeori gororire ihacuriabu yuhu. Eropa ihacurigu yu sã yuju gorogue mua goja apirare buheabu. “Goãmu, mari masibigu yare umupeori goro ahraa,” arĩ gojarare buheabu mua irire apiroguere. Mua igure masibiquererã igure umupeoabu mua. Igure ta mua masibigure weregu iiaa yuhu muare.

24 “Goãmũ árĩpehreri yebare, yeba maja sãre deyoro moañumi. Īgũ ɯmarore, yebare opũ árĩgũ ĩgũ masa erã iira wiri árĩbeami. 25 Eropigũ ĩgũ mari árĩricũre ogũ mari itamurire gamebeami. Īgũ mojomorocũgũ árĩbeami.

26 “Īgũ yujugũ ɯmũ mera árĩpehreri yeba majarãre masare iĩñumi. Eropigũ árĩpehreri yebaguere marire apiñumi ĩgũ. “Ipẽ yoari boje õguere árĩrãcoma,” arĩgũ queo apiñumi marire. 27 “Erã amarã yũre bocarãcoma,” arĩ pepiñumi Goãmũ. Eropigũ Goãmũ yoarogue árĩbeami. Mari mera ta àhrimi. Ōpa arĩ gojañumi gajigũ. 28 “Marire árĩcũ iimi ĩgũ. Īgũ maricũ mariboya mari sã. Eropigũ masa nũcũre eropa árĩnigũicãmi ĩgũ,” arĩ gojañumi. Mũa mera majarã iribojegue majarã bayarire õaro gojarã erã gojara àhraa iri. “Mari sã Goãmũ porã àhraa,” arĩ gojañorã erã. 29 Eropirã mari ĩgũ porã árĩrã, goãmarã wéanirãre, oro, plata, ɯtã mera mũa gamero mũa iinirãre “Goãmũ àhrimi,” arĩ pepibiricãque mũa. 30 Iribojegue masa masibirã erã árĩnicũ erã ñero iiquerecũ ta Goãmũ eropa ĩacãniñumi. Eropa iiqueregũ dohpaguepũre árĩpehreri yeba majarãre erã ñerire bujaweredoremi Goãmũ. 31 Pũhrũ ĩgũ queorinũ árĩpehreri yeba majarãre diaye ta beyegũcumi Goãmũ õarãre, ñerãre. Īgũ beyedore ĩgũ apidiro dopa Jesupũ beyegũcumi. Jesure sĩridigũguere masupũ ĩgũ. Eropa masugũ “Ihĩ yũ apidigũ àhrimi,” arĩ, ĩhmugũ ĩpũ Goãmũ masare, arĩ werepũ Pablo Atena majarãre.

32 Īgũ eroparĩcũ sĩrinirã masa mũriarare ĩgũ

wereniguicũ peerã gajirã ïgure wereyañorã.

Gajirãpũ õpa arĩñorã:

—Dipaturi ire mũ werecũ gũa peediaa daja, arĩñorã erã Pablore.

³³ Erã eropa arĩra pũhrũ Pablo waha warũ.

³⁴ Eropirã bajamerãgã ïgũ mera árĩrã Jesure umupeonũgañorã. Dionisio Areópago majagũ oparã mera majagũ Jesure umupeonũgarũ. Dãmari waĩcũgo sã, gajirã mera Jesure umupeonũgaro.

18

Pablo Corintogue árĩpũ

¹ Eropigũ Pablo Atenague árĩdigũ waha Corinto waĩcũri macague ejarũ. ² Erogue ejagũ judio masũ Aquila waĩcũgure bocajarũ ïgũ. Arĩpehrerã weca opũ Claudio waĩcũgũ judio masare Romague árĩrãre ïgũ cóacũ Aquilarũ ïgũ marapo Priscila mera waha, Corintogue ejarũ. Aquilarũ Ponto waĩcũri yeba masa dehyoadigũ árĩpũ. Eropirã erã Corintogue árĩcũ Pablo erã pohrogue ejarũ. ³ Aquila sã suhri wirire iirã árĩñorã. Pablo sã suhri wirire iigũ ta árĩpũ. Eropigũ ïgũ erã mera mohme ero dujarũ. ⁴ Eropigũ Pablo Sabado árĩcũ semanari nũcũ judio masa erã buheri wihigue judio masare, judio masa árĩbirã sãre Goãmũ yare wererũ.

—Ihĩ ïgũ wereniguiri diaye ta ahraa, arĩñorã masarũ erã peera pũhrũ.

⁵ Eropigũ Sila, Timoteo mera Macedoniague árĩnirã Pablo pohrogue ejañorã. Erogue erã

ejara pũhrũ, Pablo suhri wiri mohmerire duhucã
ũmũri nũcũ judio masare buhemũripũ.

—Jesucristo marire taubu mari coredigu ta
ãhrimi, arĩ werepũ erãre.

⁶ Īgu eropa arĩ buhequerecũ ta judio masapũ
ĩgũre peediabiriñorã. Eropirã erã ñero quere
goroweoñorã ĩgũre. Erã eropa iicũ Pablo erãre
ĩgu turibodiro dopa ta, ĩgu suhri maja mera
pasiri mehripũ.

—Mũa ya dipuwaja peamegue warãca.
Goãmũ ĩgu dorediro dopa ta mũare buherabũ
yũhũ. Mũapũ yũre peediabirabũ. Dohpaguere
yũpũ judio masa árĩbirãre buhegu wagũra,
arĩpũ Pablo judio masare.

⁷ Īgu eropa arĩra pũhrũ ĩgu erogue árĩdigũ
waha, Tito Justo waĩcũgu ya wihigue ejapũ. Justo
Goãmũre umupeogũ árĩpũ. Īgu ya wihipũ judio
masa buheri wihi pohro árĩyoro. ⁸ Eropirã
Crispo waĩcũgu iri buheri wihi opũ, ĩgu marapo,
erã porã mera mari Opũ Jesure umupeoñorã.
Eropirã gajirã Corinto majarã bajarã Goãmũ yare
peerã, Jesure umupeoñorã. Erã eropa umupeorã
árĩcũ erãre waĩyerũ. ⁹⁻¹⁰ Yuju ñami Goãmũ
quẽrogue werepũ Pablöre. Īgũre õpa arĩpũ:

—Mũ mera ãhraa. I macare yaharã ba-
jarã ãhrima. Eropirã gajirã masa mũre ñero
iimasibeamã. Eropigũ güibita mũhũ. Eropigũ
yahare bũrigã wereque. Eropa pepibiricãque,
arĩ werepũ Goãmũ Pablöre.

¹¹ Eropigũ yuju bojori õaro gaji bojori
deco gohra ero majarãre Goãmũ yare buhe,
árĩmũripũ Pablo.

12 Īḡu eropa árĩrisubu Galiõ waĩcuḡu Acaya yeba majarã opu ĩḡu árĩcũ, judio masa árĩpehrerã yujuropa ta Pablore ñero weresãrã erañorã. Īḡure ñeha dipuwaja moadorerã pohrogue aĩḡãñorã erã Galiõ pohrogue. 13 Aĩḡã õpa arĩ weresãñorã ĩḡure:

—Ihĩ masare Goãmure umupeodoreḡu i yeba maja doreripure cóãdoremi, arĩ weresãñorã judio masa dipuwaja moadorerãre.

14 Erã eropa arĩ weresãcũ peegũ Pablopũ erãre werediaripũ. Eropigũ Galiõ opũpũ judio masare werepũ.

—Ihĩ ñerire iidigũ árĩcũ ḡua Romano majarã ya dorerire tarinugagũ árĩcũ, mũare yũhriboaya yũhũ. 15 Mũa ya doreripure ihĩ tarinugagũ ĩḡu árĩcũ mũa basi ire amuque. Ire masibea yũhũ mũa mera, arĩ werepũ ĩḡu judio masare.

16 Eropa arĩḡu ta erãre Pablore weresãñirãre ĩḡu ya taribugue árĩrãre cohã wiucãpũ ĩḡu.

17 Īḡu eropa cohã wiura pũhrũ árĩpehrerã iri wihi árĩrã Sóstenere judio masa buheri wihi opũre Jesu yagure ñeha, dipuwaja moadorerã pohrogue pañorã ĩḡure. Erã eropa pacũ ĩagũ Galiõ eropa ĩacãpũ.

Pablo Antioquíague dujaa wapũ daja

18 Eropigũ Pablo Corintogue yoari boje árĩdigũ “Wagũ ĩiaa,” arĩ goeriserepũ ĩḡu Jesu yarãre.

Īḡu eropa arĩra pũhrũ ĩḡu Priscila, Aquila mera Siria yebague árĩri macague taribuja wapũ. Cencrea waĩcũri macague erã taribujara pũhrũ Pablo Goãmure “Õpa mũre iibasagura,” ĩḡu arĩrare iituhajagũ árĩpũ. Eropigũ eropa

iigu judio masa erã iiro dopa ta ïgu poaire wuapehocãdorepu. ¹⁹ Eropirã erã Efeso waïcari macague eja, Priscilare, Aquila sãre apipu Pablopũ. Erãre ero api, ïgũpu judio masa erã buheri wihigue wapũ. Iri wihigue eja, Goãmu yare werepu. Eropa weregu judio masa mera dũyaso wereniguipu. ²⁰ ïgu eropa werera puhrũ ïgure erã mera dujadoreriñorã erã. Erã eroparĩquerecũ,

—Dujabeaa mua mera, arĩpu Pablo erãre.

²¹ Eropa arĩgu ta,

—Jerusaléngue yure waro gahmea. Bosenure ïagu wabu iiaa. Eropigu wagu iiaa. Goãmu gamecũ dipaturi dujariboca, arĩpu erãre.

ïgu eropa arĩtuhaja Efesogue árĩdigũ taribuja wapũ. ²² Eropigu Cesareague taribujaja tarigã, Jerusaléngue eja. Erogue eja, ero majarã Jesu yarãre “¿Ne ãhriri mua?” arĩ, erãre ïha taria Antioquíague eja. ²³ Ero bajamenuri arĩpu. Ero árĩdigũ tariapu. Galacia yeba arĩri macarigue, Frigia yeba arĩri macarigue dipaturi eja, iri macari majarãre Jesu yarãre buhe ñaro mucubiricũ iipu.

Apolo waïcũgu Efesogue buherũ

²⁴ Irisubure, judio masũ Apolo waïcũgu, Alejandría maca majagu Efesogue eja. ïgu ñaro weremehregũ arĩpu. Eropigu ïgu Goãmu ïgu gojarare ñaro masipu. ²⁵ Gajigu ïgure Goãmu yare weretuhamuripu. Eropigu ïgu Ñu waĩyegu ïgu buheri dihtare masipu. Eropa arĩqueregu ïgu bariã mucubiriri mera Jesu yare ñaro

buheru. ²⁶ Eropigu judio masa erã buheri wihigue ïgu güiro mariro erãre buhenugaru. ïgu eropa buhecũ erã peera pũhrũ Priscila Aquila mera ïgure erã mera aïgãñorã. Goãmu yare ðaro diaye ðaro ïgu werepehobiricũ ïarã diaye werepehocãñorã erã ïgure. ²⁷⁻²⁸ Eropigu ïgu Apolopũ Acaya yebague ïgu wadiacũ Jesu yarã ïgure “Õaro waque,” arĩ, erã gojarapũrire oñorã ïgure. Iripũri Acayague árĩrã Jesu yarãre Apolore ðaro bocatĩridoreripũri árĩyoro. Eropigu Apolo erogue ejagu ero majarãre Jesure umupeorãre Goãmu mahiri mera ðaro itamupu. Judio masare iri maca árĩrãre ðpa arĩ werepu:

—Goãmu ïgu obeodigu mũa coredigu àhrimi Jesu. Cristo gohra àhrimi, arĩ werepu judio masare gajirã masa erã ïaro.

Ïgu eroparĩcũ, Goãmu wereniguri gojarapũre ðaro queroro werecũ erã pee “Diaye árĩbeaa,” arĩmasibiriñorã erã. Eropigu Jesu mahiri mera Jesure umupeorãre ïgu ðaro itamupu erãre Apolo.

19

Pablo Efesogue wapu

¹ Corintogue Apolo ïgu árĩrisubu, Pablopũ utã yucugue mური taria, Efesogue ejapu. Erogue eja, yujurãyeri Jesu yarãre bocajapu. ² Erãre ïgu bocajara pũhrũ ïgu erãre serẽpi ïapu.

—¿Mũa Jesure umupeora pũhrũ mũapu Espĩritu Santore opanugari? arĩ serẽpi ïapu Pablo.

Īgu eroparīcū peerā īgure ōpa arī wereñorā erā:

—“Espíritu Santo āhrimi,” arī ne werebirama guare, arī wereñorā erā.

³ Erā eropa arī werera pūhrū Pablo erāre serēpi ĩapū daja:

—¿Noa ya buherire mūa peera pūhrū waīyepū mūare? arīpū īgu daja.

—Ñu ya buherire guā peera pūhrū waīyeama guare, arī wereñorā erā.

⁴ Erā eroparīcū peegu ōpa arīpū Pablo:

—Masa erā ñeri iirare erā duhucū ĩagu waīyepū Ñu. Eropiro īgu waīyeripū erā ñeri iirare erā duhurare masare ĩhmuburi árīyoro. Eropigu gajino sāre werenemopū Ñu. “Yū pūhrū aribure īgure umupeoque mūa,” arīpū Ñu masare. Eropa arīgu Jesure ta umupeodoregu ĩpū, arī werepū Pablo erāre.

⁵ Īgu eroparīcū erā peera pūhrū, Jesu waī mera waīyepū erāre. ⁶ Eropigu Pablo erā yujurāyeri weca īgu mojotorire īgu duhpeocū, Espíritu Santopū erapū erāguere. Īgu eropa erara pūhrū erāpū peeyamariri yare werenigui, Goāmū yare wereñorā. ⁷ Erā árīpehrerā doce ũma erā árīñorā.

⁸ Pūhrū Pablo judio masa erā buheri wihigue ñaja, ũrerā abe gohra güiro mariro Goāmū īgu opū árīrare were, werenigui pū erā mera. Īgure erā eropa peera pūhrū “I diaye ta āhraa,” arīñorā erā. ⁹ Gajirāpū peediabiriñorā. Eropirā erā masa erā peeuro ĩri ōare buherire ñero arī werenigui ĩhmuñorā. Erā eroparīcū peegu

Pabloꝝ Jesu yarãre sihu wiria, gajipugue waha waru. Waha, Tirano waĩcuꝝu ya buheri wihigue unuri nucũ masare Goãmũ yare werepu igũ. ¹⁰ Pe bojori gohra buhepu erãre. Igũ eropa buhecũ árĩpehrerã Asia yeba majarã judio masa, judio masa árĩbirã mera mari Opũ Jesu yare peeñorã. ¹¹ Eropigu Goãmũ turari mera Pablo bjasuburi deyro moarire ii ihmupu. ¹² Pablo igũ suhri gasirore, igũ suhrirore igũ dupũ pẽhrera gasirore dorecurãre aĩgãñorã gajirãpu. Masa dorecurã iri suhrire pẽhrerã õarã wañorã. Eropirã watẽa ñajasũnirã iri suhrire erã pẽhrera puhrũ watẽa wiria wañorã erãre.

¹³⁻¹⁴ Gajirã judio masa eropa curinigurã watẽare cóarã judio masa yeea árĩñorã. Esceva waĩcuꝝu siete igũ porã árĩñorã. Escevarũ judio masũ pahia opu árĩpu. Eropirã erã Pablo igũ iidiro dopa ta Jesu turari mera watẽare cóadiariñorã. Eropirã watẽa ñajasũdigure boca watẽare doreriñorã erã.

—Jesu Pablo igũ weregu igũ turari mera dorea mũare. Duhuque ãre, arĩriñorã erã. ¹⁵ Watẽare erã wadorera puhrũ, watẽapũ masũguere õpa arĩñorã erãre.

—Jesure masia. Pablo sãre masia. Mũapũre masibeaa, arĩñorã watẽa erãre.

¹⁶ Erã eroparĩcũ ta watẽa ñajasũdigupu burigã erãre ñehamaa waru. Eropigu erãre ñetariaro iipu. Igũ eropa iira puhrũ suhri marirã, camicurã oma wiriañorã erã iri wihire watẽa cóadiarãpu. ¹⁷ Erã eropa iira puhrũ árĩpehrerã Efeso majarã, judio masa, judio masa árĩbirã mera irire pee, gũitariacãñorã erã. Eropirã mari

Opꝝ Jesu yare wereyaro mariro wereniguiñorã masapꝝ.

¹⁸ Eropirã masa bajarã Jesure umupeorã erã ñero iirare wererã ariñorã. ¹⁹ Erã mera majarã bajarã yeea árñorã. Eropirã erã erã gojarapũrire purisiriri wereripũrire erogue aĩgãri, masa erã ĩaro iripũrire soe cóãcãñorã erã. Iripũri wajacurare erã queocũ, árĩpehreripũri cincuenta mil plata árĩripũri wajacuriyoro iripũri. ²⁰ Eropirã Goãmꝝ yare gamerã bajarã wañorã. Goãmꝝ turari mera ĩgu yarã wañorã.

²¹ Erã eropa wara pũhrꝝ Pablo õpa arĩ pepipꝝ: “Macedonia yeba ejamũhta, iri yebare taria Acaya yebaguere ejagura. Iri yebare yũ ejara pũhrꝝ Jerusalengue wagura. Iri macare yũ ejara pũhrꝝ Romague ĩagu wagura,” arĩ pepipꝝ Pablo. ²² Eropigũ perãre ĩgure itamurãre ĩgu core obeomũtapꝝ Macedonia yebague. Timoteo Erasto sã árñorã erã. Eropigũ Pablopꝝ yujugũ ta dujapꝝ Asia yebague.

Efesogue masa gua gaguiniguiñorã

²³ Irisubure Efesogue Jesu yare gajirã gamebirã Pablo sãre ĩhaturiñorã. ²⁴ Yujugũ platatare mohmegũ Demetrio waĩcugũ árĩpꝝ. ĩgu plata mera erã goãmo Artemisa waĩcugo umupeori wihi wéara wirire mũta wirigãre iigu árĩpꝝ. Eropigũ ĩgu gajirã plata mohmerã mera erã wéanirãre wũaro dua wajatamuriñorã erã. ²⁵ Eropigũ Demetrio gajirã plata mohmerãre sihu gameneo, werepꝝ erãre.

—Peeque mũa. I mohmeri mera mari wéanirã mera wũaro mari wajatarare masia mũa. ²⁶ Ihĩ

Pablo ĩḡu iirare ĩḡu buhera sãre masia muu. Őpa arĩ buhemi ĩḡu: “Goãmarã wéanirã masa erã iinirã ojocarirã árĩbeama,” arĩ weremurami ĩḡu. ĩḡu eroparĩcũ peerã, Efeso majarã, árĩpehrero Asia yeba majarã sã ĩḡu buherare “Diaye ta ãhraa,” arãñorã irire. ²⁷ Eropa arĩrã mari mohmerire mari wéarare masa gamesome. Eropirã mari goãmo wuago Artemisa ya wihire cóãbocoma. Eropirã árĩpehrerã Asia yeba majarã, árĩpehreri yeba majarã igore umupeosome pare. Eropirã masa igore masibirã mari wéarare asũsome, arĩḡu Demetrio erãre.

²⁸ ĩḡu eroparĩcũ peerã burigã gua, gaguiniguĩnorã:

—Artemisa Efeso majarã yago goãmo turago ãhrimo, arĩ gaguiniguĩnorã erãḡu.

²⁹ Erã eropa gaguiniguicũ Efeso majarã árĩpehrerã sã gaguiniguitaria wa pee masiri pehrea wañorã. Eropa warã Gayore, Aristarco sãre ñeha, masa erã gamenererogue erãre taragãñorã. Gayo, Aristarco mera Macedonia majarã árĩñorã. Pablo mera curirã árĩñorã.

³⁰ Erãre ñeacũ ĩha Pablopũ masa pohro wereḡu wadiaripũ. Jesu yarãḡu ĩḡure wadorebiriñorã.

³¹ Eropirã gajirã sã iri yeba majarã oparã, Pablo mera majarã arĩrã erã pohro majarãre weredoreñorã Pablöre:

—Masa erã gamenererogue wabiricãque, arĩ weredoreñorã oparã Pablöre.

³² Eropirã ero gamenererã mera majarãḡu bajarã “¿Duhpimorã mari gamenererã iiri?” arĩ masibiriñorã. Eropirã erã gaguinuginemoñorã.

Ipugue árĩrã gajiropa arĩ gaguinigui, gajirã sã gajiropa arĩ gaguinigiñorã. ³³ Eropirã judio masapũ Alejandro waĩcũgure masare weredoreriñorã. Eropigũ Alejandro “Ejarimaricãque,” arĩgũ ĩgũ mojoto mera paatupũ. “Oã gũare judio masare turirã iima,” arĩ pepigũ judio masare cãhmotadiagũ wereniguiripũ. ³⁴ ĩgũ eropa wereniguidiaquerecũ judio masũ ĩgũ árĩcũ ĩarã masa árĩpehrerã yujuro mera pe hora gaguinigiñorã.

—Artemisa, Efeso majarã yago mari goãmo turago ãhrimo, arĩ, gaguinigiñorã erã.

³⁵ Erã eropa arĩ gaguiniguicũ ĩagũ Efeso majarã oparãre itamugũ masare “Ejarimaricãque,” arĩ, werepũ erãre.

—Mũa Efeso majarã peeque. Mari Efeso majarã turago Artemisa ya wihi corerã mari árĩcũ árĩpehreri yeba majarã masima. Eropirã igo wéarare umarogue dijaridigore diburã mari árĩcũ sãre masima masa. ³⁶ Eropirã “I diaye árĩbeaa,” arĩmasibeama. Eropirã guabiricãque mũa. Ōaro pepique mũa. ³⁷ Oã mũa ñeagãrirã mari goãmore ñero arĩ wereniguibirama. Eropirã erã goãmarã ya wiriguere ñaja, yajabirama. Eropirã ōaro iique mũa. ³⁸ Demetrio, plata mohmerã mera oãre mũa ñearãre weresãdiarã, dipuwaja moaropũre wereporo erã. Erã oparãre oãre weresãmasima. ³⁹ Mũa gajino iidiarã, ōaro mera irire gamenere iique. Mũa iiro dopa iinemobiricãque. ⁴⁰ Dohpagãre mũa gua, gaguinirare mari oparã peerã, erã marire

weresãbocoma. “Marire cóãrã iicoma,” arĩ pepirãcoma oparã marire. Eropirã mari arĩ gaguiniguirare erãre õaro diaye weremasibea mari, arĩpũ oparãre itamugũpũ masare. ⁴¹ Eropa arĩ weretuhaja, “Iripẽta ãhraa. Waque,” arĩpũ ãgũ masare.

20

Macedonia yebague sãre, Grecia yebague sãre Pablo ejapũ

¹ Erã eropa wara pũhrũ, Pablopũ Jesu yarãre sihu gameneo werepũ. Weretuhaja, mojoto ñeha, goeriserepũ. Goeriseretuhaja, Macedoniague waha wapũ. ² Eroague eja were, ero majarã Jesu yarãre mucubiricũ iipũ ãgũ. Erãre weretuhaja, Greciague ejapũ ãgũ. ³ Erore ãgũ urerã abe gohra árĩpũ. Ero árĩgũ Siria yebague taribuja wadiaripũ. Eropirã judio masa duhri, ãgũre ñeadiariñorã. Irire pee Pablo gaji mague Macedonia wari mague waha wapũ. ⁴ Eropa wagũ Asiague ta ejapũ. Ero Berea majagũ Sópater waĩcũgũ Pablöre wapicũgãpũ. Eropirã Tesalónica majarã Aristarco, Segundo sã ãgũre wapicũgãñorã. Eropirã Asia majarã Tíquico, Tróximo sã Asiague ãgũre wapicũgãñorã. Derbe majagũ Gayo waĩcũgũ Timoteo sã ãgũ mera wañorã. ⁵ ãgũ mera majarã ãgũ core waha, Troa waĩcũri macague ãgũre coreñorã. ⁶ Erã eropa corecũ bugabiriri panre bari bosenu pũhrũ gũapũ Filipogue árĩnirã dohodiru mera waha, cinco nũri taribujarã Troague gũa ejabũ. Siete nũri gohra árĩbũ gũa eroguerẽ.

Troague Pablo curigu wapu

⁷ Soorinu árĩcũ Jesu yarã gamenere panre duhpeoñorã Goãmũ yare bocatĩrimorã. Erã eropa iiboro core Pablo erãre buherũ. Eropigu Pablo gajinũpũre wabu árĩgu yoari boje ĩgu buherũ. Nami deco mera buhe duhubu iiripũ. ⁸ Eropirã erã umaro maja taribugue baja dipu sihãgori dipu árĩri taribugue gamenereñorã. ⁹ Pablöre erã peerisubu mamũ Eutico waĩcũgu ventana weca mũribejaja doapũ. Eropigu Pablo erãre yoari boje buhenemocũ ĩgu mamũre wũja ariyoro. Eropigu ĩgu carĩa wa uhere caya wecague doadigu majimadija wapu. ĩgu eropa yuhridijara pũhrũ erã ĩgũre sĩriadiugũguere aĩwahgũ doboñorã. ¹⁰ Erã eropa iicũ ĩagu Pablo dijari, mamũre papeorpũ. ĩgu eropa iira pũhrũ Jesu yarãre wererpũ ĩgu:

—Sĩporã ñebiricãque. Sĩribeamĩ ihĩ. Ojocarimĩ, arĩpũ Pablopũ.

¹¹⁻¹² ĩgu eroparĩcũ mamũpũ sĩridigũpũ masa wapu. ĩgu masacũ ĩha erã mucubiritaria wañorã. Eropa mucubirirã umaro maja taribugue mũria, panre duhpeoñorã bocatĩrimorã. Erã eropa iira pũhrũ yoari boje Pablo erãre buherũ daja. Boyoboro coregã erãre buheduhupũ. Buhetuhajacã waha wapu Pablo.

Pablo Troague arĩdigũ waha, Miletogue ejapu

¹³ Pablo core dohodiru mera Asogue gũapũ ejamũhtabũ. Pablopũ mague wadiami. Pablo ĩgu arĩdiro dopa ta Asogue ĩgũre gũa bocatĩribũ. ¹⁴ ĩgũre gũa bocatĩricũ, gũa mera

ñajami dohodirugue. Iriru mera waha, Mitilenegue gũa ejabũ. ¹⁵ Eroguere eja taria gajinũ Quíore tariabũ gũa. Gajinũ Samogue ejabũ gũa. Gũa carĩra pũhrũ gajinũpare Miletogue ejabũ pare gũa. ¹⁶ Pablo Pentecostenũ gohra Jerusaléngue erejadiami. Eropigũ Asia yebague yoari boje árĩdiabirimi. Eropigũ Efesore diaye taria, Miletogue ejatuhajabũ gũa.

Pablo Efeso majarã Jesu yarã oparãre werepũ

¹⁷ Eropigũ Pablo Miletogue árĩgũ, Goãmũ yarã Efeso majarã Jesu yarã oparãre sihubeomi ãgũ. ¹⁸ Eropa ãgũ sihubeora pũhrũ erã Pablo pohrogue erama. Erã eracũ ãagũ erãre Pablo weremi.

—Asiague ne eragũ mũa mera yũ iirare masia mũa. ¹⁹ Mũa mera árĩgũ ne gajiropa arĩro mariro Jesu mari Opũ yare iimũribũ yũhũ. Eropigũ mũare mojomoro ãabũ. “Mũare tarinũgaa,” arĩbirimũribũ yũhũ. Judio masa erã yũre ñero iiquerecũ ta Goãmũ yare iimũribũ yũhũ. ²⁰ Eropigũ mũa õaro waburi dihtare mũare buhepehocãbũ yũhũ. Masa erã ãaro mũa wirigue sãre buhebũ yũhũ. ²¹ Eropigũ judio masare, judio masa arĩbirã sãre yujuropa ta buhebũ yũhũ. “Mũa ñerire bũjawereque. Goãmũ yare gohrotoque. Eropirã Jesu mari Opũre umupeoque,” arĩ weremũribũ yũhũ. ²² Eropigũ Espĩritu Santo ãgũ dorediro dopa ta dohpaguere Jerusaléngue wagũ iiaa. Yũ erogue wagũ yũ gajiropa waborore masibea yũhũ. ²³ Õpa arãmi Espĩritu Santo yũre: “Jerusaléngue mãhũ ñero tarigũca. Eropirã mũre peresu

iirãcoma,” arãmi Espíritu Santo yure. Dohpaguere yu ejara macari nũcũgue eropa arĩ wereama yure. Jerusaléngue wagu Espíritu Santo ĩgu werera dihtare masia. ²⁴ Eropigu õari buherire, Goãmũ ĩgu mahiri buherire werebu ãhraa yũhũ. Jesu mari Opũ ĩgu ya árĩburire iipethodiaa yũhũ. Ire iigu árĩgu, yu sĩriborore güibeaa yũhũ.

²⁵ “Eropigu mũa mera árĩgu Goãmũ ĩgu opu árĩrare weremuribu yũhũ mũaare. Mũa yu eropa arĩ buhenirãre ne dipaturi mũaare ĩasome yũhũ. Ire masia yũhũ. ²⁶⁻²⁷ Eropa masigu dohpagãre ire werea mũaare. Árĩpehreri Goãmũ yare werebu yũhũ mũaare. Eropirã árĩpehrerã mũa mera majarã Goãmũ yare gamebirã erã árĩcũ yaha dipuwaja árĩbeaa. ²⁸⁻²⁹ Mũa basi õaro iique. Eropirã mũa Jesu yarãre Espíritu Santo mũaare ĩgu ĩhadibudorerare ĩhadibuque. Ovejare ĩhadiburã ovejare erã ĩhadiburo dopa ta Goãmũ yarã sãre ĩhadibuque mũa. Goãmũ magu ĩgu sĩrigu ĩgu di cóãro mera Goãmũ erãre ĩgu yarã árĩmorã iidi árĩmi. Yũhũ õre wara pũhrũ gajirã ñerãpũ mũa pohro ahri erã buheri mera mũaare goroweo duca waricũ iirãcoma. Eropirã Jesu yarãre õaro ĩhadibuque. ³⁰ Pũhrũguere gajirã mũa mera majarã ta Jesu yarãre guya, gaji buherire peedorerãcoma. Erã eropa peedorecũ erã peerãcoma. ³¹ Eropirã õaro iique mũa. Æmuri nũcũ, ñamiri nũcũ mojomoro ĩari mera buhemuribu yũhũ mũaare. Æhre bojori gohra õaro buhebũ mũa árĩpehrerãre. Irire yu buhera õaro guñaniguicãque mũa.

32 “Dohpaguere yu wara puhru Goãmu muare ïhadibugucumi. Ñgu mahiri buherire mua buherã õaro arĩrãca mua. Goãmu ñgu buheri mera muare ñgu yarãre õaro itamumasimi. Eropigu ñgu yarã dihtare ñgu iidiadiro dopa ta mua tamerare õaro iigucumi. 33 Mua niyeru oparire, mua suhri opari sãre “Yure oque,” arĩbirimuribu. 34 Yu basi mohme wajatabu yaha arĩburire. Eropigu yu gamerire, yu mera majarã erã gameri sãre yu mohme wajatara mera aĩmuribu. Yuhu eropa iirare masia mua. 35 Mari õpa burigã mohmerã gajino moorãre itamuro gahmea marire. Ire muare ii ïhmumuribu yuhu. Jesu mari Opu ñgu arĩrare guñaque mua. “Ñgu ocũ ñeadigu tauro odigupu mucubirimi,” arĩpu Jesu ñgu basi, arĩ weremi Pablo Jesu yarãre.

36 Eropa arĩtuhaja Pablo erã mera mereja, Goãmure serẽma. 37 Ñgu eropa serẽtuhajacũ erã arĩpehrerã Pablore pabua wayuporã mimi ore goeriserema. 38 “Muare dipaturi ïasome yuhu,” ñgu arĩcũ peerã burigã bujowerema erã. Eropirã erã ñgure tuunurusia buhama peramague. Erogue ñgure ïhanurusiamã gna wacũ.

21

Pablo dipaturi Jerusaléngue wapu

1 Jesu yarãre “Wagu iiaa,” arĩ, dohodiru mera, Cos waĩcũri nũgurogue diaye waha taribujajabu gna. Gajinu Roda waĩcũri nũgurogue taribujaja, taria, Pátara waĩcũri macague ejabu gna. 2 Pátara arĩrã, Feniciague waburidirure dohodirure bocajabu gna. Eropirã iriru mera wabu

gua. ³ Eropa warã Chipre waĩcũri nuęurore ðiaye ta ĩha tariabu gua. Copũ dujabũ iri nuęuro. Iri nuęurore taria, Siria waĩcũri yebague ejabu gua. Eropirã dohodiru maja doberire dohodiru majagũ Tiro waĩcũri maca ĩęũ durimujucũ, ero payanibũ. ⁴ Ero Jesu yarãre ĩarã, siete nũri gohra dujanibũ gua iri maca ta. Eropirã ero majarã Jesu yarã Espĩritu Santo ĩęũ werediro dopa ta erã Pabloure Jerusalengue wadorebiririma. ⁵ Erã eropa arĩquerecũ iri macare siete nũri gua arĩra pũhrũ, waha wabũ daja. Gua waboro coregã arĩpehrerã Jesu yarã, erã marasã nome mera, erã porã mera, maca tũro pohro guare ĩhadujarã wama. Eropirã arĩpehrerã gua imiporogue eja, mereja Goãmure serẽbũ. ⁶ Gua eropa serera pũhrũ, “Warã iiaa,” arĩ, erãre pabuatuhaja goeriseretuhaja waha wabũ gua. Gua wacũ ĩhanũrsia, erãpũ majaa wama erã ya wirigue.

⁷ Tiro waĩcũri macare maja tariabu gua. Eropirã Tolemaidague tuhajabu gua. Ero ta wũariyare watubũ. Iri macare eja, Jesu yarãre “Acawererã, ĩãhriri mua?” arĩ, yujunũ erã mera arĩribũ. ⁸ Eropirã iri maca ma buharo arĩcũ gajinũ daja Pablo mera mague wabũ gua Cesarea waĩcũri macague warã. Eroque eja, õari buherire wereęũ Felipe waĩcũęũ ya wihigue ejabu. Eropirã ĩęũ mera dujabũ gua. Felipe Jesu yarã erã siete beyenirã mera majagũ arĩmi. ⁹ Eropigũ ĩęũ wapicũrã nome pagũ arĩmi. Erã nomepũ Goãmũ yare wererã nome arĩma. ¹⁰⁻¹¹ Eroque gua bajamenũri gua arĩra pũhrũ, Agabo waĩcũęũ Goamũ yare

weremuhtagu Judeague árĩgu guare ñagu erami. Eropigu ñgu Pablo yadare tuãdiuridare añ, ñgu basi ñgu guburire, ñgu mojotorire diri ñhmu wereyúmi.

—Õpa arĩmi Espíritu Santo. “Idare opagu Jerusaléngue ñgu ejacũ, judio masa eropa ta dirirãcoma ñgure. Dirituhaja, judio masa árĩbirãre orãcoma erã ñgure,” arĩmi Espíritu Santo, arĩ wereyúmi Agabo.

¹² Ñgu eroparĩcũ peerã, gua Cesarea majarã mera Pablоре burigã mahibũ. Ñgure “Jerusaléngue wabiricãque,” arĩribũ. ¹³ Gua eroparĩcũ Pablорu yãhrimi:

—¿Dohpa arĩ orerã iiri mua? Yũpũre bujawerecũ iiaa mua. Erã yũre peresu iicũ õaroca. Yũhu Jerusaléngue Jesu mari Opũ yare yũ iira waja yũ sĩricũ õaroca, arĩmi Pablo guare.

¹⁴ “Wabeaa,” ñgu arĩcũ peediarã iiribũ gua. Ñgu “Wagũra,” ñgu arĩcũ, eropa pepicãbu gua. Õpa arĩbu:

—Mari Opũ ñgu gamero dopa ta iiporo, arĩbu gua.

¹⁵ Irire weretamutu, gua yare ahmu, waha wabu daja Jerusaléngue warã. ¹⁶ Erogue gua wacũ bajamerãgã Cesarea majarã Jesu yarãpũ gua mera wama. Eropirã Jerusaléngue eja erã mera majagu Mnasón waĩcũgu ya wihigue ejabu gua. Mnasón Chipre majagu ñgu yoari boje Jesu buhegu arĩmi. Eropirã ñgu ya wihi gua árĩguri wihi arĩbu. Eropirã Jerusaléngue ejabu gua.

Pablo Santiagore ñagu warũ

17 Jerusaléngue gua ejacũ, ero majarã Jesu yarãpũ “¿Erarari?” arĩ, mucubiriri mera bo-catĩrima guare. 18 Gajinũ Pablo gua mera Santiagore ĩagu ejami. Gua erogue ejacũ ero árĩpehrerã Jesu yarã oparã árĩma. 19 Eropigu Pablo erãre ĩgu mojoto ñeara pũhrũ judio masa árĩbirãre ĩgu buherare werepehomi. Goãmũ ĩgu itamuri mera ĩgu iirare werepehomi Pablo Jesu yarãre. 20 ĩgu eropa arĩ werecũ peerã,

—Goãmũ ðagũ, turagũ ãhrimi, arĩ umupeoma erãpũ. Eropa arĩtuhaja erã Pablore õpa arĩ werema.

—Acaweregũ, dohpaguere bajarã judio masa Jesure umupeorã ãhrima. Mũhũ irire masia. Eropirã erã õpa arĩ pepima: “Goãmũ ĩgu dorerire, Moisegue marire ĩgu apirare marire ipehoro gahmea,” arĩrã iima. 21 Õpa arĩnemoma erã. “Gajipague árĩrãre judio masa árĩbirã watope árĩrãre judio masare Goãmũ Moiserẽ ĩgu apirare ‘Iibiricãque,’ arĩ doremi Pablo,” arãma õ majarã judio masa mure. “Pablo judio masa porãre mari dorero dopa miri gasirogãre wiri aĩdorebeamĩ,” arãma erã mure. “Judio masa erã iidorerire Pablo duhudoremi,” arĩ i sãre werewũama mure. 22 Eropirã mũhũ õre eracũ peerã erã gamenererãcoma mure turimorã. Eropigu õpa iiro gahmea mure. 23 Mure gua dorero dopa ta iique. Dohpague õre wapicũrã ũa Goãmure umupeorã “Õpa iirãra,” arĩrã ãhrima. 24 Erã mera waque. Eropirã Goãmũ Moiserẽ ĩgu doremi dopa ta erã basi Goãmũ yare iiburire iimorã erã ñeri iirire coerã iima. Mũ sã eropa ta iique. Eropa iigu erã

eropa iira wajare wajayeque mupɸ. Mɸhɸ eropa wajayera pɸhrɸ erã poarire wuadoremasima erã. Mɸ eropa iicũ ãarã masa mure erã arãra iri gɸyara árĩcũ masirãcoma erã árĩpehrerã. Goãmɸ Moiserẽ ãgɸ apira dorerire iigɸ mɸ árĩcũ masirãcoma erã. ²⁵ Judio masa árĩbirã Jesu yarãpɸre gɸa gojarapɸre obeotuhajabɸ. Ōpa arĩ gojabɸ gɸa. “Goãmarã wéanirãre umupeora barire, dire, wɸunɸgɸ mohwejenirã waimurãre babiricãque mɸa. Eropirã nome mera ñero iibiricãque. Nome sã ɸma mera ñero iibiricãque,” arĩ were gojabɸ gɸa gojarapɸre, arĩma erã Pablõre.

Goãmɸ wihigue judio masa Pablõre ñeañorã

²⁶ Erã eropa arĩ wereniguirã pɸhrɸ gajinɸ Pablõpɸ wapicurã ɸma mera erã basi Goãmɸ yare iimorã erã ñeri iirire coemorã, Goãmɸ wihigue ñaja wañorã. Iri wihigue ñajajagɸ, erãre werepɸ Pablo: “I nɸcɸ nuri duhyaa mɸa coeboro,” arĩ werepɸ ãgɸ wapicurãre. Eropirã erã coeturinɸ erã nɸcɸ Goãmure waimurãre erã oburinɸ árĩbɸ.

²⁷ Eropiĩ erã coepehodiõ merogã duhyacũ gohra Goãmɸ wihigue Pablo ãgɸ árĩcũ Asia yeba majarã judio masapɸ ãañorã ãgure. Eropa ãarã gajirãre iri wihi árĩrãre Pablo mera guacũ iĩñorã erã. Eropa guarã judio masa Pablõre ñeha õpa arĩ gaguinigiñorã:

²⁸ —Mɸa gɸa acawererã Israe masa gɸare itamurã arique. Ihĩ ãhrimi. Moise dorerire i wihi sãre cóãdore buhemi árĩpehrerãre. Eropigɸ ãgɸ Goãmɸ wihiguere judio masa árĩbirã sãre añajadi ãhrami. Eropigɸ i wihire

ñeri mariri wihire ïḡu goroweoadi ãhrami, arĩ gaguinigiñorã judio masa Asia yeba majarã ero majarãre.

²⁹ Ero core Jerusalén Pablo Trófimo mera ïḡu árĩcũ judio masa ñañorã. Trófimo Efeso majagũ judio masũ árĩbiridigũ árĩmi. ïḡu eropa árĩcũ masirã õpa arĩ pepiñorã erã: “Pablo Trófimore Goãmũ wihire aññajagũ iicumi,” arĩ pepiriñorã judio masa.

³⁰ Masare erã eropa arĩ were erã gaguinigu-ira pũhrũ iri maca majarã árĩpehrerã bũrigã guañorã. Bajarã omagãri, Goãmũ wihi árĩḡure Pablöre ñeha tarawiria wañorã. Tuhajanugu iri wihi disiporore bihañorã erã ïḡugue ñajariri arĩrã. ³¹ Eropirã erã ïḡure wejẽmorã iiriñorã. Erã eropa iicũ ñarã gajirãpũ wererã wañorã surara opũre. “Árĩpehrerã Jerusalén majarã gamenere gua, gaguiniguirã iiami,” arĩ wererã wañorã surara opũre. ³² Erã eroparĩcũ peegũ opũpũ ïḡu surarare, erã dorerã sãre gameneo, erã mera Pablöre wejẽdiarã pohrogue omagã ejañorã. Surara erã ejacũ ñarã Pablöre panirã pa duhuñorã. ³³ Eropigũ surara opũ Pablo pohrogue eja, ïḡure ñeha, peda comeda mera diridorepũ. Erã dirituhajacũ ñha, opũ Pablöre serẽpipũ masare:

—¿Nihino ãhriri ihĩ? ¿Ñeheno dipuwaja ïḡure eropa iiri mũa? arĩ serẽpipũ ïḡu erãre.

³⁴ ïḡu eropa serẽpicũ peerã masapũ “Õpa iiami ïḡu,” arĩ, gajirã sã gajiropa arĩ, gaguinigui wereñorã surara opũre. Erã eropa gaguiniguicũ surara opũ õaro pebiripũ. Eropigũ ïḡu surara

ya wihigue Pablöre aĩgãdorepũ. ³⁵ Iri wihigue eja, Pablo m̄riariñere ĩgũ m̄riacũ masapũ ĩgũre padiarã cãhmotañorã. Erã eropa iicũ surarapũ ĩgũre aĩcoã m̄ria wañorã. ³⁶ Masa bajarã erãre n̄rusia, gaguinigui n̄rusiañorã.

—Īgũre wejēcãque, arĩ gaguiniguiñorã erã Pablöre.

Pablo “Ne masare ñero iibea yũhũ,” arĩ werepũ

³⁷ Eropii Pablöre iri wihigue erã peresu iiboro core, Pablopũ opũre serẽpipũ.

—Yũhũ m̄ mera weretamudiaca, arĩ serẽpipũ Pablo.

—¿Mũhũ griego masa yare werenigui? ³⁸ ¿Sohõ árĩdigũ, Egipto majagũ árĩbeari m̄hũ? Īgũ masare ĩgũ oparãre cóãdoregũ, cuatro mil masa gamewejẽrãpũre masa marirogue aĩgãarũ. ¿Īgũ árĩbeari m̄hũ? arĩpũ opũ Pablöre.

³⁹ Īgũ eroparĩcũ peegũ Pablo yũhripũ.

—Īgũ árĩbeaa yũhũ. Judio masũ ãhraa. Tarso Cilicia yeba árĩri maca masa dehyoabũ yũhũ. Bu árĩri maca majagũ árĩbeaa yũhũ. Yũhũ oã masa mera wereniguidiaa, arĩpũ Pablo ĩgũre.

⁴⁰ Īgũ eroparĩcũ peegũ opũpũ wereniguidorepũ masa mera. Eropigu Pablo m̄riariñegue nigui, ĩgũ mojotori mera “Ejarimaricãque,” arĩpũ masare. Īgũ eropa iicũ ĩarã, ejarimaripehrea wañorã. Erã ejarimaripehrecũ ĩha, Pablo judio masa ya mera werepũ erãre.

22

¹ Yũ acawererã, yũ iirare weregura mũare. Yũhũ werescũ peeque mũa, arĩpũ Pablo.

² Īgũ eroparĩcũ Pablo judio masa ya mera ĩgũ wereniguicũ peerã masa ejarimariro dujañorã. Eropigũ Pablo erãre wererũ:

³ —Yũhũ judio masũ ta ãhraa. Tarso waĩcũri maca, Cilicia yeba árĩri maca masa dehyoabũ yũhũ. Eropigũ i maca ta Jerusalén ta masabũ yũhũ. Eropigũ yũre Gamalie waĩcũgũ buhemũrimi yũre. Eropigũ yũhũ mari ñesũ sũmarã mũra dorerire õaro buhebũ. Dohpague Goãmũre mũa umupeoro dopa ta yũ sã umupeoniguia. ⁴ Eropigũ Jesure umupeorãre ñero iimũricarabũ yũhũ. Yujurãyeri erãre wejẽcãmũricarabũ yũhũ. ðmare, nome sãre ñeha, peresu iimũribũ yũhũ. ⁵ Pahia opũ, mũrã mera yũ eropa arĩri “Diaye ta ãhraa,” arĩ weremasima mũre. Erã gojaripũrire Jesu yarãre ñeadoreburipũrire yũre gojabasama. Mari acawererãre Damasco majarãre iripũre ĩhmubu iiribũ Jesu yarãre ñeabu. Erãre ñeha, aĩgãri peresu iibu iiribũ. Jerusaléngue erãre aĩgãdiaribũ erãre dipuwaja moabu, arĩpũ Pablo.

Pablo Jesu yagũ ĩgũ warare wererũ

⁶ Eropa arĩtuhaja õpa werenemorũ:

—Jesu yarãre ñeari masũ wadigũ árĩqueregũ goeri boje árĩcũ, Damascogue yũ ejaboro pohro gohra árĩcũ umarogue gosesiri medijubũ yũre.

⁷ Ero eropa wacũ yebague mehmerejacarabũ yũhũ. Yũ mehmerejara pũhrũ wereniguigũ carimi yũre. “Saulo, ¿duhpigũ yũre ñero iiri

mahu?" arigu carimi yure. ⁸ "Opu, ¿nihino áhriri mahu?" arí serëpibu yuhu. "Yuhu Jesu Nazare majagu, mu ñero iigu ta áhraa yuhu," arí yuhrimi igu yure. ⁹ Yu eropa wacü yu mera majarã boyorore íama. Eropirã yu mera igu wereniguicü peebirima erã. ¹⁰ "Opu, ¿dohpa iigucuri yuhu?" arí serëpibu Jesure. "Wahgãnugajaque. Damascogue waque. Ero mahu wacü, mure árìpehreri yu iidoreburire gajigu weregucumi mure," arími igu yure. ¹¹ Bùrigã ero cuimijuro wacü yu cuiiri boboa wacarabu yuhu. Eropirã yu mera majarã yu mojtore ñeha, Damascogue tuã wahgãma yure. ¹² "Ero Ananía waícugu, Goãmure umupeogu, marire Goãmü dorerire iipohogu árími. Ero majarã judio masa árìpehrerã erã umupeogu árími. ¹³ Eropigu igu yu pohro eranugara yure weremi. "Acaweregu Saulo, íaque dipaturi daja," arími igu. Igu eropa aríra puhru dipaturi íabu yuhu daja. Eropigu igure íabu yuhu. ¹⁴ Yu eropa íacü igu Ananía yure weremi. "Mari Pagu igu gamerire òaro masibure iribojegue beyetuhapu mure. Eropigu 'Yu magu òagure íha peegucumi,' arí weremuhtapu mure mari Pagu iribojegue mu árìboro core. Igu áhrimi mari ñecü samarã mura erã umupeodi. ¹⁵ Eropigu mu íarare mu peerare weregüca árìpehrerãre. ¹⁶ Eropirã dohpaguere yoari boje árìbircãrã. Wahgãnugajaque. Eropigu waïyedigü áríque. Jesure mu serëcü mu ñerire cóägucumi," arími igu yure, arípu Pablo.

Pablo judio masa árìbirãre igu buherare

werepũ

17 Īgũ eropa arĩtuhaja Pablo masare weren-
emopũ:

—Eropa iituhaja yũhũ Jerusaléngue dujari, Goãmu wihigue Goãmure serēgũ ejabũ. 18 Yũhũ ero árĩcũ yũ Opũ Jesu yũre dehyoami. Eropa dehyoagũ yũre weremi. “Jerusalén majarã yahare mũ werecũ peediabeama. Eropigũ duru gajipũgue waque,” arĩmi yũ Opũ Jesu yũre. 19 Īgũ eroparĩcũ peegũ werebũ ĩgũre: “Opũ, mũ yarãre judio masa buheri wiri árĩrãre yũ ñeha para sãre, peresugue erãre iimũrirare masima Jerusalén majarã. 20 Eropigũ mũ yare weregũre Estebanpũre erã wejēcũ ĩagũ õaro iirã wejẽma, arĩribũ. ĩgũre erã wejēcũ erã ya suhrire opabasabũ yũhũ. Iri sãre masima i maca majarã,” arĩ werebũ yũhũ Jesure. 21 Yũ eroparĩcũ peegũ yũ Opũ yũre weremi: “Yoarogue judio masa árĩbirãre buhebure obeogũra mũre. Eropigũ waque mũhũ,” arĩmi yũre yũ Opũ, arĩpũ Pablo masare.

Surara opũ Pablo mera weretamupũ

22 Īgũ weremũhtara dihtare õaro peeriñorã masa. Eropa peequererã judio masa árĩbirã pohro Jesu Pablõre ĩgũ obeoburire ĩgũ werecũ peerã erã gua gaguiniguinũgañorã daja.

—Ihĩ dohpague tamerare sĩricuraporo, arĩ gaguiniguinũorã erã.

23 Eropirã erã gaguiniguinemo, guari mera erã suhrire wejẽsiribeo, nicu mera deañorã. 24 Erã eropa iicũ ĩha surara opũ surara ya wihigue Pablõre añajadorepũ ĩgũ surarare.

Eropigu surara opu “¿Duhpirã Pablo mera gua eropa siari gaguiniguirã iiri masa?” arĩ serēpidiaripu. Pablöre irire serēpibu, yuradari mera tãradoreripu ïgure. ²⁵ ïgu tãradorequerecũ ïgure erã dirira pũhrũ, ïgu pohro árïgure surarare werepu Pablo.

—Yũhu Roma majagu ãhraa. Eropirã “Ñero iigu ãhrimi,” yure arĩmasibea mũa. Eropirã yuradari mera tãramasibea mũa, arĩpu Pablo ïgure.

²⁶ ïgu eroparĩcũ surara ïgu opure weregu wapu.

—Ihĩ Roma majagu ãhrimi. Eropigu ðaro iique ïre, arĩ werepu ïgu ïgu opure.

²⁷ ïgu eropa arĩra pũhrũ surara opupu Pablöre serēpigu wapu.

—¿Diaye ta mũhu Roma majagu ãhriri? Wereque yure irire, arĩpu ïgu.

—Ïgu ta ãhraa yũhu, arĩ yũhripu Pablo.

²⁸ ïgu eroparĩcũ peegu opupu ïgure werepu.

—Yũhu Roma majagu árĩdiagu niyeru wũaro wajayebu, arĩpu ïgu.

—Yũhu Roma maja macague masa dehyoabu. Eropigu Roma majagu ãhraa, arĩpu Pablo.

²⁹ ïgu eroparĩcũ peerã ïgure tãrabonirã waha wañorã. Eropigu Pablo Roma majagu ïgu árĩcũ masigu, ïgure comedari mera erã dirirare guñagu, gũi árĩpu surara opu.

Pablo judio masa opure werepu

³⁰ Eropigu surara opu judio masa Pablöre erã weresãrare ðaro masidiapu. Eropa masidiagu gajinugue comedarire ïgure ïgu pãdorera pũhrũ

pahia oparãre, judio masa erã murã mera gamenedorepũ surara opũ. Ìgũ eropa gamenedorera pũhrũ Ìgũ erogue Pablore aĩgã, erã core duhudobopũ Ìgũre.

23

¹ Eropigũ Pablo judio masa murã oparãre ïabocatĩunũgaja wererũ:

—Acawererã, Goãmũ Ìgũ ïaro umũri nũcu õaro iiniguicãbũ yũhũ, arĩpũ Pablo.

² Ìgũ eroparĩcũ peegũ árĩpehrerã pahia weca árĩgũ opũ Ananíapũ Pablo disirore padorepũ.

³ Ìgũ pohro niguirãre padorepũ. Ìgũre erã para pũhrũ Pablo Ananíare turipũ.

—Masa erã ïaro dihtare õaro iigũ ãhraa mũhũ. “Goãmũ dorerire tarinũgagũ iiaa,” yũre arĩqueregũ ta yũre padorea mũhũ. Eropa padoregũ mũpũ dorerire tarinũgagũ iica, arĩpũ Pablo Ìgũre.

⁴ Ìgũ eroparĩcũ peerã Pablo pohro niguirã õpa arĩñorã Ìgũre:

—Goãmũ Ìgũ beyedigu pahia opũre ñero wereniguibiricãque mũhũ, arĩñorã erã Pablore.

⁵ Erã eroparĩcũ peegũ Pablo arĩnemopũ:

—Acawererã, Ìgũ, Ìgũ pahia weca opũ Ìgũ árĩrire masibirabũ yũhũ. Eropigũ eroparĩmaacãbũ yũhũ. Goãmũ ya erã gojarapũ õpa arĩ werea Ìgũre: “Mũa maca majarã opũre ñero arĩ wereniguibiricãque,” arĩ gojara ãhraa, arĩpũ Pablo erãre.

⁶ Eropirã ero pe curu majarã árĩñorã. Yuju curu saduceo masa árĩñorã. Gaji curupũ fariseo

masa árĩñorã. Pe curu erã árĩcũ masigu, Pablo erãre busuro mera werepũ:

—Acawererã, yũhũ fariseo masũ ãhraa. Fariseo masũ magũ ta ãhraa yũ sã. “Sĩrinirã masa mũriarãcoma,” yũ arĩ wereri dipuwaja yũre ñero iidiaa mũa, arĩpũ Pablo.

⁷ Ĩgũ eroparĩcũ peerã fariseo masa, saduceo masa erã basi gameturiñorã. Eropirã erã basi pe curu dũca wariñorã. ⁸ Saduceo masa õpa arĩrã árĩñorã: “Sĩrinirã masa mũriasome. Espĩritua anyua sã ne marima,” arĩrã árĩñorã. Eropirã fariseo masapũ erã arĩro dopa arĩbiriñorã. Eropirã Pablo “Sĩrinirã masa mũriarãcoma,” ĩgũ arĩcũ erã erã basi gameturiñorã. ⁹ Eropa gameturirã, bũrigã gaguinigiñorã. Eropirã fariseo masa mera majarã judio masa buherã wahgãnũgaja, tuhri, wereñorã:

—Ĩhĩ Pablo ñero iibirami. Eropigũ Espĩritu, o anyu diaye ĩgũ mera wereniguigũ árĩbocumi. Eropirã ĩgũre dipuwaja moarã Goãmũre ĩhaturirã árĩboca mari. Eropiibiricãque, arĩñorã erã.

¹⁰ Erã eropa arĩra pũhrũ erã árĩpehrerã gameturi, bũrigã guañorã. Erã eropa bũrigã guacũ ĩha gũisãpũ Pablore surara opũpũ. “Pablore patasiricãrãcoma,” arĩgũ ĩgũ ya wihigue aĩgãridoregũ ĩgũ masa watope ĩgũ surarare obeopũ.

¹¹ Gaji ñami Jesu mari Opũ Pablo pohro dehyoa, werepũ ĩgũre:

—Gũibiricãque. Dohpague õre Jerusalengue yaha buherire wereabũ mũhũ. Eropigũ Romague sãre õpa ta iigũ waque, arĩpũ mari Opũ Pablore.

Judio masa Pablore wejēdiariñorã

¹² Gajinũ ñamiñarigã árĩcũ judio masa bajamerã gamenereñorã.

—Ōpa iirã, arĩñorã. Pablore wejēcārã. Eropirã ĩgũre mari wejēboro core ihribiricārã. Babiricārã. ĩgũre wejēbirã oa mera sĩrirã. ĩgũre mari wejēbiricũ Goãmũ marire wejēporo, arĩñorã erã.

¹³ Erã eropa arĩrã cuarenta weca ñari judio masa arĩñorã. ¹⁴ Erã eropa arĩ wereniguira pũhrũ erã pahia oparãre, mũrã sãre wererã wañorã:

—Pablore gũa wejēboro core barire babeaa gũa. ¹⁵ Eropirã mũa, mari mũrã mera ōpa arĩ sihubeoque. “Pablore dipaturi serēpidiaca,” arĩbeoque surara opũre. Mũa eropa arĩra pũhrũ surara opũre aĩgãridoreque Pablore. Eropirã Pablo ĩgũ ōre ĩgũ eraboro pohro gohra árĩcũ ĩgũre wejērãca gũa, arĩñorã erã pahia oparãre.

¹⁶ Eropigũ Pablo tĩgo magũ erã eropa arĩ wereniguicũ peerpũ. Erã eroparĩcũ peegũ waha, surara ya wihigue Pablore weregũ ñajarũ. ¹⁷ ĩgũ eropa werera pũhrũ Pablopũ yujungũ surarare sihubeo, wererpũ ĩgũre.

—Ihĩ mamũre mũ opũ pohrogue aĩgãque. Ihĩ mũ opũre werediagu ĩimi, arĩpũ Pablo.

¹⁸ ĩgũ eroparĩcũ peegũ surarapũ Pablo tĩgo magũre ĩgũ opũ pohrogue aĩ eja, wererpũ.

—Peresugue árĩgũ Pablopũ yũre sihubeo, ĩre mamũre mũ pohrogue aĩgãridoreami. Ihĩ mũre weregũ arigũ ĩiami, arĩpũ surara ĩgũ opũre.

19 Īgṁ eroparīcū peegṁ opṁṁ mamṁre ĩgṁ mojotore ṅeha tuāgā, masa marirogue ĩgṁre serēpi ĩarṁ.

—¿Dohpa arību iiari mṁhṁ yṁre? arīṁṁ ĩgṁ Pablo tīgo magṁre.

20 Īgṁ eropa serēpicū peegṁ ḡpa arī wererṁ.

—Judio masa yujuro mera, “Ōpa iirā,” arī, wereniguiama. ṅamigāre judio masa oparā pohrogue mṁre Pablore aīgādororācoma. “Mṁrā dipaturi Pablore serēpidiama,” arī gṁyarācoma. 21 Eropirā cuarenta weca ṅari masa ĩgṁre wejēdiarā magṁ duhrinijarā corerācoma. Erā ĩgṁre wejēboro core barire basome. Eropirā ihrisome. “Īgṁre mari wejēbiricū, Goāmṁ marire wejēporo,” arāma erā erā basi. Eropirā dohpaguere mṁre Pablore aīgāridorerā erāṁṁ duhri coretuhajama Pablore wejēmorā. Eropigṁ erā wererā eracū erāre yṁhribita mṁhṁ, arī wererṁ mamṁ surara opṁre.

22 Īgṁ eroparīcū peegṁ surara opṁ ḡpa arīṁṁ:

—Yṁre mṁ wererare gajirāre werebiricāque, arī wererṁ mamṁre. Eropa arītuhaja mamṁre “Wahanisa,” arīṁṁ.

Pablore opṁ Feli waīcṁgṁ pohrogue obeopṁ

23 Eropigṁ surara opṁ perā ĩgṁ surarare si-hugā, erāre doreṁṁ:

—Doscientos surarare, setenta cabayu peyarāre, doscientos ṅoseri mijiri oparāre Cesareague wamorāre erā yare amudorerā waque. Eropirā dohpagā ṅami nueve árīcū mṁa waborore coreque. 24 Eropirā Pablore

cabayuare ĩġu peyamorãre amubasaque. Opu Feli pohroque, Cesareague ðaro sorã waque ĩġure, arĩpũ surara opu.

²⁵ Eropa arĩtuhaja papera gojapũ. Őpa arĩ gojapũ ĩġu: ²⁶ “Yũhũ Claudio Lisia mure turagu opu Felire ðadorea. ²⁷ Judio masa ĩre ñeha, wejẽrama. Eropigu ĩġu Roma majagu ĩġu arĩcũ masigu, yũ surara mera ĩġure itamugu ejabũ. ²⁸ Eropigu ĩġure erã weresãrare masidiagu judio masa oparã pohro aĩgãbũ ĩġure. ²⁹ Eropigu ĩġu judio masa ya doreri dihtare ĩġu tarinũgacũ, mari ya dorerire ĩġu tarinũgabricũ ĩagu, ĩġure peresugue apidiabirabũ. Ñeha dipuwaja sĩriro mara ĩġure. ³⁰ Eropigu judio masa ĩġure wejẽdiarã, erã duhri corecũ ĩagu gajigu wereami yure. ĩġu eropa werera pũhrũ Pablora dohpaguere mũ pohro obeogu iiaa. Eropigu ĩġure weresãnirãre ĩġu ñero iirare mure weredoretuhajabũ yũhũ,” arĩ gojapũ surara opu.

³¹ Eropirã surara erã opu ĩġu dorediro dopa ta iĩñorã. Iri ñamire Antĩpatri waĩcũri macague Pablora aĩ ejañorã. ³² Gajinũ gajirã surara cabayua weca peyabirã iri maca ta dujariñorã erã ya macague. Gajirã surara cabayua peyarã dihta ĩġure aĩ tarigãñorã. ³³ Pũ Cesareague aĩ ejañorã Pablora. Eropirã surara opu ĩġu obeorapũre opu Felire wiañorã. Eropirã Pablora aĩ ejañorã opu pohroque. ³⁴ Erã eropa wiara pũhrũ iripũre ĩġu ĩara pũhrũ ĩġu gajirãre serẽpi ĩapũ:

—¿Di yeba majagu ãhriri ihĩ Pablo? arĩ serẽpi ĩapũ.

—Cilicia yeba majagu āhrimi, arī wereñorā ĩgure.

³⁵ Erāre serēpituhaja, Feli Pablore wererɸ:

—Mure weresānirā ōre erā eracũ mɸ wererire peegura, arīɸ Feli Pablore.

Īgu eropa arīra pɸhrɸ Herode ya wihigue ĩgure arīɸ. Eropigu ĩgu ɸmare ĩgure core-doreɸ ĩgu opɸ.

24

Pablo “Ñero iibirabɸ,” arī wererɸ Felire gajirā weresāra pɸhrɸ

¹ Cinco nuri pɸhrɸ Ananía pahia opɸ, judio masa erā mūrā, dorerire weremehregɸ Tértulo waĩcugɸ mera Cesareague ejañorā. Eropirā erā Pablore weresādiarā, opɸ Feli pohroque ejañorā.

² Eropigu Pablore erā gamenererogue erā aĩ ejara pɸhrɸ Tértulo ĩgure weresānugapɸ. Eropa weresānugagɸ ōpa arīɸ Felire:

—Mɸhɸ ōaro masigu, gua opɸ mɸhɸ ōaro dorecũ gua i yeba majarā ōaro árĩcāa gua gamequeāro mariro. Mɸ doreri mera ōaripure gohroto iiaa i yeba. ³ Eropirā gua ōaro árĩcārā mucubiria. Eropirā mɸ mera ōaro mucubiria. ⁴ Dohpague merogā mure garibogura yɸhɸ. Merogā mɸ mera weretamudiaca. Gware peenique dohpa. ⁵ Ihĩ gware garibotariami.

Árĩpehreri yebari majarāgue judio masare erā gua gaguiniguicũ iimi ihĩ. Eropigu masa erā basi gameturicũ iimi ihĩ. “Oparāre cóārā,” arīrā mera majagu āhrimi ihĩ. Eropigu nazareno waĩcɸri curu opɸ āhrimi. ⁶ Eropigu Goāmɸ

wihire ñero ïgu iidiacũ ïarã gua ñeabu ïre. Gua ñeara pũhrũ gua ya dorerire ïgu tarinũgagu árĩcũ ïgure dipuwaja moadiarabu gua. ⁷ Eropa moadiaquerecũ surara opũpu Lisia waĩcũgu ïgure guare turaro mera emacãmi. ⁸ Pũhrũ ïgure weresãnirãre mũ pohroque wadoreami Lisia. ïgu eroparĩcũ peerã ahrabu gua. Mũ tamera ïre serẽpigũ, árĩpehrerire ïgu ya dipuwajare masigũca mũhũ, arĩpu Tértulo Felire.

⁹ ïgu eropa arĩra pũhrũ gajirã judio masa Tértulo ïgu arĩdiro dopa ta “Diaye ta ãhraa,” arĩñorã erã sã. ¹⁰ Erã eropa arĩ weresãra pũhrũ opu Feli Pablöre weredorepu. Ōpa arĩ werepu Pablo:

—Baja bojori i yeba majarãre mũ dorerare masia yũhũ. Eropigu yũ iirare mũre weregu mucubiria. ¹¹ Doce nũri ta wahaa Jerusalẽngue Goãmũre yũ umupeora pũhrũ. Mũhũ i diaye árĩcũ masidiagu gajirãre serẽpi ïaque. ¹² Judio masa yũre Goãmũ wihiguere boca erã ñeacũ masare arĩ gaguiniguigu iibirabu. Eropigu “Oparãre cóãque,” arĩgu iibirabu. Eropigu judio masa buheri wirire, erã ya maca sãre ne ñero iibirimurabu. ¹³ Eropirã yũre weresãnirãpu erã weresãrere “Ōpa iiami ihĩ,” arĩ weremasibeamã mũre. ¹⁴ Dohpague yũ iirare weregũra mũre. Matague ta gua ñecũ sumarã erã umupeodiro dopa ta Goãmũre umupeoa yũ sã. Eropigu Goãmũ yare iiaa Jesu ya õari buheri iri arĩro dopa ta. Oã “Jesu ya gũyabirari ãhraa,” arĩ wereniguima oã judio masa. Eropigu Goãmũ doreri, Moiseguere ïgu apirare iri sãre umupeoa

yuhũ. Eropigu Goãmũ ya weremũhtanirã erã gojara sãre umupeoa yuhũ. ¹⁵ Oã gajirã judio masa mera ta “Goãmũ árĩpehrerã masare s̄irinerãre òarã, ñerã mera erã masa mũriacũ iigacumi,” erã arĩ pepiro dopa ta yũ sã eropa ta arĩ pepia. ¹⁶ Eropigu dipuwaja mara yuhũ. Goãmũ irire masimi. Eropirã masa sã irire masima. Eropigu diaye ta werea yuhũ mũre.

¹⁷ “Gaji bojorire gajipũgue yuhũ curigu árĩgu dujarabũ Jerusalengue. Yũ acawererã Jerusalén majarã mojomorocũrãre niyeru ogu arigu iiabũ. ¹⁸ Dujara, Goãmũre umupeobu ñgu ya wihigue ejarabũ. Eropigu Goãmũ ñgu coedorero dopa yũ basi iira pũhrũ waibũgũre odjarabũ Goãmũre umupeobu. Erogue yũ árĩcũ oã judio masa yũre bocama. Erã bocacũ gajirã yũ mera majarã marama. Gua gaguiniguirã marama. ¹⁹ Eropirã gajirã judio masa Asia yeba majarã ero ãhrama. Erã yũ ñero iicũ ñanirã árĩrã weresãrã ariporo õguere. ²⁰ Oã õgue árĩrãpũ judio masa oparã gamenererogue yũ árĩcũ ñanirã yũ erogue ñero iirare masirã, erã sã weresãporo. ²¹ Gaji tam-erare yũre erã weresãmasima: Erã mera árĩgu õpa arĩ bũrigã gaguiniguibũ yuhũ: “ ‘S̄irinerã masa mũriarãcoma,’ yũ arĩra waja dipuwaja moaa mũa,” arĩbũ erãre, arĩ werepũ Pablo Felire “Ñero iibiribũ,” arĩgu.

²² Ñgu eropa arĩ werera pũhrũ Feli õpa arĩ werepũ Pablora:

—Dohpaguere iripẽta ãhraa. Surara opũ Lisia ñgu erara pũhrũ mũre yũ iiborore masigũca

yuhũ, arĩpũ Feli Pablöre. Felipũ Jesu yarã erã iirare ðaro masipehogũ árĩpũ.

²³ Eropa arĩtuhaja, Pablöre coregũre surarare Feli ðaro ïhadibudorepũ peresugue árĩgũ duhriri arĩgũ. Eropa ïhadibudorequeregũ ðaro iidorepũ ïgũre. Eropigũ merogã ópũ ïgũ curiborore. Pablo mera majarãre ïgũre peresugue árĩgũre itamudoregũ eropa dorepũ Feli.

²⁴ Bajamenũri pũhrũ Feli ïgũ marapo Drusila waĩcũgo mera ahri, Pablöre sihuñorã daja. Feli marapopũ judio maso árĩpo. Pablöre erã sihura pũhrũ, Jesucristore ïgũ umupeorire Pablopũ werepũ erãre. ²⁵ Eropa weregũ, ðarire, ðaro guñamasirire, ñerire gamebiririre, pehrerinũ árĩcũ masare Goãmũ dipuwaja moaborore werepũ Pablo. ïgũ eropa arĩ werecũ peegũ Feli güigũ, Pablöre werepũ:

—Dohpaguere waque. Pũhrũ yũre mohmeri maricũ sihugũra daja, arĩpũ Pablöre.

²⁶ Eropa arĩgũ, Pablo ïgũre niyeru ocũ gameripũ Feli. Eropigũ ïgũ niyerure gamegũ, bajasuburi Pablöre sihu, ïgũ mera wereniguimũripũ Feli. Niyerure ïgũ wajayecũ ta Pablöre wiuboñumi gajisubu arĩgũ. ²⁷ Pe bojori pũhrũ Porcio Festo waĩcũgũ Felire gohrotogũ árĩpũ. Eropigũ Felipũ opũ árĩgũ judio masare mucubiricũ iidiarũ. Eropigũ ïgũ Palöre peresu árĩdorepũ dohpa.

25

Festore Pablo ïgũ iirare werepũ

1 Eropii Festo iri yebague ʘhrenʘ ʘgu opʘ ñajara pʘhrʘ, Cesareague árĩdigʘ waha, Jerusaléngue ejaꝑʘ. 2 Ero ʘgu ejacũ ʘha pahia oparã, judio masa oparã mera Pablöre erã weresãrare wereñorã Festore. 3 Pablo ʘgu mague wacũ iri mague ʘgure cohre, wejẽdiariñorã ʘgure erã. Jerusalén mague aricũ gameriñorã ʘgure wejẽmorã. Eropirã erã õpa Festore ʘꝑʘtʘ serẽriñorã:

—Pablöre õguere Jerusaléngue obeoque, arĩ serẽriñorã erã Festore Pablöre wejẽdiarã.

4 Erã eroparĩcũ peegu, Festo wereꝑʘ erãre:

—Dohpaguere Pablo Cesareague peresu aħrimi. Dohpaguere yʘhʘ erogue wabu iiaa. 5 Pablo ʘgu ñero iigu árĩcũ, mua oparã Cesareague yʘ mera waha, ʘgure weresãque, arĩꝑʘ Festo.

6 Eropigu Festo ocho o diez nʘri erã mera ʘgu árĩra pʘhrʘ Cesareague dujaa wapʘ. Gajinʘ ʘgu dipuwaja moadoreri wihi doagu, Pablöre aĩgãridoreꝑʘ. 7 Eropirã Pablo Festo pohrogue ʘgu eracũ, judio masa Jerusaléngue arinirãꝑʘ Pablo pohro nigui, ʘgure burigã weresãnugañorã. Eropa weresãquererã “Iħĩ ʘgu ñero iicũ ʘabʘ,” arĩ weresãmasibiriñorã. 8 Erã eropa arĩ weresãra pʘhrʘ Pablo ʘgu iirare wereꝑʘ:

—Judio masa erã dorerire, Goãmʘ wihi maja dorerire, Roma opʘ ʘgu dorerire ne tarinʘgabitabʘ, arĩꝑʘ Pablo.

9 Festopʘ judio masare mucubiricũ iidiagu, Pablöre serẽꝑirʘ.

—¿Jerusaléngue wadiari mǎhǎ? Mǎ iirare yǎre erogue weregǎca mǎhǎ, arǐpǎ Festo Pablöre.

¹⁰ Īgǎ eroparǐcǎ Pablo yǎhrípǎ:

—Arǐpehrerǎ weca opǎ Īgǎ ya wihi dipuwaja moadoreri wihi āhraa dohpaguere. I wihino ta ohǎ sǎ āhraa. Eropigǎ yǎ iirare ohǎ ta amu purumujuque. Judio masare yǎ ñero iibirirare ōaro masia mǎhǎ. ¹¹ Ñerire iigǎ dorerire tarinǎgagǎ árǐgǎ “Yǎre wejēbircāque,” arǐbiriboaya. Eropigǎ oǎ weresāripǎ gǎyari iri árǐcǎ yǎre weresānirǎre yǎre omasibea mǎhǎ. Yǎ iirare árǐpehrerǎ weca opǎre Césare weregǎ wadiaca yǎhǎ, arǐpǎ Pablo.

¹² Īgǎ eroparǐcǎ peegǎ Festopǎ ōaro masi wererǎre serēpituhaja, werepǎ Pablöre.

—Mǎhǎ árǐpehrerǎ weca opǎre mǎ iirare mǎ werediacǎ, Īgǎ pohrogue Romague obeorǎra mǎre, arǐpǎ Festo Pablöre.

Pablo opǎ Agripare Īgǎ iirare werepǎ

¹³ Festo opǎ ñajara pǎhrǎgue opǎ Agripa, Berenice waǐcǎgo mera Cesareague Festore ĩarǎ ejañorǎ.

—¿Ne, erarari mǎ sǎ? arǐñorǎ erǎ Festore bocatǐri serērǎ. ¹⁴ Ero bajamenǎrigǎ erǎ árǐra pǎhrǎ Festo werepǎ Agripare Pablöre erǎ iirare.

—Ōre Feli Īgǎ peresu iidigǎ āhrimi. ¹⁵ Eropirǎ Jerusaléngue yǎ wacǎ judio masa erǎ pahia oparǎ, erǎ mǎrǎ mera ĩre weresāma. “Īgǎ ya dipuwajare wejēque Īgǎre,” arǐ serēama erǎ yǎre. ¹⁶ Erǎ eroparǐcǎ peegǎ yǎ ōpa wereabǎ: “Gǎa Roma majarǎpǎ peresu erǎ

iinirãre masare eropa ta ocãbirimuribu. Eropigu ïgure osome muare. Gua ñeadigure ïgure weresãnirã guare wereniguiboro core ïgure dipuwaja moamasibea gua. ïgu basi sã ïgu iirare ïgu werenibiricũ ïgure dipuwaja moamasibea gua,” arãbu erãre. ¹⁷ Eropigu õre erã weresãrã eracũ ïagu yoari boje iibirabu yuhu. Eropigu gajinure masa dipuwaja moadoreri wihi yu doagu, erã weresãdigure sihubeoabu. ¹⁸ Eropirã iri wihi ïgu eracũ ïarã ïgure ïhaturirã wahgãnuğajama. Erã eropa wahgãnuğajacũ ïagu ñetariaro arĩ weresãrãcoma arĩ pepirabu yuhu erãre. ïgure weresãdiaquererã weresãmasibirama erã. ¹⁹ Eropirã ïre Goãmu yare ïgu werera dipuwaja judio masa ïgure ïhaturiamã. “Jesu waĩcũgu ïgu sĩridigu masa muriadi arĩmi,” arĩ ïgu werera waja weresãma ïre. I dihtare weresãma. ²⁰ Ire masibigu ïgure õaro serẽpi ïabu. “¿Jerusalẽngue wadiacuri yu mera? Erogu wereque mu iirare yure,” arĩrabu ïgure. ²¹ Yu eroparĩcũ peegu ïguwu wadiabirami. “Yu iirare arĩpehrerã weca opuere werediaca,” arãmi ïgu yure. ïgu eropa arĩra puhru ohõ ta ïgure coredoreabu arĩpehrerã weca opu pohro ïgure yu obeoboro core, arĩpu Festo Agripare.

²² —Yu basi peediaca ïgure, arĩpu Agripa Festore.

—Ñamigã ta ïgure peeguca muhu, arĩ yuhripu Festo.

²³ Eropirã gajinu arĩcũ Agripa, Berenice mera masa dipuwaja moadoreri wihigue eja, “Oparã

ãhraa gua,” arĩrã guhyadiaro ii ãhmuñorã erã, surara oparã, iri maca majarã oparã mera. Eropa ii ñajarã iri wihiguere ñajañorã. Erã ñajajara pũhrũ Pablöre sihubeopũ Festo.
²⁴ Eropigu Festo õpa werepũ:

—Opũ Agripa, mua árĩpehrerã i wihire gamenererã peeque. Õre ihĩ bajarã judio masa erã weresãguã ãhrimi. Jerusalengue Cesareague sãre erã ãgũre weresãma. “Ãgũre wejẽque,” eropa arĩniguicãrã iima erã.
²⁵ Erã eropa arĩquerecũ ta õpa arĩ pepia yũhũ. Ihĩ ne ñero iidiguã árĩbeami. ¿Ñehe dipuwaja mari wejẽbocuri ãgũre? Eropiguã árĩpehrerã weca opũre César Augustore ãguã iirare ãguã were-diãcũ árĩpehrerã opũ pohrogue obeogura ãre.
²⁶⁻²⁷ Eropiguã ihĩ ãguã iirare masibirinica yũhũ dohpa. Eropa masibiriniguã mari opũre were gojamasibirica. Eropiguã muare ãguã werecũ peedoreguã iiaa dohpaguere. Opũ Agripa, dohpague tamerare ihĩ ãhrimi mũ serẽpi ãabu. Mũ serẽpi ãatuhaja mari masira pũhrũ ãre erã weresãrare õaro were gojagura. Ihĩ ãguã ñero iirare yũ masibiriquereguã ta opũ pohrogue ãgũre yũ obeocũ õabeaa. Eropiguã dohpaguere erã weresãrare õaro masidiãguã iiaa, arĩpũ Festo erãre.

26

Pablo Agripare ãguã iirare werepũ

¹ ãguã eropa arĩra pũhrũ Agripa Pablöre arĩpũ:

—Mũ basi ta wereque, arĩpũ ãguã Pablöre. ãguã eropa arĩra pũhrũ Pablopũ, “Ejarimaricãque,”

arĩgu ĩgu mojtore aĩ wahgũbeo, ĩgu iirare werenugaru:

² —Opu Agripa, yure judio masa erã weresãrare, yu iirare mare weregu, dohpaguere ãaro siporãcãa. ³ Gua judio masa gua iiricũre, gua buheri sare mũhu ãaro masicũ tamerare mucubiria yũhu. Eropigu mũhu yure ãaro peeque, arĩnugaru Pablo.

Pablo Jesu yagu ĩgu arĩboro core ĩgu arĩricũrare werepu

⁴ Eropa arĩtuhajagu ãpa arĩnemoru ĩgu:

—Mamu arĩgu yu arĩricũrare arĩpehrerã judio masa masima. Umari nucu yu masa dehyoara puhru yaha yebaguere, Jerusalengue sare yu arĩrare masima erã. ⁵ Negohraguere fariseo masu arĩribu. Eropigu fariseo masa erã dorerire, erã iirnore yũhu ipehodigu arĩcũ erã masima. Erã mare werediarã, irire weremasima erã. ⁶ I dipuwaja ta yure weresãmurima. Gua ñecu sumarãre “Sĩrinirãre masugura,” Goãmu ĩgu arĩ apirare “Diaye ta ahraa,” yu arĩri waja oã yure weresãmurima. ⁷ Yu acawererã judio masa, arĩpehrerã doce cururi majarã Goãmu masare ĩgu masuborore mucubiri cohrema. Eropirã Goãmure umupeoniguicãma. Eropa corerã arĩrã yu iiro dopa ta iima erã sã. Opu Agripa, eropa yujuropa gua iirã arĩquerecũ ta erãpu yũhu ĩgu masuborore ii coreri waja yure weresãmurima judio masa. ⁸ ¿Duhpirã sĩrinirãre Goãmu ĩgu masuborore peediabeari mua judio masa? arĩ werepu Pablo.

Pablo Jesu yarãre ĩgu ñero iirare werepu

⁹ Eroparītuhaja õpa werenemopu:

—Jesu Nazare majagure ïanibigu dohpa ñeri dihtare iidiaribu yuhu ïgu yaräre. ¹⁰ Eropigu Jerusalengue eropa iimuriribu yuhu. Pahia oparã yure erã dorera puhru bajarã Jesu yaräre peresu iimuribu yuhu. Eropigu oparã eräre erã wejẽdorecũ, wejẽmuribu yu sã. ¹¹ Bajasuburi árĩpehreri judio masa erã buheri wirigue Jesu yaräre ñero iidoremuricarabu. Eropigu Jesu yarã Jesure erã cóãcũ iidiaribu yuhu. Erã mera burigã guabu yuhu. Eropigu gaji macarigue sãre eräre ñero iigu ejamuricarabu yuhu, arĩ werepu Pablo.

Pablo Jesu yagu ïgu warare werepu

¹² Eropa arĩtuhaja õpa werenemopu:

—Eropigu Damascogue Jesu yaräre ñero iidiagu ejaribu. Eräre yuhu ñero iidiacũ ïarã pahia oparã yure wadorema. ¹³ Õpa árĩbu, opu Agripa: Goeri boje árĩcũ gohra mague yu wacũ umaro maja gosesiriri, abe umu majagu tauro yure yu mera warã sãre gosesiribu. ¹⁴ Gua árĩpehrerã yebague mehmerejabu. Judio masa ya mera yure ïgu wereniguicũ peebu. “Saulo, Saulo, ¿duhpigu muhu yure ñero iiri? Muhu yu mera guagu yure yuhribigu, mu basi ñero taria,” arĩmi yure. ¹⁵ “Opu, ¿nihino añriri muhu?” arĩ serẽpibu yupu. “Yuhu Jesu ta añraa mu ñero iigu. ¹⁶ Wahgãnugajaque muhu. Yu pohro majagu mure iibu dohpague dehyoa yuhu. Dohpagãre muhu yure ïarare, puhru mure yu ïhmuburi sãre gajirãre weredorebu apiguca mure. ¹⁷ Judio masare, judio masa árĩbirã

sãre mũre buhedoregũ obeogũra. Erã pohro mũ áricũ, mũre erã ìhaturicũ mũre itamugũra. ¹⁸ Yahare erãre masicũ iique mũhũ. Eropigũ erã ñerire duhucũ iique mũhũ. Ôaripũre gohrotocũ iique erãre. Watĩre erãre gamebiricũ iique mũhũ. Eropigũ Goãmũ yapũre iicũ iique mũhũ erãre. Mũhũ eropa iicũ erã yũre umupeorãcoma. Erã eropa umupeocũ ìagũ erã ñeri iirare cãdijigũca. Eropirã erã Goãmũ ìgũ beyenirã mera majarã mera árĩrãcoma. Ìgũ oburire opamorã árĩrãcoma erã,” arĩmi Jesu yũre, arĩ werepũ Pablo.

Pablo ìgũ iirare ìgũ mohmerire werepũ

¹⁹ Eroparĩtuhaja õpa werenemopũ:

—Opũ Agripa, umaro maja yũ peerire tarinũgagiribũ. ²⁰ Damascogue buhemũhtabũ. Pũhrũ Jerusalén buhebũ daja. Pũhrũ Judea yeba, judio masa árĩbirã pohroque sãre masare erã ñero iirare bujaweredore, Goãmũ yare gamedorebũ. “Ôarire mũa iicũ ìarã mũa ñeri iirare mũa bujawererare gajirã masirãcoma,” arĩgũ, erãre õarire iidoregũ buhebũ. ²¹ Goãmũ ya wihi yũ áricũ yũ eropa arĩ wereri waja judio masa yũre ñeha wejẽdiarima. ²² Eropigũ umũri nũcũ Goãmũ ìgũ itamuro mera eropa buhenigũicãa. Eropigũ dohpaguere mũa árĩpehrerãre oparãre bu árĩrã sãre ìgũ yare weregũ iiaa. Ìribojegue majarã Goãmũ yare weremũhtanirã Moise mera erã wereyudiro dopa ta werea yũ sã. Ôpa arĩ wereyuñorã erã: ²³ “Cristo Goãmũ ìgũ obeodigũpũ ñero

tarigucumi. Eropigu sīrigu masa mūriamūhtagu árīgucumi ĩgu. Eropigu masare ĩgu itamuborore judio masare judio masa árībirā sāre masicū iigucumi,” arī wereyu gojamūriñuma iribojegue majarā. Yu sā erā werediro dopa ta werea, arī werepū Pablo Agripare.

Pablo Agripare Jesu yagu iidiaripū

²⁴ ĩgu eropa arī werera pūhrū Festo ĩgure būrigā gaguinigui wereniguipū:

—Pablo, mūhū goroweregu āhraa. Mūhū baja buhegu goroweregu wahaa, arī gaguiniguiipū Pablōre.

²⁵ ĩgu eroparīcū peegu ōpa yūhripū Pablo Festore:

—Opū, goroweregu árībeaa yūhū. Yu wereri diaye ta āhraa. Eropigu yūhū ire gūhyadiaro mera arāa. ²⁶ Opū Agripapū i yū wererire ōaro masimi. Eropigu yūhū ĩgure güiro mariro werea. I wererire árīpehrerā masa masima. Eropigu árīpehreri ire yū arīrare opū Agripa ĩgu masicū masia yūhū, arīpū Pablo Festore.

—ĩgu eropa arītuhaja ōpa arīpū Agripare:

²⁷ —Opū Agripa, Goāmū ya weremūhtanirā erā wererare peea mūhū. Erā wererire mū peecū masia yūhū, arīpū Pablo Agripare.

²⁸ —¿Ire yūre weregu merogā mū wereri Jesu yagu yū wacū iidiaгу iiri mūhū? arīpū Agripa Pablōre.

²⁹ ĩgu eroparīcū Pablo yūhripū.

—Merogā wereniguigu o yoari boje wereniguigu mūa árīpehrerāre yūhū árīro dopa ta Jesu yarā árīcū gahmea. Irire serēbasaa

Goãmure. Eropigu yu iro dopa ta peresugue mua árĩcũ tamerare gamebeaa yũhũ, arĩpũ Pablo.

³⁰⁻³¹ Īgu eropa arĩra pũhrũ Agripa, Festo, Berenice árĩpehrerã gajirã mera wahgãnuga wiria, erã basi wereniguiñorã:

—Ihĩ Īgu iira waja ne peresu iimasibea mari. ¿Eropirã mari ñeheno dipuwaja Īgure wejẽbocuri? arĩ wereniguiñorã erã erã basi.

³² —Ihĩ “Árĩpehrerã weca opũre yu iirare werediaca,” Īgu arĩbiricũ mari wiuboaya Īgure peresugue árĩgure, arĩpũ Agripa Festore.

27

Pablo ĩgure weresãrare Romague weregu warũ

¹ Pablöre Italiague árĩpehrerã weca opu pohrogue dohodiru mera obeorã, ĩgu mera gajirã peresu árĩrã sãre obeoñorã. Eropirã Julio waĩcũgure erãre ĩhadibudorerã obeoñorã erã. Julio cien surara opu árĩpũ. Īgu ya curu Augusto yarã surara waĩcũñorã. ² Yu sã Pablöre wapicũgãbu. Eropirã Adramitio waĩcũro majaru dohodiru mera ñajabu gũa. Iriru Asiague waburidiru árĩbũ. Ñajatuhaja, iriru mera wabũ. Aristarco Tesalónica waĩcũri maca majagu gũa mera wami. Tesalónica Macedonia yeba árĩbũ. ³ Gajinu gũa Sidongue ejabu. Erogue ejagu Julio Pablöre ðaro iimi. Eropigu Pablöre ĩgu mera majarã pohrogue ĩagu wadoremĩ. Eropigu Pablo mera majarã ĩgure ĩgu gamerire erã ocũ “Õaroca,” arĩmi Julio. ⁴ Dohodirugue ñajarã daja gũa taribujacũ bũrigã

miruñe guare gajipugue weātaribujubũ. Eropirã Chipre waĩcũri nũguro cãhmotarogue diayepũ wabũ gũa. ⁵ Pũ Ciliciare taria, Panflia sãre taria, Mira waĩcũri macague Licia yebague árĩri macague tuhajabũ gũa.

⁶ Erogue ejarã, Alejandriague aridirure, Italiague wadirure dohodirure bocabũ. Eropigũ surara opũ guare irirugue wadoremi. ⁷ Bajanũri dabero waro waha, “Ñe yeboca,” arĩ, waha, Gnido waĩcũri maca diaye ejabũ gũa. Erogue eja taria, miruñe bũrigã weã, gũa wadiadirore guare weãbeobiribũ. Eropirã gũa copugue majipa wabũ. Eropirã Creta waĩcũri nũguro iri nũguro cãhmotari masepũ gũa taribuja waha, Salmón waĩcũri ñorore tariabũ gũa. ⁸ Erogue tari, iri nũguro pohro waha, “Ñe yeboca,” arĩ waha, “Õari peramaha” waĩcũrogue tuhajabũ. Peramaha Lasea waĩcũri maca pohrogue árĩbũ.

⁹ Erogue gũa yoari boje árĩra pũhrũ, gũa waboropũ guhyataribũ. Eropiro erã ba duhurinũ bosenu tarira pũhrũ, Pablo dohodiru majarãre weremi.

¹⁰ —Peegue mũa. Ba duhurinũ bosenu pũhrũ mari wacũ marire mirimaja guhyataria. Iru dohodiru, dohodiru maja, mũa doberi sã mari mera majarã sã mari dedereboca warã, arĩrimi Pablo.

¹¹ Ìgũ eroparĩquerecũ surara opũ dohodiru opũpũre peegũ, autugũ sãre peegũ, Pablo ìgũ wereripũre peediabirimi wadiagũ. ¹² Erã payari peramaha puhiró árĩcũ õari payari peramaha árĩbiribũ. Ero eropa árĩri peramaha árĩcũ

dohodiru majarã bajarã wadiarã, Fenicegue m̄ariadiarima puhiró waboro core. Fenice Creta waĩc̄uri n̄uḡuro maja peramaha árĩro, miruñe ero aridirogue abe m̄aririroguep̄u cop̄ugue diayep̄ugue s̄are ãhabeo miruñe aricũ õaro cãhmotari maca árĩb̄u. Ero eropa árĩri peramaha árĩcũ masirã erã erogue yuju puhib̄uḡu árĩrisubu árĩdiarima.

W̄ariyague miruñe, deco w̄araro ariyoro

¹³ Eropii docap̄u surgue daberogã miruñe arin̄ugab̄u. “Dohpagãre õarin̄u mari waburin̄u ãhraa,” arĩ pepiriñorã erã. Miruñe ero aricũ erã comeyere tarawahgũ, Creta n̄uḡuro pohrogã m̄uriab̄u ḡua. ¹⁴ Eropii p̄hruñari miruñe gohroto noreste waĩc̄uri miruñe b̄urigã weãb̄u. ¹⁵ Eropiro dohodirure miruñe b̄urigã weã erab̄u. Miruñe ero weãbeoro wamasibiri, majipa, miruñe mera wab̄u ḡua. ¹⁶ Claudia waĩc̄uri n̄uḡurogã pohrogue docap̄ugue waha, iri n̄uḡurogã guare merogã cãhmotab̄u. “Marire yebo ãhraa,” arĩrã erore dohodiru majaru miridirugã gasirure õaro tarapeo dirib̄u ḡua. ¹⁷ Irirure dohodirugue ḡua tarasã diripehora p̄hru w̄arida mera erã waĩñea peoma. Libia yeba t̄uro pohro árĩri imipororire “Iriru gasiru dohodiru iri mehtuhajari,” arĩrã ḡui árĩma erã. Eropirã erã miru ñeari suhrire erã aĩdijura p̄hru dohodiru dihtare miruñe weãbeob̄u. ¹⁸ Miruñe, deco mera b̄urigã arib̄u. Gajin̄u s̄are miruñe m̄araro ta daja aricũ ãarã erã erã doberire diague duhrimeyura p̄hru taribujab̄u ḡua. ¹⁹ Gajin̄u dohodiru majare diague cóãma

erã erã basi. ²⁰ Bajanuri ñípirinuri árĩcũ, abe umu majagu necã sã ne deyobirima. Eropiro burigã miruñe aribu. Eropirã “Miria wahaa mari. Eropirã síria warãca,” arĩ pepiribu gua.

²¹ Eropigu Pablo yoari boje erã ba duhura puhru igu erã core nũgaja, weremi erãre.

—Mũare yu werecũ peebirabu mua. “Cretague árĩrã mari wacũ guhya árĩca,” yuhũ arĩcũ peebirabu mua. Yũre peerã, iru maja árĩpehrerire dedeobiriboaya mua. ²² Eropigu dohpague mũare werea. Guñaturaque. Eropirã güibiricãque. Árĩpehrerã mari tarirãca. Iru dohodiru dihta marire wahribasaroca. ²³ Dohpagã ñamire Goãmu anyu yũre dehyoami. Goãmu yagu ãhraa yuhũ. Eropigu igũre umupeoa yuhũ. Anyupu yu pohro arigu wereami. ²⁴ “Pablo, güibita. Árĩpehrerã weca opure mu iirare mũre werero gahmea. Goãmu ðagu ãhrimi. Eropigu igũre mu serẽro dopa ta dohpague mua mera majarã sãre itamugucumi,” arãmi yũre anyu. Eropirã güibirãta mua. ²⁵ Anyu yũre igu arĩdiro dopa ta eropa waroca. Goãmure umupeoa yuhũ. Eropigu igu werediro dopa ta “Diaye ta ãhraa,” arĩ pepia yuhũ. ²⁶ Marire nũgũrogue miruñe weãbeo cóãroca, arĩ weremi Pablo erãre.

²⁷ Yuju ñami pe semana puhru wũariya Adria waĩcũriya miruñe guare burigã weãbu. Irisubure ñami deco dohodiru majarã umapu “Tũrogue ãhraa mari,” arĩ pepima erã. ²⁸ Erã eropa arĩ pepirã yurada nũcũdiru comerure dihri, duhmiumediju queoñama. Treinta y seis metro gohra ãhcãbu. Mero ta waha, queoma

daja. Irisubure veintisiete metro gohra ũhcãbũ.
²⁹ Eropirã utãre mehtuhajari arĩrã dohodiru auturogue wapicãriye comeyerire dirimiu dijuma erã diague dabero wacũ gamerã. Eropirã “Yojarõ boyoporo,” arĩrã, bũrigã serẽma erã.
³⁰ Dohodiru majarã ũmapũ erã dihta duhririma. Erã miridirugãre dohodiru majarure diague taradijupo dohodiru ĩguiru come dipure erã dijudiro dopa ta iirima erã miridirugã marire ĩhari arĩrã. ³¹ Erã eropa duhridiaquerecũ Pablo erã eropa iicũ masigũ surara opũre, ĩgũ surara mera weremi:

—Oã, ũma miridirugã mera erã wacũ mũa árĩpehrerã sĩrirãca, arĩmi Pablo.

³² ĩgũ eroparĩcũ peerã surarapũ miridirugãre diriridarire wirita, irirure cóãcãma.

³³ Boyoboro coregã Pablo erãre badoremi.

—Pe semana gohra mũa ne babeaa. ³⁴ Eropirã dohpaguere barã arique. Eropigũ mũare badorea. Mũa ojocaridiarã baque. Árĩpehrerã mũa tarirãca, arĩmi Pablo erãre.

³⁵ ĩgũ eropa arĩra pũhrũ Pablo panre aĩ, árĩpehrerã erã pohro Goãmũre “Õhaa,” arĩ, duhpeo, irire bami ĩgũ. ³⁶ ĩgũ eropa bacũ ĩha erã sĩporã turarã waha, árĩpehrerã erã sã bama. ³⁷ Gũa árĩpehrerã doscientos setenta y seis masa dohodirugue árĩbũ gũa. ³⁸ Eropirã erã árĩpehrerã yapia waha “Iru dohodiru nũcũ árĩca,” arĩ, baja trigo barire diague cóãma daja.

Dohodiru imiporogue mehbejayoro

³⁹ Boyocũ dohodiru majarã ũma nũgũrore ĩarã, “Õpa waĩcũri nũgũro ãhraa i nũgũro,”

arĩ ĩha masibirima. Eropirã erã dipatũgure imiporo árĩcũ ĩarã, “Mari iritũgugue warã, erogue mehmejaboca imiporogue,” arĩma erã. ⁴⁰ Eropa arĩrã, come dipure diriridarire wiritã medijucãma erã. Erã eropa iira pũhrũ dohodiru ĩguiru maja suhriro aĩ wahgũ nuguma diaye miruñe weãbeocũ gamerã. ⁴¹ Eropiro dohodirupũ ĩguirupũ imiporogue sĩmaja merejamasibiribũ. Eropiro auturore bũrigã pãgũri pamehtucũ iriru auturo wahria wabũ.

⁴² Eropa wacũ ĩarã õpa arĩma surara.

—Iru miricũ mari peresu iinirã tũrogue baatuhaja duhricãrãcoma. Eropirã erãre wejẽpehocãrã, arĩrima surara.

⁴³ Eropigũ surara opupũ Pablora wejẽdiabigũ árĩpehrerã peresu árĩrãre wejẽdorebirimi. Eropigũ árĩpehrerã baamasirãre surara opu mata tũrogue baatujadoremi. ⁴⁴ Eropirã gajirã dohodiru maja wahrira mijiri mera yuuriñaja, iri mijiri weca peya baa majama. Gũa eropa iirã gũa árĩpehrerã tũrogue tuhajabũ õaro.

28

Pablo Malta waĩcũri nũgũro árĩpũ

¹ Eropii iri nũgũrogue gũa árĩpehrerã majajanũgajara pũhrũ iri nũgũro waĩre masibũ. Malta waĩcũri nũgũro árĩbũ. ² Iri nũgũro majarã masa õarã árĩrã, õaro iima gũare. Eropirã deco gũa weera pũhrũ yũsatariabũ gũare. Eropirã ero majarãpũ peame dihutuhaja, gũare sõhmadorema. ³ Pablo peare aĩgãri aĩtĩami. ĩgũ aĩtĩara pũhrũ iri pea pohecague árĩdigũ aña

coñorpore wirigu, Pablo mojoto curĩtuhajami yahawearo mariro. ⁴ Īgu curĩtuhajacũ ĩarã, iri nuęuro majarã erã basi wereniguima:

—Ihĩ masa wejēdigu árĩbocumi. Eropigo mari turago dipuwaja moago ɯmaro majago ĩęure dipuwaja moago, ojocaridorebeamo. Īgu wuariyague mirigu tarituhajadigu árĩrami. Dohpaguere igoru ĩęure ojocaridorebeamo, arĩrima erã basi.

⁵ Eropigu Pablo añare peamegue wejēsiri mehpeomi. Īgu aña pũribirimi. ⁶ “Bijiroca,” arĩrã, corerima erã. Ne bijibiribu ĩęure. “Īgu sĩria wagucumi,” arĩrã erã ĩha corerima. ĩęure pũribirimi. Yoari boje ero bijibiricũ ĩarã, ĩęure pũribiricũ ĩarã, gajiropa pepirima erã. “Ihĩ goãmarã mera majagu árĩbocumi,” arĩrima erã.

⁷ Erã baa tuhajadiro pohro Publio waĩcugu ya poeri árĩbu. Īgu iri nuęuro majagu opu árĩmi. Eropirã ĩgu guare oaro iicũ ɯhrenu gohra ĩgu ya wihigue árĩbu gua. ⁸ Publio pagu yojorocu, nimacuricugu árĩmi. Eropigu ĩgu camague oyami. Eropigu Pablo dorecugu ya taribugue ñaja, Goãmure serē, ĩgu mojotorire ĩgu weca duhpeo, oagu wacũ iimi ĩęure. ⁹ Īgu oagu wacũ ĩarã árĩpehrerã gajirã iri nuęuro majarã dorecũrãre Pablo pohrogue aĩęarima. Erã eropa aĩ eracũ ĩagu Pablo erãre oarã wacũ iimi erã sãre. ¹⁰ Pũhrũ erã baja sãre waja mariro oma. Gua waboro coregã árĩpehreri gua gamerire, gua warã gua baburire dohodirugue durisãbasama erã.

Pablo Romague ejarũ

¹¹ Ʋrerã abe iri nũgurogue gũa ářĩra pũhrũ dohodiru mera wabũ gũa daja. Iriru dohodiru řĩguiru perã goãmarã Cástro, Pólux waĩcũrã erã wéanirã niguima. Alejandriague aridiru árĩbũ iriru. Puhirópẽ iri nũgurogue iriru dohodiru payabũ. ¹² Waha, Siracusa waĩcũri macague ejarã, Ʋhrenũ gohra iri macare árĩbũ gũa. ¹³ Iri macare wiri waha, Regio waĩcũri macague ejabũ gũa. Gajinũ surgue miruñe ahri gũare weãbeobũ. Penũ pũhrũ Puteoli waĩcũri macague ejabũ. ¹⁴ Erogue Jesu yarã bajamerãgã gũare bocatĩrima.

—Yuju semana gohra gũa mera dujaque, arĩma erã gũare.

Erã eroparĩcũ peerã yuju semana gohra erã mera dujanibũ. Pũhrũ mague majaa, Romague ejabũ gũa pare. ¹⁵ Ero majarã Jesu yarãpũ gũa ejarare peerã, Apio waĩcũrogue doberi duarogue gũare bocatĩrima. Gajirã Jesu yarã “Ʋhre wihi” waĩcũrogue gũare bocatĩrima erã sã. Erã eropa bocatĩricũ řagũ Pablo mucubiriri mera Goãmũre “Ōhaa,” arĩ, õaro siñaja wami. ¹⁶ Romague gũa ejara pũhrũ erã peresu erã iinirãre ero majagũ peresu corerã opũre weremi. Eropirã Pablopũre yujugũ ta apima ero majarã oparã. Eropigũ řgũre yujugũ surara coremi.

Pablo Romague buherũ

¹⁷ Ʋhrenũ pũhrũ Pablo judio masa buherã mera gamenerebu, erãre sihumi. Erã gamenerera pũhrũ řgu erãre weremi:

—Acawererã, mari acawererãre, mari ñecũ sũmarã erã řimũrirare, marire erã buhera

sãre tarinugabirimurabu yuhũ. Yu eropa tarinugabiriquerecũ ta Jerusalén yure ñehama Asia majarã judio masa. Erã eropa iira pũhrũ Roma majarãre yure peresu iidorema erã. ¹⁸ Erã eropa iicũ Roma majarã yure serẽpi, yuhũ ñero iibigu yũ árĩcũ yure “Dipuwajacũgu ãhrimi,” arĩmasibirama. “¿Ñehe dipuwaja dipuwaja wejẽbocuri mari ïgure?” arãma erã yure. Eropirã yure serẽpirãpũ yure wiudiarama. ¹⁹ Judio masapũ yure wiudorebirama. Eropigu yũ acawererãre judio masare weresãdiabiriqueregu ta, “Árĩpehrerã weca opũre yũ iirare diaye werediaca yuhũ,” arĩ serẽabũ. Judio masa yure erã wiudorebiricũ ïagu “Roma majagu opũre weregu waro gahmea yure,” arãbũ. ²⁰ Eropii mũare ire werediagu sihuabũ. Cristo marire taubu judio masa erã coredigu ïgu yare yũ wereri waja yuhũ peregue ãhraa. Eropigu irire mũare werebu sihuabũ, arĩmi Pablo judio masa oparãre.

²¹ ïgu eroparĩcũ peerã erãpũ ïgure werema.

—Judio masa mũre quere wereripũrire guare ne obeobirama. Eropirã erogue arinirã sã guã acawererã guare mũ eropa warare weribirimurama. Erã “ïgu ñero iigu ãhrimi,” arĩ mũre werebirimurama. ²² Mũa ya curure árĩpehrerogues masa erã ñero wereniguicũ guã masia. Eropa masirã mũ buherire mũ werecũ peediaa guã, arĩma erã ïgure.

²³ Eropa arĩtuhaja, “Gajinũ árĩrã,” arĩma erã. Gajinũgue Pablo mera gameneremuhtanirã tauro masa bajarã ïgu árĩroguere erama.

Ñamiñarigã Goãmũ ïgũ opu árĩrare ðari buherire ïgũ buhenũga, pũ ñamigue buhe duhúmi. Goãmũ dorerire Moisegue ïgũ apirare, Goãmũ ya weremũhtanirã erã gojarare buhemi. Eropa buhegũ, erãre Jesure masicũ iidiagũ iirimi Pablo. ²⁴ Yujurãyeri ïgũ buherire gamema. Eropirã gajirãpũ peediabirima. ²⁵ Eropirã erã basi pe curu game dũca wari wama. Erã wiriaboro core Pablo Isaia ïgũ wereniguirare weremi. Õpa arĩmi erãre:

—Isaia Goãmũ yare weremũhtadigũ ïgũ werera diaye ta ãhraa. Mari ñecũ sumarãre weregũ árĩgũ Espĩritu Santo Isaiare õpa arĩ were gojadoreñumi:

²⁶⁻²⁷ Ire oãre weregũ waque: “Dipu bũrirã ãhraa mũa. Eropirã yahare peediabeaa mũa. Gamiri toyobirã dopa ta peediabeaa mũa. Eropirã yahare peequererã peesome mũa. Mũa eropa árĩbirã ðaro peeboaya mũa. Eropirã ðaripũre gohrotoboaya mũa. Eropigũ mũare peame wabonirãre tauboaya yũhũ,” arĩmi Goãmũ, arĩ gojañumi Isaia, arĩmi Pablo erãre.

²⁸ ïgũ eropa arĩra pũhrũ Pablo werenemomi:

—Ire masique mũa. Goãmũ buherire masare ïgũ ðaro taurire judio masa árĩbirãre buherãca gũa. Erãpũ peerãcoma, arĩmi Pablo judio masare.

²⁹ ïgũ eroparĩcũ peerã judio masa irire erã basi bũrigã game dũyaso wiriama.

³⁰ Pe bojori gohra Pablo ïgũ eropa wajayeniguri wihigue árĩpũ. Ero árĩgũ, árĩpehrerã

ĩgũ ya wihigue warãre mucubiriri mera bo-
catĩrimũripũ ĩgũ. ³¹ Eropigũ ĩgũ gũiro mariro
Goãmũ ĩgũ opũ árĩrare, mari Opũ Jesucristo ya
sãre buhemũripũ. ĩgũ eropa buhequerecũ ta ne
gajirã ĩgũre “Buhebiricãque,” arĩbiriñorã.

Goãmu Yare Wereripu

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1